

# धूपचः

मनदेवी तामाकार





नेपालभाषाया ढ्हूबाखं-मुना

# धूफ्वः धूवः

बाखंमि

मनदेवी तण्डुकार (तामाकार)



च्वसापासा

सफू	:	धूपवः (न्हूबाखं-मुना)
च्वमि	:	मनदेवी तण्डुकार (ताम्राकार)
पिकाक	:	च्वसापासा कुलांभुलु, त्यंगः, यै
द्यबः-किपा	:	दिनेश ताम्राकार
न्हापां	:	५०० गू ने.सं. ११४० चिल्लाथ्वः ६ वि.सं. २०७६ फागुन १७ ई.सन् २०२० फरवरी २९
मू	:	१५०/-
कम्प्यूटर	:	नेवाः इचिङ्ग
ले-आउट	:	विपिन कपाली “चिकमू” ९८४१८१९२५०
थाकू	:	क्वीक टाइम प्रिन्ट लिङ्ग बागबजार, यै
ISBN	:	978-9937-9260-4-1

**देखा !**



**स्व. रत्नदेवी तण्डुकार**

तता रत्नदेवी तण्डुकारयात  
भावपूर्ण श्रद्धाञ्जलिकथं देखा !

- मनदेवी



## पिका:पारवें

थनिं ५० दँ धया थें न्ह्यः कलेजय् ब्वनाच्चंगु इलय् बाखं-खयलय् च्वसा न्ह्याकाः थःगु हे मतापं नेपालभाषाया थी थी साहित्यिक मुँज्याय् त्यानु मचासे पलाः च्वयेकाच्चंम्ह मय्जु-बाखंमि खः मनदेवी तण्डुकार ।

ने.सं. ११३७ स भाषानिभाः भाजु प्रेमबहादुर कसाःया सच्छिदै बुन्हिया लसताय् 'च्वसापासा'पाखें वय्कःया न्हापांगु बाखं-मुना (ने.सं. १०८९ निसें ने.सं. १०९६ या दुने च्वयातःगु २० पुमध्ये १८ पु व मेगु ५ पु बाखं नापं यानाः २३ पु बाखं दुथ्याःगु 'इलं क्यंगु लँ' पिदनेधुंकाः बाखंमि-मय्जुं हाकनं थःगु विद्यार्थीकालय् थें हे बाखं-च्वज्याय् सिर्जनात्मक ल्हाः न्ह्याकादीगु नेपालभाषा-साहित्य-ह्यःमिपिनिगु लागि लसताया खँ खः ।

न्हापां खुसी ने.सं. १०८९ स 'सितु' निलापौस 'पूमवंगु बाखं' पिदनाः ने.सं. १०९८ यंलां 'तय्जू' लसतापौस 'नकतिनि न्ह्यलं चाल' नापं यानाः १४ पु बाखं पिदनेधुंकाः नेपालभाषा-साहित्य-खयलं तापानाच्चंम्ह वय्कलं थौतकया दुने आः पिदनाच्चंगु 'धूप्वः' बाखं-मुनाय् दुथ्याःगु १३ पु न्हूगु बाखं नापं यानाः मुक्कं ५४ पु बाखं च्वयादी धुंकूगु धयागु ल्याःया ल्याखं जक मखु बाखनय् दुथ्याःगु थी थी विषयवस्तु व उक्रियात न्ह्यब्वयेगु थःगु हे पहःया भाय् व विषेशताया ल्याखं नं नेपालभाषाया बाखं-साहित्यया इतिहास न्ह्यब्वयेबलय् न्ह्यथनेब्रहःगु खँ खः थें जिमित ताः ।

थ्व सफू पिथनेत माःगु खर्चया भाला कयादीम्ह भाषा-साहित्यह्यःमि लिस्सें नेपालभाषाया च्वमि, बाखंमि मय्जुया जीवन-पासा भाजु लक्ष्मणकृष्ण ताम्राकारजुयात आपालं आपाः सुभाय् !

- च्वसापासा

# छत्वाःचा जिगु नुगःखँ

● मनदेवी

लाःलाःबलय् छपु निपु बाखं च्वच्चं जिगु स्वंगूगु बाखंमुना-सफू **धूप्वः** पितब्बये फयाः जिके लय्ता बाःवइगु ला स्वाभाविक हे जुल । थ्व सफुतिइ दुथ्याःगु अधिकांश बाखंत झीगु समाजया राजनीतिक, सामाजिक, आर्थिक व पारिवारिक परिवेशय् स्वःस्वःथाय् धूप्वः दंगु, थःम्हं स्यूगु, न्यनागु, ब्वनागुकथं बाखंचु कयाः बाखं च्वयागु खः । जिगु न्हापायागु निगू सफू **इलं क्यंगु लँ** व **लँय् खनागु पलाः**या बाखंत ब्वनाः हनेबहःपि गुरुपि, समालोचकपि व साहित्यकार पासापिसं बाखनय् मगाः-मचाःगु वाः चायेके बियादीगु खँयात जिं फक्व नं लुमंकाः मनन यानाः बाखंत च्वया थें च्वं । अथे हे थ्व न्हूगु सफूया बाखंत नं ब्यादिया न्हापा थें सल्लाह बियादी धकाः मनं तुनाच्चना ।

जिगु थ्व स्वंगूगु बाखंमुना-सफू **धूप्वः** थुलि याकनं पितब्बये फइ धकाः जिं बिचाः हे मयानागु । पासापि प्रतिसरा साय्मि व मोतिलक्ष्मी शाक्यपिसं थगुने थें थुगुसी नं, अतिकं हनेबहःम्ह— झी फुक्कस्यां गुरु श्रद्धावान् वाङमय शताब्दी पुरुष, संस्कृतिविद् सत्यमोहन जोशीजुया सच्छिदै क्यंगु बुदिया लसताय् वय्कःया भि-उसाँय् व



ताःआयुया कामना यासें स्वम्हसिया स्वंगू सफू पिकायेगु मनसाय न्ह्यथन । जि थः समर्थ वा असमर्थ छु जुइ धयागु लिसः बी थाक्या च्वन, तर कुतः यानावनकि न्ह्यागु ज्या नं सम्भव जुइगु खँ थ्व बाखं-सफुतिं जितः अनुभव याकल । पासापि मोतिलक्ष्मी शाक्य व प्रतिसरा साय्मिपिन्त सुभाय् !

सफूया भाषा-व्याकरण शुद्धीकरण यायेगु ज्याया नापनापं सफू पिथनेत यायेमाःगु फुक्कं ज्याया भाला कयादीम्ह च्वसापासाया नायः, किजाभाजु भूषणप्रसाद श्रेष्ठयात वय्कःया ज्वः मदुगु योगदानया लागि यक्व यक्व सुभाय् !

जितः हःपाः बियाः, थःगु अमूल्य ईयात छ्यलाः सफूया खँय् थःगु बिचाः प्वंकाः भित्तुना बियादीपि जि अतिकं हनेबहःपि गुरुपि बाखंच्चमि हितकरवीरसिंह कंसकार, गद्यकवि तथा निबन्धकार पूर्ण वैद्य, समालोचक पूर्णकाजी ताम्राकार, आख्यानकार मथुरा साय्मि व साहित्यकार पासापिन्त दुनुगलंनिसै सुभाय् बियाच्चना ! नेपालभाषा-साहित्य-ख्यलय् तसकं नां जाःगु व प्रतिष्ठित संस्था 'च्वसापासा'पाखें जिगु सफू प्रकाशन जूगुलिं अतिकं लय्तायाः संस्थायात यक्व यक्व सुभाय् देछाया च्वना !

बाखंसफू 'धूप्वः' नांयात त्वयेक सफूया देवः-किपा च्वयाब्यूम्ह जिमि भिन्चाभाजु दिनेश ताम्राकारयात लिपा नं थथे हे ग्वहालि दइ धयागु मनंतुनाः सुभाय् बियाच्चना । सफू पिथनेत माःबलय् माःकथं सहलह यानाः आर्थिक भालासमेत कयादीम्ह जिमि भाजु लक्ष्मणकृष्ण ताम्राकारयात नं लिपा नं थथे ग्वहालिया भलसा कयाः दुनुगलंनिसै सुभाय् !

मांया मतिना स्वयाः छतिं हे म्हो मजुइक चिचीधिकःपि न्हय्म्ह केहँ-किजापिन्त सुसाःकुसाः यानाः ब्वलंकूम्ह जिमि दकलय् तःधिकःम्ह तता स्वर्गीय रत्नदेवी तण्डुकारयात दुनुगलंनिसै भावपूर्ण श्रद्धाञ्जलिकथं थ्व 'धूप्वः' सफू देछाया !

## न्हूगु सफू प्रकाशनायात सुभाय् !

● पूर्ण वैद्य

दशकौ न्ह्यः हे नेपालभाषाया कक्षा-क्वथाय् ध्वदूपि, छपुचः मेधावी विद्यार्थीया रूपय् पिदंपि, थौतक्क नं जीवनय् वःगु गुलिखेय् वाफय्या अनेक लछार-पछारं थः गनऽ गन लाःवनाः नं सह यानाः थःम्हं मत्वःतुसे ज्वनातःगु भाषा, साहित्य व संस्कृति विविध नस्वाःया स्वां इवाः इवाः ह्वयावःगु खनाः जिं भाषा, साहित्य व संस्कृतिया नापं गुबलें गुरु जुयाया हैसियतं नं मात्र थःगु लय्ता पंकागु जुल । सिमा- स्वांमाय् वइगु वसन्त-वेला थें- स्वां, सिइ विविध नस्वाः व सौन्दर्य स्वयेदइ थें सफू प्रकाशित जुयाः खनेदःवःगु तसकं लय्ताया खँ खः ।

मनदेवी ताम्राकारया नं थपालय् हाकनं ग्यसु दुगु न्हूगु बाखंसफू 'धूप्वः' पिदंगु लय्ताया खँ खः । लेखिकाया लेखन-सक्रियतायात सुभाय् ! थःगु नुगःदुने दुगु गुगुं नं भावनायात छम्ह सृजनात्मक स्रष्टाया रूपं हानं हानं मदिक्क बलंका यंकीगु भिं-कामना यासे जिं लय्ता पंका मनदेवीयात जिगु सुभाय् ।

ॐ

# मन्तुना

● मथुरा सायमि

बेलायतया छम्ह नां जाःम्ह नाटककार जर्ज बर्नार्ड शाय धापू छगू दु, 'No conflict, no drama'. अर्थात् त्वापु-ख्यापु/समस्या मदयेक नाटक हे दइ मखु । थ्व खँ नाटकय् जक मखु, बाखनय् नं छ्यलेफु, उपन्यासय् नं छ्यलेफु । अज्ज साहित्यया मेमेगु विधाय् नं थ्व पाय्छि जू, केवल वया भचा रूप जक पाइ, वया भचा रङ्ग जक पाइ ।

थ्व हे ल्याखं स्वयेबलय् बाखंमि मय्जु मनदेवी तण्डुकारया प्रत्येक बाखनय् नं छगू छगू समस्या दु, खास यानाः सामाजिक समस्या, पारिवारिक समस्या । च्वमि च्वइगु धयागु थःम्हं स्यूगु, थूगु, न्यनागु व खनागु हे वस्तु जक खः । थ्व बाखंमुना-सफू धूपवः'लय् गुलि नं बाखं घानातःगु दु, व फुक्क थ्व घेरां पिने मखु । परिवारय् तक्यनाच्चंगु त्वापु-ख्यापु, भेद-विभेद, अन्याः-अत्याचार, यौनजन्य हिंसा, सामाजिक कुरीति, नारी-शोषण, थिति-बेथिति अले उप्वः बाखनय् बेरोजगारीया समस्या, वैदेशिक रोजगारीइ वनीपिसं हिचःति हायेकाः नं थःगु अस्तित्व मदयेकाः ल्वय् घानाः नेपाः लिस्वया वयेमाःपिं मिसा-मिजंतयगु ख्वबि-झसुकाःया बाखं हे थ्व धूपवः' खः । थ्व हे अस्तव्यस्ततां बलना वयाच्चंगु फुक्क धूया बाखं-मुना खः थ्व धूपवः' ।

ब्याक्कं बाखंया विषयवस्तुयात स्याचुक्क कत्तायेफुगु प्रतीक खः थ्व  
'धूप्वः' ।

प्रत्येक च्वमिया बाखं ग्वयेगु/च्वयेगु थःथःगु हे पहः दइ । थुकी हे  
च्वमिया मौलिकता सुलाच्चनी । मनदेवीया न्हापांनिसेंया बाखनय् छगू हे  
प्रवाहं घटना न्ह्यानाच्चंगु खनेदु । व खः वर्णनात्मक शैली बाखं न्ह्यब्वयेगु ।  
भाय् यचुपिचु । थिकः गनं मन्हू । ब्वमियात नेवाः-संस्कृतिइ दुबिनाः खँ  
न्यनाच्चना थें भान जू । थ्व बांलाःगु पक्ष खः ।

बाखंया प्रस्तुतीकरणय् विविधता हयाःलि, माःथाय् मनोवैज्ञानिक  
द्वन्द्व न्ह्यब्वयाःलि, स्वाभाविक संवादं घटनायात घायेदुसा अज्ज बाखं  
सशक्त जुइ । माःथाय् मानसिक स्वकथन नं पात्रयात याकाःलि कौतुहलतां  
कय्कय्च्याके दुसा अज्ज उप्वः बाखं जीवन्त जुइ । बाखनय् ज्यान दइ,  
प्राण दइ । जितः ताःगु थथे ।

मनदेवीया साहित्यिक जीवनय् दथुइ ताःहाकः ई झासु लनेमाःसां  
थुगु इलय् वयाः मदिकक धया थें सक्रिय रूपं बाखं-साहित्यय् ल्हाः  
न्ह्याकाः, सफू पिथनाः सनाजूगु तसकं बांलाःगु ज्या खः । ने.सं.  
१९३७ निसें थ्व १९४० तकया दुने स्वंगू स्वंगू बाखंसफू पिथने धयागु  
ख्याःखँ मखु । छम्ह नेवाः, अज्ज मिसा जात जुयाः थुकथं न्ह्यचिला  
वयेफुगुली वया तपस्या व भाषाप्रतिया माया-ममता हे खः । दः ला  
लगय् जू, मनदेवीया भाषा व साहित्यय् थुकथं मन वनाच्चंगुया दुने थः  
जहान भाजु लक्ष्मणकृष्ण ताम्राकारया हःपाः हे मुख्य खः । साहित्य  
सिर्जनाया ज्याखँय् थुकथं हे जः-परिवारया नं चक्कं-नुगः दुसा न्ह्याथेज्याःगु  
पंगलः वःसां याउँक चीकेफइ । जितः थौं थथे हे धायेवल ।



# भितुना : बाखंच्वमि मनदेवीयात

● हितकरवीरसिंह कंसकार

नेपालभाषा-साहित्यया नां जाःम्ह बाखंच्वमि मनेदवी तण्डुकार (ताम्राकार) या पिदनेत्यंगु न्हूबाखं-मुना सफू **धूप्वः** ब्वनेखनाः लय्ताः प्वंकाच्चना । वय्कःया न्हापांगु **इलं कयंगु लँ** व **निगुगु लँय् खनागु पलाः** धुंकाःया थ्व स्वंगुगु, झिन्हय्पु बाखं दुथ्याःगु **धूप्वः** बाखं-सफू अझ स्तरीय व परिष्कृत खनेदुसा थुगु सफुतिं नेपालभाषाया बाखं-लागाय् ब्यागलं थाय् कयच्याइगु छुमां जिं खना ।

थाःगाः हे काये मफयेक हितुहिला वनाच्वंगु राजनीतिक परिवेशया लिसेलिसे झीगु समाजया संरचना व रीतिथितिदुने ग्यानापुक ब्दलाच्वंगु थी थी विकृति, विसंगतियात पाचुका छ्वयेया निति कलात्मक लसां तयाः बाखं ज्यायेगु च्वमिया थःगु पहः दु, गुगु तस्सकं च्वछायेबहः जू ।

बाखंच्वमि थज्याःगु हे मनीगु-मभिगु क्वपुलांगु छ्यलाबुलाया ज्याखँयात स्याच्चुक ध्याचू नकाःलि ईब्यःयात ल्वयेक ह्यूपाः हयेभनं बाखंचु (विषयवस्तु) यात घुसुहुं न्ह्याकुन्ह्याकुं उत्सुकता थँसे बाखं क्वचायेकेगुली छपलाः न्ह्यःने हे लाःगु दु मधासँ मगाः ।

सलललं न्ह्यानाच्वंगु भाय् व शैली ल्वःवनापुसे च्वं हे ताल । माःथाय् माःकथं नुगलय् स्वचाइकथं हिसि भयबिक उपमाया रूपय् खँत्वाः-खँभाय् व छुनाखँयात छ्यलाः बाखंच्वमि थःगु विशेषता व परिपक्वता ब्वयादीगु दु ।

बाखंच्वमि मनदेवी तण्डुकार (ताम्राकार)यात यक्व यक्व भितुना देछायाच्चना ।

नेपाल संवत् १९४० प्वहेलाथ्वः ३

# बाखंच्वमि मनदेवी तण्डुकारया “धूप्वः” बाखनय् समसामयिकता

● पूर्ण ताम्राकार

नेपालभाषाय् धार्मिक बौद्ध जातक बाखंच्या इतिहास तसकं ताःहाकः । जातक बाखंच्या इतिहास पुइकावनेबल्य् लिच्छविकालया चाबहीया छगू अभिलेख्य 'किन्नरिजातकीर्णन्नानचित्र विराजीतय' वाक्य ध्वदुइ । थ्वयात बाखंच्या छुमांकथं कायेबल्य् नेपालभाषाया प्राचीन धार्मिक बाखं-साहित्यया इतिहास १६०० दँ ताःहाकःगु खनेदु । मानव जीवन व मानव समाजनाप स्वाःगु न्हूबाखं (शर्ट स्टोरी) धयातःगु बाखं अमेरिकाय् प्रादुर्भाव जूगु थनिं १७८ दँ दत । थ्व प्रवाहया बाखं नेपालभाषा-साहित्यय् दुहांवःगु थनिं ८३ दँ दत । उबलय्निसें थौतक न्हूबाखं-साहित्य-यात्राय् बाखंच्या आन्तरिक संरचना, शिल्पगत नवीन प्रयोग, विषयवस्तु तःचाः जुजुं वयाच्चंगु दु । थौं न्हूबाखं-साहित्य थपू यायेगु तातुनाः यक्व न्हूपि बाखंमिपि पिलुयाच्चंगु स्वागतयोग्य खः । थ्व क्षेत्रय् मिसा-बाखंच्वमि मनदेवी तण्डुकार (ताम्राकार) या स्वंगूगु बाखंसफू 'धूप्वः' पिदंगु अतिकं लसताया खँ खः । विद्यार्थी जीवनकालनिसें वय्कलं बाखं-रचनाय् च्वसा न्ह्याकादीगु खः । वय्कःया बाखं नं न्हापां ने.सं. १०८९ स खपय् जूगु विनेभा.सा. सम्मेलनय् न्हापयां ल्यू सिरपाः त्याकेत ताःलात ।

उबलयनिसै १०९४ तक्क वय्कःया च्वसा बांलाक हे न्ह्यानाः १२ पु बाखं थी थी पत्रिकाय् पिदन । नेपालभाषा-बाखं-साहित्यय् च्वसा जःम्ह प्रतिभाशाली बाखंच्चमिकथं मनदेवी प्रतिस्थापित जूगु खः । वयां लिपा, वय्कःया न्हापांगु बाखं पिदनाः ४८ दै लिपा ने.सं. १९३७ स 'इलं क्यंगु लँ न्हूबाखं-संग्रह ज्वनाः बाखंच्चमि मनदेवी तण्डुकार झीगु साहित्य-ख्यलय् दंझाल । उबलयनिसै बाखं-रचनाय् वय्कःया च्वसा थौतक्क मदिकक न्ह्यानाच्चंगु दु । 'इलं क्यंगु लँ पिदनाः दँछि लिपा वय्कःया 'लँय् खनागु पलाः' (ने.सं. १९३८) न्हूबाखं-मुना पिदन । थौ, दच्छि लिपा हानं मनदेवी तण्डुकारया स्वंगूगु न्हूबाखं-मुना 'धूप्वः' पिदंगु दु । थ्व बाखं-मुनाय् न्हूगु बाखं १३ पु व 'लँय् खनागु पलाः' दुनेया स्वपु बाखं दुथ्याः । थ्वकथं बाखंच्चमि मनदेवीजुं निदँया दुने ३५ पु व 'इलं क्यंगु लँया २३ पु बाखं नापं यानाः ५६ पु बाखं सृजना यानाः पिथनेत ताःलाःगु दु । थुकिं थौकन्हय् मिसा-बाखंच्चमिपिमध्ये जक मखसे बाखंमिपिमध्ये बाखं-रचनाय् दकलय् च्वसा जःम्ह बाखंच्चमि मनदेवी तण्डुकार जूगु दु ।

बाखंच्चमि मनदेवीजुं थ्व बाखं-मुनाया शीर्षक 'धूप्वः' तयादीगु दु । 'धूप्वः'या अर्थ लकसय् धूप्वः दनाः प्रदूषण जुइगु खः । 'धूप्वः'या बाखं ब्वनेबलय् 'धूप्वः'या अर्थ देय्या आर्थिक, सामाजिक विकृति, विसंगति, विषमतां उत्पन्न प्रदूषणया अर्थय् धयातःगु खनेदु । 'धूप्वः'या कथावस्तु अनुशीलन यायेबलय् वय्कःया 'लँय् खनागु पलाः' बाखं-मुना थें समाजय् च्वनाः जीवन हनाच्चपि मनूतय्सं थौ आर्थिक, सामाजिक समस्यां क्वत्ययेकाः म्वानाच्चपि मनूतय्गु थाःगाः मदुगु जीवनया विषयय् रचित बाखं-मुना धायेमाः । 'धूप्वः' दुनेया झिंखुपु बाखनय् झिंखुगू हे थी थी सवाःया बाखं दु ।

'धूप्वः'या न्हापांगु बाखं 'चखुंप्वालं तिकिंनगु झसुकाः'लय् भौनं न्ववाःगु बोली जंक्व यायेत्यःम्ह माजुम्ह सूर्यमायाया नुगलय् स्याइ, थःगु छँया चखुंप्वाःया नच्चापि चखुंचा निम्हेस्यां धितुधिनाः बुरिम्ह चखुंचित चखुंप्वालं कुतुका हयाः सीगु घटनां सूर्यमायां थःत नं बुरिम्ह चखुंचा थें तायेकाच्चनी ।

स्वम्हं म्हयाय् जक बुइकल, काय् बुइके मफुम्ह धका: छे पित्तिकाच्वम्ह शोभा व वया स्वम्ह म्हयाय्पिनिगु जीवनया बाखं 'आमाइया चान्हय् मिलाया ज:' ख: ।

मां-बौ निम्हं मदयेका: सुथय् क्याम्पस वना:, न्हिनय् दँक:मि ज्या याना: जीवन न्ह्याकाच्वम्ह सरस्वती दँक:मि जूगुलिं इहिपा: मजुयाच्वनीगु कथावस्तुया बाखं 'कंझालय् हव:गु स्वां' ख: ।

अस्ट्रेलियां निम्ह काय्पिसं छवयाह:गु ध्यबा देगुपूजा-गुथि न्यायेका: फूगु व मेगु ध्यबा छवयाहयेत धालं काय्पिसं न्हाय्पं हिइक खँ न्यंकूगुलिं गुबलें बाग: पाउरोटी व च्या त्वना:, गुबलें छुचुंमरि स्वपा व च्यां, गुबलें आलु-बजिं न्हिं छछा: प्वा: जायेका: म्वायेत बाध्यपि त:मां व त:बा:या जीवनया कुचा 'ज:ल्यूने हाकु-किच:' बाखं ख: ।

थथे हे मचा प्वाथय् दुबलय् तिलय्ग्यनिगु नसा नये मखना: बूम्ह मिसामचां तुतिं चुइ मफुगुलिं मचाया तुतिया अपरेशन यायेगु लागि ध्यबा कमय् याना: मुंकेत अमेरिकाय् मसाजया ज्या यानाच्वम्ह संगीताया बाखं 'विवशतां चिरिबा:गु नुग:' ख:सा स्वम्ह काय्पि दतं नं अन्तय् काय् थें याना: लहिनात:म्ह काय्म्हं बुरिम्हेसिया सीम्हय् मि तयेमा:गु घटना दुगु बाखं 'च्या:गु दिप : ख्वाउँगु खसु' ख: ।

जागीरं जक जीवन हनेत मगात धका: मलेसिया वम्ह त:धिक:म्ह काय् दुर्घटनाय् लाना: अन हे सीगु व मेपि कतारय् वंपि काय्पि निम्हं मोहनिबलय् छैय् वइ धका: धुक्क च्वनाच्वम्ह मांम्ह सीतां कतारय् निम्हं काय्पि क्वथाय् सिनाच्वंगु खँ न्यनेमालीगुया बाखं 'लिस: मवल' ख: ।

खुसि छीसिधलकि तुतां त्व:मंकी धयागु नेवा: उखान दु । धूप्व:' बाखं-मुनाय् थ्व हे उखाननाप ज्व:ला:गु छपु बाखं 'निपु तुतां' ख: । देशय् लोकतान्त्रिक गणतन्त्र नीस्वनेत जूगु जनआन्दोलनय् गुलिस्यां थ:गु अमूल्यगु जीवन पानावन, गुलिं गोली लाना: ल्हा:तुति मदयेका: अपाङ्ग जुया: म्वानाच्वनेमाल, अले जनआन्दोलनया नेतृत्व या:पिं धा:सा थौं न्हूपि जुजु/बाच्छा: थें जुयाच्वन । इमिसं आन्दोलनय् ब्वति का:पि सकसितं त्व:मंकल । जनआन्दोलनय् पुलिसया गोली निपा तुतिं मदयेका: निपु वैसाखीं चुया: दयनीय जीवन हनाच्वम्ह, समरमानया



जीवनया लिधंसाया बाखं 'निपु तुतां' खः । थ्व बाखं वरिष्ठ बाखंच्चमि लक्ष्मण राजवंशीजुं रचित जीवित शहीद मुकेश कायस्थनाप स्वाःगु 'गोली छ्यनय् दुघाः नुगलय्' बाखं लुमकाब्यू ।

बाखं-मुनाया गुपुगु बाखनय् अफिसं बसय् च्वनाः छैय् लिहां वयाच्चंम्ह रमोलायात छपुचः मिजंतय्सं सामूहिक बलात्कार याःगुलिं सी मास्तिवःगु खँ रत्नमानयात कनाच्चनीगु घटनाया बाखं 'जघन्य अपराध' खः । थ्व बाखनं देशय् चर्चित निर्मला बलात्कार हत्या-काण्डयात लुमकाब्यू ।

लजगाःया नितिं ओमानय् स्वदैया नितिं वंम्ह विष्णुमायां निखा छैया भ्वातिं-ज्या यायेमाःगु, प्वाः जायेक नये-त्त्वने मखंकाः स्वदै लिपा नेपाः लिहां वयेत नेपाःया एम्बेसीइ वनाः गुहारय् याःवनं नं लिहां वये मफुइगु घटनाया बाखं 'वाः चायेकेमाःगु ख्याच्चः' खः ।

थथे हे नेवाःतय्सं दाजुकिजापिनि अंश इनाकाये माःबलय् छै मगानाः पुलांगु छै मियाः नेवाःत विस्थापित जुयाः रिगरोड-जःखः च्वंवने माःगुलिं नेवाःभाय्, जात्रा-पर्व, तजिलजि व संस्कृति बुलुहुं म्हासय् जुयावंगु विषयया बाखं खः 'विस्थापितया खालु-सवाः' ।

बाखं-मुनाया 'स्याः मचायेकूगु दुघाः'लय् इहिपाःया खँ जूसां इहिपाः मजुयाच्चपि सुचित्रा व सुभाषया दथुइ एम.बी.ए. ब्वने क्वचायेकाः इहिपाः यायेगु खँय् निम्हं सहमत जुइ । लिपा सुचित्रां सुभाष एच.आइ.भी. जूगु सीवं सुचित्रायात अन्तरद्वन्द्व जुइ । थ्वबारे सुभाष सुचित्रायात पासा वा जीवनपासा निगूमध्ये छगू ल्ययेत इनाप यानाः क्वचायेकातःगु बाखं थ्व खः ।

बाखं-मुनाय् दुध्याःगुमध्ये बाखंच्चमि दकलय् लिपा रचित बाखं 'धूप्वः' खः । थौकन्हय् निम्न-वर्गया लजगाःया मू-स्रोत धयागु हे वैदेशिक रोजगार जुयावन, उकी नं खाडीदेय् जुल । लजगाःया नितिं लेबनान वंम्ह बुद्धिबहादुर ल्हाः निपां मदयेकाः नेपाः लिहां वइगु, मलेसिया वंम्ह सुनिता जलासै निगलं स्यनेधुंकाः नेपाः लिथ्यनीगु, कुवेत वंम्ह धनबहादुर न्ह्यपुइ हि कुनाः सी व म्वायेया दथुइ काकाः नेपाः लिहां वइगु, साउदी अरबय् वंम्ह सुनबहादुरया म्हाय् प्वाथय् दयाः अर्जेन्ट डेलिभरी याये मायेकाः नेपाः लिथ्यनीगु व इजिप्ट वंम्ह

भुयूचा पूर्णतः निरपराधी खयाः नं मृत्यु-दण्डया सजाय पियाः  
म्हानाच्चनेमालीगु थें ज्याःगु विदेशय् वंपि मनूतय्गु जीवन-मरणया बारे  
बांलाक चित्रण यानातःगु बाखं थ्व खः ।

‘धूप्वः’ बाखं-मुनाय् दुथ्याःगु ‘हलिमलि’, ‘क्वातुगु प्रतिकार’ व  
‘त्यपय् दुने खःगु निभाः’ बाखंच्चमिया ‘लँय् खनागु पलाः’ दुनेया बाखं  
खः । चथाः-नखःनाप स्वाःगु ‘हलिमलि’ बाखं हलिमलि मियाः जीवन  
हनाच्चंम्ह हरिमायाया पुलिसनाप जूगु संघर्षया घटनायात कयाः ज्यानातःगु  
बाखं खः ।

अथे हे गलँचा कारखानाया मालिकयात कारखानाया मजदुर- मिसा  
सन्ध्यां थःगु अस्मिताय् घाः लाकेगु कुतः याःबलय् मिसा-मजदुरत दक्वं  
छप्पें जुयाः ज्वंकाछ्वइगु व सन्ध्याया जीवन छ्याताहां उलेत सफलगु  
बाखं ‘क्वातुगु प्रतिकार’ खः ।

जनताप्रति सरकारया गैरजिम्मेवारी व असक्षमतां जेब्रा-क्रस व  
सतक-पेट्टी न्यासि वनाच्चंपि मनूतय्त ट्रिपर-गाडी व माइक्रो-बसं  
क्ययेकाः मनूतय्त स्यानाच्चंगु, अपाङ्ग यानाच्चंगु कथावस्तुइ ज्यानातःगु  
बाखं ‘त्यपय् दुने खःगु निभाः’ खः । थ्व बाखनं थौं-म्हिंगःतिनि धनुषाय्  
ट्रिपर-गाडी दिलिप महतोयात निर्ममतापूर्वक क्ययेकाः स्याःगु चर्चित  
घटनायात लुमंकाब्यू ।

थौं नं समाजय् मिसाप्रतिया पुरातनवादी चिन्तनया अन्त मजुनि ।  
थुकिं यानाः म्हिगः थें थौं नं मिसात मचा बुइकेगु मेशिन, मिजंतय् यौन  
तृप्तिया साधन व मिजंया तुलनाय् मिसात असक्षम, अयोग्य व असहाय  
वर्ग थें तायेकाच्चंगु दु । थौं नं नारीवर्ग बलात्कार, महिला-हिसाया नापं  
थी थी कथंया उत्पीडनं क्वत्ययेका च्वनेत बाध्य जुयाच्चंगु दु । थज्याःगु  
हे नारी-समस्याय् केन्द्रित गुपु बाखं ‘धूप्वः’ दुने दु । थज्याःगु बाखनय्  
‘खुंप्वालं तिकिनंगु झसुकाः’, ‘आमाइया चान्हय् मिलाया जः’, ‘स्याः  
मचाःगु दुघाः’, ‘जघन्य अपराध’, ‘हलिमलि’, ‘क्वातुगु प्रतिकार’, ‘कंझालय्  
ह्वःगु स्वां’, ‘विवशतां चिरिबाःगु नुगः’, ‘वाः चायेकेमाःगु ख्याच्चः’ खः ।

‘आमाइया चान्हय् मिलाया जः’, ‘कंझालय् ह्वःगु स्वां’ व ‘विवशतां  
चिरिबाःगु नुगः’ बाखंया मिसा-पात्र मिजंत थें ताःलाक जीवन न्ह्याकेत

मिसात सशक्त जूगु व 'हलिमलि' व 'क्वातुगु प्रतिकार' बाखंया मिसा-पात्र नारी-उत्पीडनया विरोधय् संघर्ष यायेत नं सक्षम जूगु दसि न्ह्यब्या ब्यूगु दु ।

'चखुंप्वालं तिकिंनुगु झसुकाः' बाखनं धाःसा मिसाया शत्रु नं मिसा हे खः धयागु खँ उलाब्यूगु दु ।

'जघन्य अपराध' बाखं छपु त्वःताः मेगु बाखंया मिसा-पात्र असहाय, अशक्त व असक्षम मखसे थःगु तुतिइ थः दनेत सक्षमपि, संघर्षशील पात्रकथं प्रस्तुत यानातःगु सकारात्मक जू ।

देय्या अर्थतन्त्रया मू-आधार हे रेमिट्यान्स, देशय् फक्व अप्वः रेमिट्यान्स दुत हयेत वैदेशिक लजगालय् आकर्षित यानाः राज्यं न्हिं झिन्यासः-निद्वः युवात विदेशय् छ्वयाच्चंगु दु । तर विदेशय् वनाः लजगाः यानाच्चपि नेपाःमिपिसं मेशिन थें जुयाः ज्या यायेमाःगु, अय्सां प्वाः छगः तक्कं थने थाकुगु, गुम्हं अपाङ्ग-अशक्त जुयाः, गुम्हं किङ्नी फेल जुयाः नेपाः लिहां वयेमाःगु व गुलिसियागु सीम्ह जक दुहां वयाच्चंसां सरकार मिखाकां जुयाः जनताप्रति पूर्णतः गैरजिम्मेवार जुयाच्चंगु विषययात थी थी कथावस्तुइ रचित बाखं 'विवशतां चिरिबाःगु नुगः', 'लिसः मवल', 'वाः चायेकेमाःगु ख्याच्चः', 'धूफ्वः' बाखं खः । 'धूफ्वः' बाखं-मुनाय् थुपि बाखनं वैदेशिक लजगालय् वनाच्चपि मनूतय्गु पिर-मर्कायात बांलाक उलाब्यूगु दुसा मेखे थ्वबारे सरकारप्रति स्याचुगु व्यंग्यात्मक बाखं धायेमाः ।

नेवाःभाय्, नेवाः-संस्कार व संस्कृति नेवाः-म्हसीका खयाः नं छँय् जःल्याः अप्वः दयावःलिसे छँ मगानाः मछिनाः पुलांगु छँ मियाः रिङ्गरोड-जःखः च्वंवेनेमाःगुलिं झीगु भाय्, तजिलजि व संस्कृति न्हियान्हिथं न्हनावनाच्चंगु खँ ध्वाथुइकाच्चंगु बाखं 'विस्थापितया खालु-सवाः' खः ।

नेवाः-तजिलजिइ ईकथं हिलासू हये मफतकि नेवाःत आर्थिक रूपं गतिपति मदया वनेफु धकाः ध्वाथुइकेगु तातुना 'जःल्यूने हाकु-किचः'ल्य् खनेदु । थ्व निपुं सन्देशपरक बाखं धायेछि ।

थौया न्हूबाखं म्हिगःया घटनाप्रधान व सरप्राइज प्लटं मुक्त जुयाः प्लटलेस बाखं, पात्रया मनःस्थिति चित्रण यानातःगु बाखं, वातावरण

चित्रणप्रधान बाखं, संकेतात्मक कथानकया बाखं सृजना जुयाः प्रकाशनय् वयाच्चंगु दु । बाखं विधाय् नवीनता हयेगु तातुनाः प्रयोगात्मक थी थी विधि छ्यलाः रचित बाखं नं पिदनाच्चंगु दु । धूप्वः'या गुगुं गुगुं बाखं बनेबलय् नं थज्याःगु हे आभास ब्यू । 'निपु तुतां' घटनाविहीन, संवाद व वातावरण चित्रणप्रधान बाखं धायेछिं । बाखं-साहित्यय् रुसया एन्तोन चेखोव (इ.सं. १८६०-१९०४) या उदय लिपा बाखनय् वःगु पात्रया मनःस्थितिया वर्णनयात अप्वः मू बीगु जुयावन । थ्व प्रवाहया बाखं 'धूप्वः'दुने खनेदु । 'चखुंप्वालं' तिकिनंगु झसुकाः'या सूर्यमाया व 'स्याः मचाःगु दुघाः'या सुचित्रा व सुभाषया मनःस्थितिया वर्णनय् केन्द्रित निपुं मनोविश्लेषणउन्मुख बाखं धायेछिं । अथे हे 'धूप्वः'लय् रि पोर्टाज शैली छगूनाप मेगु घटनाया वर्णनया स्वापू मदुसां न्यागू घटनाया वर्णन प्रस्तुत यानाः बाखं रचना जूगु दु । थ्व मनदेवीजुया बाखं विधाय् न्हूगु प्रयोग हयेगु कुतः खनेदु ।

आख्यान-साहित्यया छगू कचा बाखं-साहित्य खः । विधागत दृष्टि नं बाखंया मूलतत्त्व कथानक खः । 'धूप्वः' बाखं-मुनाय् प्रायः बाखंया कथावस्तु निम्न-मध्यमवर्ग व निम्न-वर्गया मनूतय्गु आर्थिक, सामाजिक समस्याय् चाःचाःहिलाच्चंगु खंके फइ । मनूतसैं जीवन न्ह्याकेत मगाः-मचाःया हुनिं निम्न-वर्गया मनूत वैदेशिक लजगालय् वनेत बाध्य जुयाच्चंगु, थः जन्म जूगु छँ त्वःताः विस्थापित जुइमालाच्चंगु व बुरिम्ह माजुं भौया खं नुगलय् स्याकीगु, स्वम्ह कायपि दुसां सीम्ह मांयात मि मतइगु, ईकथं तजिलजिइ हिलासू हये मफुगुलिं न्हिं छछाः प्वाः थनेत थाकुकाः जीवन हनेमाःगु थें ज्याःगु सामाजिक विकृति व विषमताया कथावस्तुइ प्रधानता दु । थ्व कथावस्तु सामाजिक जुयाः नं समसामयिक जू । 'धूप्वः'या गुलिं बाखं बनेबलय् मर्मस्पर्शी जू, नुगः मछिसे चंकाब्यू । कथानक न्हू जुयाः नं 'विवशतां चिरिबाःगु नुगः', 'लिसः मवल', 'निपु तुतां', 'वाः चायेकेमाःगु ख्याच्चः' बाखं बाखंच्वमिया कल्पनां सृजित बाखं जूसां अयथार्थताया छकिचः तक्कं खने मदु । बाखंया कथावस्तुया चित्रणकला यथार्थपरक जुयाः स्वाभाविकता व वास्तविकतानाप सत्तीगु खंके फइ । थज्याःगु बाखनय् मानव-जीवन चकनाः हवइ, थ्व हे

आख्यान-साहित्यया आत्मा खः । थ्वकथं बाखंछ्वमि मनदेवीजुया 'लँय् खनागु पलाः' बाखं-मुनाया तुलनाय् 'धूप्वः' बाखं छपलाः न्हयःने न्ह्यानाच्चंगु खनेदु ।

बाखंछ्वमि मनदेवी तण्डुकारया बाखनय् बाखं-रचना, प्रस्तुतीकरण, कथावस्तु गति बियाः न्ह्याकेगु व बाखंया अन्त यायेगुली बिस्कं स्वरूप खनेदु । बाखंया प्रारम्भ कथानकया सामान्य परिचय, पात्र-संवाद व भूमिकां न्ह्याइ, बाखं न्ह्यान्ह्यां वनेवं दथुइ थ्यंकाः मू-कथानकया समस्या प्रवेश जुइ, मू-समस्या चरम उत्कर्षय् थ्यंकाः बाखंया अन्त जुइ । गुलिं बाखं संयोगान्त व वियोगान्तं अन्त जुयाच्चनी, गुलिं बाखं उत्सुकता व कौतूहलतां अन्त जुयाः गुलिं प्रतीकात्मक संकेतं अन्त जुयाच्चनी । 'धूप्वः' दुनेया बाखनय् न्हयथनेबहःगु छगू पक्ष थ्व खः ।

प्रारम्भिक न्हूबाखनय् कथानक, चरित्रचित्रण, संवादप्रधान जुइगुलिं पात्र नं अप्वः दयाच्चनी । बाखं-संरचनाया परिवर्तित प्रवाहकथं थौया न्हूबाखं पात्रहीन वा फक्व म्हो जक पात्र दयाच्चनी । 'धूप्वः'या प्रायः बाखनय् मू-पात्रकथं निम्ह स्वम्ह जक दु । अनावश्यककथं अप्वः पात्र प्रस्तुत यानाः बाखं ताःहाकः यायेगु प्रवृत्ति थ्व बाखं-मुनाय् खने मदु । प्रायः बाखंया पात्र निम्न-मध्यम व निम्न-वर्गया पात्र प्रस्तुत यानातःगु 'हलिमलि' या हरिमाया, 'क्वातुगु प्रतिकार'या सन्ध्या, 'कंझालय् ह्वःगु स्वां'या सरस्वती, 'विवशतां चिरिबाःगु नुगः'या संगीता, 'निपु तुतां'या समरमान, 'वाः चायेकेमाःगु ख्याच्चः'या विष्णुमाया आर्थिक व सामाजिक रूपं उत्पीडित वर्गया पात्र प्रस्तुत यानातःगु दु, गुकिं यानाः 'धूप्वः' दुनेया बाखं उत्पीडित निम्न-वर्गया प्रतिनिधिमूलक बाखंमुना धायेछिं ।

बाखंछ्वमि मनदेवी तण्डुकारया बाखंबारे मधासे मगाःगु छगू पक्ष भाषागत शैलीइ दुगु सौन्दर्य खः । बाखंया प्रभावकारिता व सफलताया आधार कथावस्तु वा विषयवस्तु जक मखसे बाखं कनेगु कलात्मक शैली नं खः । बाखनय् उत्पीडनया विरोध व विद्रोह जाःगु विषयवस्तुं बाखं जीवनमय यानाबी थें कलात्मक शैली बाखंयात सौन्दर्यमय यानाः हिसिं भयबीका बी । बाखंछ्वमिया 'लँय् खनागु पलाः' थें 'धूप्वः'

बाखनय् झीसं न्हिन्हिं ल्हायेगु खँल्हाबल्हाया विशुद्ध नेवाःभाय् व वाक्य सूक्ष्म रूपं प्रयोग जुयाच्चंगु दु । थुकिं बाखंया भाषा अतिकं सरल, सहज व स्वाभाविक जुयाः बाखनय् सजीवता थनाब्यूगु दु । गैरनेवाः खँग्वःया प्रयोग जुयाच्चंगु खंके थाकु । बाखनय् नेवाः उखान व उपमाया अप्वः प्रयोग जुयाच्चंगु खंके फइ । बाखंच्चमिं 'धूप्वः'या बाखनय्— क्वाःगु चिकं लुइ थें, नुगः ला प्वंगु धम्प-ग्वम्प थें, चि नःम्ह खाचा थें, ल्हाप्सा प्वालाक्क त्वयाः जः वये थें, ध्याचलय् अप्पां कयेके थें, इमूचां न्याये थें, घाँय्म्वः-सु थें, नालु-खिपः थें, बुलुमि पुनाच्चंगु दुघाः, लँ तंपि लँजुवाःत, स्वां मट्वयेकं इवाः जुइगु जुल थज्याःगु नेवाः उखान व उपमाया नापं प्रतीक व विम्बया प्रयोग यानातःगु दु । नेवाः उखान व उपमाया दकलय् अप्वः प्रयोग यानातःगु बाखनय् 'स्याः मचाःगु दुघाः' खः । थ्व बाखंया शिल्पगत कलात्मकता शिखरया च्वाक्य थ्यंकेत न्ह्यानाच्चंगु पलाःचिं खः । अथे ला मनदेवीजुया 'इलं क्यंगु लँ'या 'त्वहंमाय् च्वंगु जीमल्ता' प्रारम्भिक बाखनय् नं प्रतीकात्मक वाक्य प्रयोग जुयाच्चंगु खंके फइ । थ्व प्रवाह 'धूप्वः'या बाखनय् अझ बांलाक विकास जुयाच्चंगु खंके फइ । थथे हे वय्कःया गुलिं बाखंया शीर्षक नं प्रतीकात्मक जू, थ्व धयागु बाखं-रचनाय् भाषागत शैलीइ कलात्मकतां अतिकं छायेपी सःम्ह अझ ला पोख्तम्ह बाखंच्चमि मनदेवी तण्डुकार खः धयागुया दसि खः ।

'धूप्वः' क्वचायेक ब्वनेबलय् विषयवस्तुइ माःकथं च्यूताः तयाः आर्थिक गरिबीया हुनि उत्पन्न समस्याय् प्रायः बाखंया विषयवस्तु न्ह्याकातःगु बाखं-संग्रह धायेछिं । बाखंया कथावस्तु प्रस्तुतीकरण, पात्र-चित्रण व संवाद यथार्थपरक जक मखसे स्वाभाविकतानाप नं यक्वं सती । स्वाभाविकताया दृष्टिं बाखंच्चमिया 'लँय् खनागु पलाः'या तुलनाय् 'धूप्वः' बाखं-संग्रह परिमार्जित जुयाः छपलाः न्ह्यःने लाःगु खंके फइ । बाखंया पात्र जीवन हनेत क्रियाशील, मेहनती व परिश्रमी पात्रकथंया प्रस्तुतिं यानाः सजीव खनेदु, बरू 'हलिमलि' व 'क्वातुगु प्रतिकार' बाखंया पात्र थें मेगु बाखंया पात्र सचेत व संघर्षशील खने मदु । बाखंया कथानक, भाषागत शैलीइ व अभिव्यक्तिया बारे कुं

खिनेत धाःसा यक्वं थाकु । 'धूप्वः'दुनेया बाखं ब्वनावं वनेबलय् थौ समाजदुने न्हियान्हिथं विकसित जुयावयाच्चंगु विकृति, विसंगति व विषमता छ्याताहां उलाबीगु तातुनाः हे मनदेवीजुं 'धूप्वः' बाखं रचना यानाः पिथनादीगु खनेदु । बाखंया कथावस्तुइ केन्द्रित जुयाः बाखं न्ह्याकाः अन्त यानातःगु कथं सामाजिक चेतना दुम्ह, यथार्थवादी सोच दुम्ह, समसामयिक बाखं सृजनाय् च्वसा जःम्ह बाखंच्वमि मनदेवी तण्डुकार खः धकाः धायेमाः । वय्कःया स्वंगू बाखंमुना प्रकाशनं नेपालभाषा-बाखं-साहित्ययात तःमि जक यानाब्यूगु मखसे यथार्थवादी बाखं-साहित्यया विकास यायेत तिबः नं ब्यूगु दु । वय्कलं नी यानाः मदिक च्वसा न्ह्याकावन धाःसा मनदेवीजुया च्वसां सृजित बाखं झीगु बाखं-साहित्यय् छगू बिस्कं देन जुइ । वय्कःया बाखं अनुशीलन यायेबलय् बाखं सृजनाया प्रतिभा जहां थीम्ह मनदेवी तण्डुकार कन्हय् बाखं-साहित्यय् प्रसिद्ध बाखंच्वमि जुइगु स्पष्ट खनेदु । थौ बाखं विधा थपू यायेत मन क्वसायेकाः च्वसा न्ह्याकाच्चंम्ह मनदेवी तण्डुकारं कन्हय् बाखं-साहित्य-क्यबय् अझ बांलाःगु नस्वाःगु बाखंरूपी स्वां हवयेकाच्चनी धकाः आशा याये ।







पिकाकपाखें	- च्वसापासा	- (क)
छत्वाःचा जिगु नुगःखँ	- मनदेवी	- (ख)
न्हूगु सफू प्रकाशनयात सुभाय् !	- पूर्ण वैद्य	- (घ)
मन्तुना	- मथुरा साय्मि	- (ङ)
भिंतुना : बाख्वं च्वमि मनदेवीयात	- हितकरवीरसिंह कंसकार	- (छ)
बाख्वं च्वमि मनदेवी .....	- पूर्ण ताम्राकार	- (ज)



### बारखं-धलः

धूप्वः	-	०१
जघन्य अपराध	-	०५
वाः चायेकेमाःगु ख्याच्चः	-	१०
स्याः मचायेकूगु दुघाः	-	१४
निपु तुतां	-	१९
लिसः मवल	-	२४
च्याःगु दिप : ख्वाउँगु खसु	-	२९
विवशतां चिरिबाःगु नुगः	-	३४
जःल्यूने हाकुगु किचः	-	३९
कंखालय् ह्वःगु स्वां	-	४५
आमाइया चान्हय् मिलाया जः	-	५१
विस्थापितया खालु-सवाः	-	५६
चखुंखालं तिकिनंगु खसुकाः	-	६२
त्यपय् दुने खःगु निभाः	-	६६
क्वातुगु प्रतिकार	-	७२
हलिमलि	-	७८
गिजिमिजिगु लिच्चः माइनस-प्लसया स्वापुतिं	-	८३



## धूपवः

बुखँ न्यनेगु ई जूगुलिं जिं एफ. एम. चायेका । एफ. एमय् बुखँ वयाच्चनेधुंकल । छम्ह प्रतिष्ठित व्यक्ति— मन्त्री खः ला, नेता खः ला ? नां वनेधुंकूगुलिं म्हमसिल । व व्यक्ति शायद अर्थविद् हे जुइमाः । वया न्वचु थी थी एफ. एम. लिसा काकां बुखँ बियाच्चन—

“झीगु देशय् थगुने नगुने स्वयाः दुर्गछिं मल्याक्क रेमिट्यान्स (विदेशी दां) दुहां वयाच्चंगु खनेदु । थुकिं यानाः देशयात यक्व हे आर्थिक तिबः दयाच्चन । रेमिट्यान्सया लिधंसा मदुगु जूसा झीगु देय्या आर्थिक अवस्थाय् भुखाय् मब्बइ धाये मफु । दँय्दँसं थथे अझ यक्व रेमिट्यान्स दुत हयेगु कुतः याये .....”

बुखँ न्यने मययाः जिं एफ. एम. दिकाबिया ।

व न्वचू बियाच्चंम्ह व्यक्ति न्ह्याम्ह हे जुइमा, वं थःम्हं थःगु न्हाय् ध्यनाः सर्गः खनाच्चं थें जितः ताल । देय्या नागरिकतय्त चिनीइ बुलाः विष त्वंकाच्चं थें च्वन । काः खं भाः मखनीगु न्वचू बीगु सट्टा थथे— ‘कर्पिनिगु देशय् हिचःति हायेकः वने म्वायेक झीगु देशय् हे बुँज्या तःजिक यानाः चीधं-तःधंगु उद्योगत नीस्वनाः, न्हून्हूगु ज्याझ्वः हयाः रोजगारी अप्वः दयेका यन धाःसा सुं नं जनता मि च्याःगु देशय् ज्या यायेत वनेमाली मखु । फक्व नं थःगु हे देशय् ज्या यानाः नयेगु कुतः याये धकाः न्वचू बीत गथे इमिके न्ह्यपु भ्याः भवा हे मदुगु ? खंसां शंका जुयाच्चंगु खः ला ? विदेशया रोगगारं यानाः गरीब निमुखा जनतात म्वाःम्वाकं मिजलाय् क्वब्वानाच्चंगु इलय्-ब्यलय् वयाच्चंगु बुखँ नं ताः ला मताः ला ? तायाः नं ताखाँय् जुयाच्चन ला ?

व न्वचू बियाच्च्वंम्ह हनेबहःम्ह विशेष मनूयात जि च्वनागु गांया निखा प्यखा छँया म्वाः-प्याखं क्यने मास्तिवल । रेमिट्यान्सया सिरपालं दयेकूगु मंगाः उलाः क्यने मास्तिवल—

बुद्धिबहादुरया छँ । बुद्धिबहादुर न्यागू तगि जक ब्वनातःम्ह, सिँकःमि-ज्या यानाः थःगु जहान-परिवार लहिनाच्च्वंम्ह मनू । जस्तापौया छतँजाःगु वया छँ । तसकं वा वलकि चालिंचां थें लः ज्वइगु । तसकं फय् वःसा छें ल्हानाः फुक्क जहानत छप्पें जुइक सी ला धया थें च्वं । सम्पत्तिया नामं तरकारी सयेकाः नयेगु बुँ छकूचा नं दु । व हे बुँ छकूचा मियाः भ्वाथः जूगु छँ दनेगु बिचाः यात । बुँ मीत गांया सःस्यूपिके न्यनेकने यानाच्च्वन । थ्व खँ विदेशी लजगाःया दलालया न्हाय्पनय् थ्यन । व दलालं बुद्धिबहादुरयात “थथे बांलाःगु सिँकःमि-शीप दुम्ह मनू नं गामय् च्वनाः दुःख सियाच्च्वनेगु ला ? विदेशय् वनाः थ्व हे ज्या याःसा यक्व कमाई दइ । माःगु ग्वहालि जिं यानाबी ।” धकाः बुद्धिबहादुरयात चाकु फ्ययेकल । अगःचा मालां देगःचा लू थें ताल बुद्धिबहादुरयात । दुगु जग्गा छकूचा नं मियाः वःगु दां दलालयात प्वःचिकल । बुद्धिबहादुर लय्लय् तायाः लेबनान ब्वल । दँय्दँसं रेमिट्यान्स दुहां वल, थःगु देशय् । न्यादँया लागि वंम्ह बुद्धिबहादुर स्वदँ दुबलय् छँय् लिहां वइगु खबर न्यनाः जहानपि लय्लय् ताल । कलाः व गांया पासापि वनाः एयरपोर्टय् नापलाः वन । एयरपोर्टय् बुद्धिबहादुरयात खंबलय् फुक्कस्या हंसं थाय् त्वःतल । मेम्ह मनुखं बुद्धिबहादुरया ट्रली घ्वाना हयाच्च्वन । बुद्धिबहादुरया कमिजया लंचा निगलं फुस्लुगु खन । पासापिसं लंचा उलाः स्वल, चुल्यां क्वय् निपां ल्हाः थुत्थागु खन । सिँ चायेगु मेशिन मिलय् यानाच्च्वंबलय् आल्पसं मेशिन चलय् जुयाः निपा ल्हाः नं चात खनिं । थौकन्हय् कलाः याकःचां ज्यामिज्या, छँया भ्वातिज्या यानाः अपाङ्गम्ह भाःतयात लहिना च्वन ।

रेमिट्यान्सया सिरपालं ग्वःफय् हयाब्यूगु जिन्दगी, सुनितादेवीया कँ हाःगु बाखं गामय् फुक्कस्यां खनाच्च्वंगु दु । सुनितादेवी मधेशी समुदायया भौमचा । सुनिता तसकं हे चीमिपि मांबौया म्हेयाय्मचा । इहिपाः याःबलय् माजु-बाःजुपिसं धाक्व दहेज बी मफुगुलिं छँजःपिसं ब्यूगु मानसिक यातना सह याये मफयाः थःछँया ग्वहालिं मलेसिया ब्वल । न्हि-चा मधासे ज्या यानाः छँया लागि दां छ्वया हयाच्च्वन । खुदँति लिपा सुनिता

अशक्त अवस्थाय् थःगु गामय् लिहां वल । थःगु छैय् न्ह्याक्व थाकुसां, नये खंसां मखंसां ह्प्टपुष्टम्ह, ल्यासेम्ह सुनिता, लिहां वःबलय् निभालय् पानातःगु ख्वाखः थें सुखू चिनाः लिहां वल । एयरपोर्ट हे अस्पताल यंकल । डाक्टरतय्सं धाल— “सुनिताया निगलं जलसँ स्यनेधुकल ।”

रेमिट्यान्सया खालु-सवाः कयाच्चम्ह मेम्ह खः— धनबहादुर । निम्ह कायपिन्त इन्जिनीयर बंकेगु म्हगस ज्वनाः दकःमि धनबहादुर कुवेत देशय् वन । दकःमि ज्याय् पोख्तम्ह धनबहादुर कुवेतय् नं थःम्हं सःगु हे ज्या लूगुलिं तसकं लय्ताः । तःदँ वं थःगु देशय् रेमिट्यान्स दुत हयाच्चन । छुं दँ लिपा धनबहादुर आत्पं बेखबर जुल । जहानत लखं लिकाःपि न्यात थें फाताफाता पुल । विदेशी रोजगार एजेन्टपाखें धनबहादुरयात मायेका स्वःबलय् कुवेतया अस्पतालय् सी ला म्वाइ लाया खिपतय् यग्गानाच्चंगु खबर दत । झिन्यातँ च्वय्, मि थें न्याःगु निभालय् ज्या यानाच्चँच्चं हे प्रेसर हाई जुयाः बेहोस जुल हँ । न्ह्यपुइ हि कुनाः कोमाय् वंगुलिं अस्पतालया लासाय् चातावानाच्चंगु खबर न्यनाः जहानपिनिगु नुगलय् छुरां सुइका च्वनेमाल । लखंलख दां फुकाः बल्ल धनबहादुरयात थःगु देशय् हयेफत । ददँ दत धनबहादुर न सी फत, न म्वाये फत ।

रेमिट्यान्स सिरपाः धाकुफय् वःगु सुनबहादुरया बाखं न्यनेबलय् मिखा मप्याइपि मनू हे दइ मखु । सुनबहादुरं मचांनिसँ छपा तुतिं बांलाक मचू । इयातुकुतु ज्या याये मफु । छैय् च्वनाः यायेज्यूगु खिपः निलेगु, प्लास्टिकया मेचचा दयेकेगु, तँय् प्यनेगु ज्या याइगु । वया कलाः बागःलाति जूसां छैखाय् वसः हीगु ज्या यानाः इमि ल्हाःम्हुतु चूलाका च्वन । सरकारी स्कूलय् तयाः म्हयाय्यात एस. एल. सी. जाँच बीकल । थुलि अप्वः ब्वनेफइगु आश इमिसं मखन । थःम्हं कमय् यानाः यक्व ब्वनेगु, मांबौयात दां नं छ्वयाहयेगु म्हगस खनाः म्हयाय्म्ह गामय् च्वने हे मफत । छकूचा छै दुगु नं बन्हः तयाः साउदी अरब बल । प्यदँ न्यादँतक हे मांबौयात दां छ्वया हयाच्चन । आकाझाकां म्हयाय् लिहां वइगु खबर दत । दं दं बायाच्चम्ह म्हयाय् लिहां वइगु खँ न्यनाः मांबौ लय्ताइगु ला स्वाभाविक हे जुल । बुराबुरि, उकिसनं छुं मस्यूपि मांबौयात छिकपि एयरपोर्ट वये म्वाः, जि थः हे वये धकाः फोनं धाःगुलिं मांबौ निम्हं छैय् हे च्वनाः म्हयाय्या लँ स्वयाच्चन । छैक्वय् द्याक्सी दिक्गु सः वयेसाथ मांबौ निम्हं लँ छपुं छपलाः याये थें ब्वां वनाः द्याक्सीइ खापा

चायेकाः म्हयाय्यात पित काल । द्याक्सी म्हयाय् पित कायेवं मांबो  
निम्हं इपाथिपां मदयाः बैय् थचक्क हे फ्यतुल । म्हयाय् ला थौकन्हय् हे  
मचा बुइगु अवस्था जुयाः लिहां वःगु जुयाच्चन । मांबौनं बाप्यय् नयाः  
म्हयाय्यात छप्यय् नकाः ब्वलंकातःम्ह म्हयाय्यात ज्या ब्यूम्ह कम्पनी  
मालिकया करतूतं यानाः म्हयाय् नर्कय् कुतुं वन । बुराबुरितय्सं थथम्हं  
थःथःगु कपाः दाल, दांया लागि म्हयाय् बन्हः तयेके छ्वया थें ताल ।

रेमिट्यान्सया ग्यानापुगु धुप्वलं यानाः मिखा कने मफयेक, सासः  
ल्हाये थाकुक् म्वानाच्चं पि भुयूचा कुमाःया जहानपि नं खः । फोनया  
सः तायेदतकि जहानपिनि म्वानासू हे गन वं गन वं जुइगु । मानौ  
इमिगु छैय् यमराजया दूत हे दुहां वः थें च्वनीगु । लजगाःया लागि  
इजिप्ट थ्यम्ह भुयूचाया लजगाः इजिप्टया मरूभूमिइ सलंसः फै, दुगु,  
च्वलय्चा ज्वये यंकेगु खः । छन्हु छथ्वः गुन्डात वयाः फै, दुगु,  
च्वलय्चात यंकेत्यंबलय् त्वापु जुयाः छम्ह गुन्डा सित । भुयूचायात  
ज्वनायंकल । बांलाक भाय् ल्हाये मसःगुलिं छु जूगु खः अदालतय् धाये  
मफत । मालिकया लागि इमानदारीपूर्वक गुन्डातनाप त्वाःम्ह भुयूचा  
ज्यानमारा जुल । अदालतं वयात यख्खानाः स्यायेगु सजाय न्यंकल ।  
सीम्ह गुन्डाया जहानतय्त न्यय्गू लाख दां ब्लड-मनी पुलेफुसा ज्यान  
सजाय लित कायेफइगु इमिगु कानून जुयाच्चन । भुयूचा व वया  
परिवारया लागि उलिमछि दां मुनेगु धयागु आकाशय् च्वंगु नगुत  
मुनाकाये थें जक खः । भुयूचित म्वाकेफइगु लँपु दयाः नं म्वाके  
मफइगु जुल । कलाःम्ह ला उँइ हे जुल । न्ह्याम्ह मिजं न्हयःने खंसां  
भुयूचा लिहां वल धकाः घय्सू वनेत स्वइगु ।

निगू प्यंगू गामय् ला सैस्वै हायेकीगु थुलिमछि म्वाः प्याखं बाखं  
दु धाःसा देशय् दक्व गामय् वालास्वत धाःसा थन्याःगु असंख्य  
बाखं-प्याखं अवश्य दइ । हिचःति हायेकाः देशय् रेमिट्यान्स यक्व दुत  
हःपि मनूतयगु जिन्दगीइ वाफय्, ग्वःफय्, धाकुफय् तक नं वयाच्चंगु  
आधिकारिक ओहोदाय् च्वं पि प्रतिष्ठित व्यक्तिपिसं खँ हे मखं । इमिसं  
ला विदेशी दां (रेमिट्यान्स) या सिरपाः, देय्या आर्थिक समृद्धिया  
तिबः प्याखं हुलाच्चंगु जक खनाच्चन ।

\*

ने.सं. ११४० थिलागाः ६

## जघन्य अपराध

यल रिगरोड पारीनिसें यैयथ्यक निगः बस हिलाः अफिस वनेमाःपि कलाः-भाःत रत्नमान व रमोला । निम्हेसिया निपा तुति थे न्ह्याबलें नापनापं अफिस वनेगु व वयेगु उमिगु न्हिज्या । काय्-म्हयाय्पि निम्हं छगू हे स्कूलय्, छगः हे बसं छैथ्यंक काःवइगु, तःवइगु जूगुलिं उमि नुगः याउँसे च्वं । छन्हु रत्नमानयात त्यानुयाः म्ह उसाँय् मदु थे च्वंगुलिं अफिसय् बिदा काल । रमोला मं मदयेक हे याकःचा अफिस वन ।

न्हिछिलाछिं त्यानुगु लंकाः मस्त वइगु इलय् रत्नमानं फुक्कसित बजि ज्वरय् यात । मस्त स्कूलं लिहां वःसां न्ह्याबलें थे बजि नयेत मांयात पियाच्चन । खुताःत्या ई जुलं नं रमोला थ्यंकः मवःगुलिं बस जाम जुयाः इलय् मथ्यंगु जुइ धकाः फुक्कसियां बजि नल । रमोलायात अःपुकेत रत्नमानं हे ब्यलि नं बुकल ।

बहनिइ च्याताः ई जुल । बुलुहुं गुताः ई नं जुल, रमोला थ्यंकः मवः । न्ह्याक्व फोन याःसां फोन मल्हवं । फोन वःगु मताःगु खः ला धकाः मिस-कल मात्तुमाल । फोन वयाच्चंगु खने मदु । थःथिति, पासापिथाय् फोन यानाः न्यन । तर फुक्कसितं गं थाये थे जक जुल । अफिसय् सुनानं फोन मल्हवं । अफिसया हाकिमयात फोन यात । अफिसया ज्या भतिचा ल्यं दनिगुलिं घौछिति लिबाःगु खःसां नं इलय् हे लिहां वःगु सुचं दत । थुलि लिबाक्क छैय् मथ्यंगुलिं हाकिम नं अजू चाल । उखें थुखें फोन यायां झिताः ई नं जुल । निम्ह मस्त मां मथ्यंगुलिं सुकुसुकु ख्वयाहल । रत्नमान मिं पूम्ह थे वाथावाथा कनाः

चवने मफुत । रत्नमान छैय् जक पियाचवने मफुत । मस्त निम्हेसितं  
जःलाखःलापिनिगु छैय् तयाः रत्नमान पिहां वल ।

निम्ह स्वम्ह पासापि बनाः बस-स्टपथ्यंक लँ स्वःवन । लँय् मनू  
छम्ह हे जू मदयेधुंकल । झिंछताः ई नं जुइधुंकल । चान्हय् चाःचाः  
हुलाः ड्यूटी यानाच्चपिं स्वम्ह प्यम्ह पुलिसत नापलात । रत्नमानं  
हथासं उमिके न्यन— “छिकपिसं याकःबुकः मिसाम्ह वयाच्चंगु खं ला ?  
थौं गनं नं एक्सिडेन्ट जूगु छिकपिसं स्यू ला ? अफिसं लिहां वःम्ह  
जिमि जहान आःतक छैय् लिमथ्यनि ।”

रत्नमानया खँ न्यनाः स्वम्ह पुलिसतमध्ये छम्ह पुलिसं ख्याः याये  
थें लिसः बिल— “चान्हय् लिहां मवःम्ह कलाः गन वन जुइ ? छिमिसं  
हे बिचाः या । थौं मवःसा कन्हय् ला लिहां व हे वइ जुइ ।”

मेम्ह पुलिसं खिसि यानाः धाल— “छिमि कलाः तसकं बांलाः  
लाकि छु ?”

मेम्ह स्वम्हम्ह पुलिसं लिसः बिल— “कलाः तंगु खँ पुलिस थानाय्  
वनाः रिपोर्ट चकः हुँ ।”

शान्ति सुरक्षाया लागि चान्हय् ड्यूटी यानाच्चना धकाः लोकाचारया  
ख्याःपाः पुनाः लँय् चाःहिलाच्चपिं पुलिसतयगु विवेकहीन व उच्छृङ्खल  
लिसः न्यनाः रत्नमान व पासापि लाता थें जुल । उपिनाप न्ह्यसः—  
लिसः यायेगु ध्याचल्य् अप्पां कयेकेगु थें जुइ, गधायत पुराण न्यंके थें  
जुइ धकाः, तं पिहां वःसां वाक्कु छिनाः उपि पुलिस थानाय् वनाः  
रमोला मालेत ग्वहालि पव्वन ।

“पुलिसत दक्क थाय्थासय् चान्हसिया ड्यूटी यायेत पिहां वनेधुंकल,  
आःयात छिमिसं रिपोर्ट चका हुँ, कन्हय्निसें जिमिसं रमोला मालेगु  
ज्या न्ह्याके ।”— थानाय् च्वपिं पुलिसतयगु भुस्यःगु लिसः न्यनाः  
रत्नमान व पासापिन्त पुलिसतयगु विश्वास मदुगु जक मखु, पुलिसया  
नामय् घृणा हे जुल । थज्याःपि निम्ह प्यम्ह कुलांगार पुलिसतय्सं  
यानाः भिपि पुलिसतयगु इमानदारीताय् नं हाखः कीगु खन ।

रमोला मालेगु ज्याय् पुलिसतयगु छुं नं ग्वहालि मदुगुलिं रत्नमानपिसं  
छैय् लिहां वनेगु बाहेक मेगु लँ मखन । अथेसां छैय् लिहां वनाच्चपिं



उमिसं थःथःगु मोबाइलया टर्च च्याकाः कुंकुलामय्, पःखाःक्वय्, कंझालय् रमोलायात मात्तुमालाः वन । रत्नमानयात रमोलां उखें सःती ला थुखें सःती ला धया थें न्हाय्पं तित्तिं स्वानाच्चन । रमोलाया ख्वाः न्हयःने न्हयःने चाःहिलाच्चं थें जुल । रत्नमानयात हर्ट आटाय्क जुइत्यंम्ह थें सासः ल्हाये थाकुया वःगु पासापिसं वाः चायेकाच्चन । न्व-नि मवासे फुक्कसियां मुलु माले थें रमोलायात मामां वन ।

मतया जलं, न्हाय्कं-झालय् छुं तक्यनाच्चंगु उमिसं खन । कंझाःया लिक्क वनाः क्वथीक स्वःवन । न्हाय्कं-झालय् तक्यनाच्चंगु वस्तु लिक्कयाः स्वल, रमोलाया बाय्ग रत्नमानं बांलाक हे म्हसिल । रमोलाया बाय्ग लुसैलि रमोला नं उखेंथुखें छु जुयाच्चन जुइ धकाः उमिसं निश्चित यानाः अझ क्वथीक मालावन । लैय् कंझालय्, पःखाःक्वय् छुं हे मखंगुलिं उपिं पःखाः पुलाः कःनिब्वय् स्वःवन । छमा छमा कःनिमा चीकाः मामां वंबलय् रमोलां अफिस वनेत पुनावंगु वसः, लाकां उखेंथुखें हवलातःगु उमिसं खन । फुक्कसिगु ल्हाः-तुति याताप्याता वन । कथु गनावल । सुयां न्ववायेत सः पिहां मवल । वं वयागु वं वयागु ख्वाः स्वयाच्चन । वाक्कु छिनाः नुगः चिनाच्चंम्ह रत्नमानया सह यायेगु शक्ति हे मन्त । रमोलाया सामानत घय्सुनाः मां तंम्ह मचा थें बैय् ग्वाराग्वारा तुलाः ह्वाँय् ह्वाँय् ख्वल, सर्गः हे थ्वक्क । उमिगु हाऽहू व ख्वःसलं लैय् लिक्क च्वंगु छैया मनूत नं पिहां वल ।

दक्व फुक्क मनूतय् ग्वहालिं मात्तुमाला स्वलं नं रमोलायात लुइके मफु । छथाय् कःनिमा लिनाः द्वं मुनातःगु खनेदत । ली हे मत्यःनिगु कःनिमा लिनाः छाय् द्वं मुनातल जुइ धकाः फुक्कसित शंका वन । द्वं मुनातःगु कःनिमा चीकास्वःबलय् रमोलाया नांगागु म्ह अचेत जुयाः क्वपुसां पुयाच्चंगु खन । मनूतय्सं कमिज, ज्याकेट त्वःताः रमोलाया म्हय् भुकल । एम्बुलेन्सयात सःताः पियाच्चने मलात । सत्तिक च्वंगु छें मनुखं गाडी हल । फुक्कस्यां लःलः यानाः गाडीइ तल । अस्पतालय् ब्वाकल । भाग्यं सासः छम्हू ला दनि खनि । अस्पतालया मत-जलय् रमोलाया म्ह खंबलय् फुक्क मनूत छकः मू हाल । त्वःधुलाच्चंगु वयागु ल्हाः-तुति, थाय्थासय् प्वः थाःगु वयागु छयं । न्यतालय्, म्हुतुइ, लप्पाय्,

नुगःपाय् वँचुसे च्वनाः पतिबां यत्थे सीदु । घाःपाः मदुगु छकूचा हे थाय् मदु रमोलाया म्हय् । जाँच याये सिधयेकाः डाक्टर-नर्सतय्सं धाल— “थ्व सामूहिक बलात्कार खः ।”

च्यान्हु झिन्हु लिपा रमोलाया होस वल । पुलिस व हनेबहःपि गण्यमान्य मनुतय्सं जसकनि जुयाः रमोलायात भुतुभुनाः इतःमितः कंक न्ह्यसः तयाच्चन । रमोला ख्वाः त्वपुयाः ख्वयाच्चन । सुयातं छुं लिसः मब्यू । थी थी न्ह्यसःया लिसः बीमाःबलय् रमोला हानं छकः सिना थें मछाल । घालय् चि-मल्ता ह्वले थें जुल ।

“यदि छुं लिसः मबिल धाःसा, जूजूगु खँ मकन धाःसा पुलिसतय्सं नं ग्वहालि याये फइ मखु व जघन्य अपराधीतय्त ज्वनेत ।”— पुलिस व गण्यमान्य मनुतय्सं ख्याच्चः बिल ।

व पापी अपराधीतय्त सजाय बीकेमाःगु बाध्यतां यानाः रमोलां लज्या चायापुगु घटना मकँसैं मजिल । रमोलां सुयागुं ख्वाः मस्वसे छ्यं क्वछुकाः थःत जूगु जघन्य अपराधया गतिविधि छसीकथं कनाहल—

“अफिसय् ज्या यायां ल्हाः दीमज्यूगुलिं जि अफिसं पिहां वयागु छघौत्याति लिबात । लिबाःगुलिं बसय् च्वने तसकं थाकुल । बहनिया बसय् कोच्चय् जुजुं बस-स्टपय् कुहां वया । छँय् फोन यायेत मोबाइल चायेकाबलय् चार्ज फुनाच्चन । फोन कन्ट्याक्ट मजुल । शायद अपराधीत नं बसं कुहां वःगु थें च्वं । लँय् वनाच्चनाबलय् व मनुत जिगु ल्यूल्यू वयाच्चं थें ताल । लँय् शून्य, न्ह्यः-ल्यू सुं हे मदु । नुगः भाराभारा मिन । हानं छकः फोन यायेगु कुतः यानाच्चनाबलय् आकाझाकां ल्यूनै जितः गलबन्दी खः ला कापतं खः ला, छु खः धयागु वाः चायेके मलावं जिगु मिखा चिनाः लुचुकक बुयाः यंकल । ‘ग्वहालि ग्वहालि’ धकाः जि हालाबलय् म्हुतुइ नं कापतं चित । अन्दाजं जितः उमिसं बुँया फाँटय् यंकूगु थें च्वं । घाँय् दुथाय् जितः बस्वात । जि फक्क नं सनाः दनेत स्वया । उमिसं च्याथु झिथुति दाल । सँ ज्वनाः छयं बैय् न्याकल । जि सने हे मफुत । अय्नं छम्हेस्यां जिगु ल्हाः, मेम्हेस्यां जिगु तुति क्वातुकक ज्वनाः निम्हेस्यां पुनातयागु जिगु वसः झ्याराझिरि खुनाः उपि इतिइति न्हिल । पालंपाः उमिसं जिगु म्हय् न्ह्यातले गथे

न्ह्याः अथे यानाः प्याःचाः लंकाच्चन । म्वाःम्वाकं छुँचित क्वःतयसं  
चिचि त्याये थें चिचि त्यात । जिं छुं हे मचायावन ।" खँ कनाच्चंम्ह  
रमोला हानं छकः बनावं थें जुल । नर्स काचाक्क लः त्वंकल ।

"जिमिसं व जघन्य अपराधीतयत् फक्क नं याकनं ज्वनाः कारवाही  
याये ।"— पुलिसतय्सं रमोलायात लिधंसा बिल । फुक्क मनूत लिहां  
वन । रमोलायात छैय् लित छवल ।

छैय् दुहां वसानिसें जःलाखःला, त्वाःबहाःयापि, थःथितिपि फुक्क  
उसाँय् न्यनेगु त्वहः चिनाः न्हियान्हिथं वयाच्चन । 'गथे जूगु ? गन  
जूगु ? गुबायती जूगु ? ग्वःम्ह दु ?'— सुकुभ्तुयात न्वाकां थें लिसा  
काकां न्हयसः तयाच्चन ।

स्कूल वंपि मस्तयत् नं व हे न्हयसलं छयं धस्वाके मबिल ।  
रत्नमान ला पिहां वने हे ज्यूगु मखु, व हे खँ कुत्तुकुलाः घालय् तित्तु  
तियाबीगु जुल ।

रमोलाया अस्मिता जक न्हंगु मखु, परिवारया हे समाजय् बेइज्जत  
जूगुलिं 'जि म्वाये मयल, जि सिनावने' धकाः रमोला न्हिछिं ख्वयाच्चंगु  
खनाः रत्नमानं ह्ययेका च्वन— "बलात्कार जूगु छंगु द्वं मखु, द्वं ला व  
अक्षम्य पापी नरपिशाचतय्गु खः । सीमाःम्ह छ मखु, सीमाःपि उपि  
नरपशुत खः । तर छु याये, हारापि खनाः द्यः हे ग्याः धाइ । उमित  
सुनानं सजाय बी फइ कि मफइ स्वयेमानि । छ ला सिनाः म्वानाच्चन ।  
छन्त उमिसं सि हे सित धकाः कःनिमां त्वपुयाथकूगु खः । थ्व छगू  
ग्यानापुगु दुर्घटना जूगु, बांमलाःगु म्हगस खंगु धकाः भाःपियाः ल्वःमंकेगु  
कुतः या रमोला । थ्व समाजं तापाक्क झीत सुनानं म्हमस्यूगु थासय्  
वनाः झीगु न्हूगु जिन्दगी हनेगु कुतः याये ।"— रमोलायात ह्ययेकाच्चंम्ह  
रत्नमान नं मख्वसे च्वनेफुगु ला ख हे मखु । न्यतालय् ख्वबिया  
खुसिचा न्हयानाच्चन ।

\*

ने.सं. ११३९ दिल्लीगाः ७

## वाः चायेकेमाःगु रव्याच्चः

‘मौसम गडबड जुयाः यूएई वइगु जहाज निघौ लिपा लाइगु जुल ।— एराइभल बोर्डय् वःगु सुचं खनाः अन्तर्राष्ट्रिय विमानस्थलया आगमन-कक्षय् पियाच्चंपि मनूतय्सं आयबुयाः हाइ हाइ, वाक्काः तल । ददँतक नाप मलाःपिं मनूत नापलाइगुलिं लय्ता-ख्वालय् न्हिलासू इलावःपिं मनूत म्वः म्वः खनेदुसा विदेशी रोजगारं त्वाकलय् तयाः त्यात्या यानाः लित छ्वयाहःपिं, स्याःनुगः घानाः लिहांवःपिं मनूतय्गु ख्वाः स्वये हथाय्चाःपिं मनूत नं म्हो मजू । मोहनकाजी व वया कलाः नं मिं पूगु नुगः ज्वनाः आगमन-कक्षय् इरुथिरु जुयाच्चन ।

मोहनकाजीया याकःकेहँ विष्णुमायायात विदेशी रोजगारया लागि विदेशय् वने मते धकाः गंकगंक हे खँ मन्यँसें स्वदँया लागि ला खः नि धकाः विदेशय् ज्या याकेत यंकीपिं दलालतय्गु चाकुगु-माकुगु खँ न्यनाः अरब देशय् ब्वल । स्वदँ धाःथाय् न्यादँ लिपा थौं लिहां वइगु जूसां नं उमिगु नुगलय् कँथं सुत्तु सुयाच्चन, छु अवस्थाय् लिहां वल धकाः । नये-त्वनेया प्याःचाः तंकाः बेञ्चय् फ्तुनाच्चंपिं उपि कलाः-भाःत निम्हं थःथःगु बिचालय् दुबिनाच्चन ।

मोहनकाजीया मिखाय् याकःकेहँया ख्वाः न्ह्यःने न्ह्यःने लुयावः थें जुल । नुगः हे तज्याइ थें च्वंक हिहि लनाः ख्वाः फोन याःगु सलं न्हाय्पं थ्वल- ‘दाइ, जिं पलाः द्वंके ला धुन । ब्वनाहःम्ह दलालं होटलय् बांलाःगु ज्याय् तयाबी धकाः जितः छँया भ्वातिं ज्याय् तयाबिल । छखा छँया भ्वातिं मखु निखा छँया भ्वातिं जुयाच्चनेमाल । निखा छँया मालिकनीतय्सं दामासाहीं दां पुलाः जितः दलालयाके न्यानायंकूगु जुयाच्चन । बहनिइ लिबाक्कतक ज्या सनेमाः । ज्या सिमधल धाःसा

ज्या सिमधःगु छँया मालिकनीनं लुत्तुलुयाः दायाः कसा याइगु । प्वाः जायेक नये-त्वने नं बीगु मखु । बांलाक ज्या मयात धाःसा छन्त मिजंतयथाय् छ्वयाबी धकाः ख्याच्चः बीगु । थ्व मुस्मां-देशय् न्ह्यागुं यायेफु । दाइ, गुबलय् स्वदँ दइ ? जि याकनं वये मास्तिवल । सुनानं फोन लाकाकाल थें च्वं, फोन दित । मोहनकाजी झसंग वनाः घडी स्वल । मोहनकाजीयात घडी हे मसं ला धया थें च्वन ।

आः स्वदँ फुत, केहँचा वइगु खँ न्यनेदइ ला धकाः मोहनकाजीया नुगलय् आशाया मुख् चिन । स्वदँ लिपा मनू वइगु खँ न्यनेदइगु गन गन ? फोन तक नं मवः । न्यादँ दतं नं केहँचिगु थाःगाः न्यने मदु । सित ला म्वात ला छुं बुखँ मदु । व निखा छँया मालिकनीतय्सं जकं छुं यात ला धकाः लुमना वलकि थःगु म्हाय् सुनानं कास्तिकं छाकाब्यूगु थें च्वंक वाथावाथा कनीगु । दलालयाथाय् वनाः न्यवंसा फुक्कं पाय्छि जुयाच्चंगु दु धकाः लिसः न्यनेबलय् भतिचा नुगलय् पावासः पाये थें याउँसे च्वनीगु ।

न्यान्हु खुन्हु न्हयः ओमानय् च्वंगु नेपाली दूतावासं फोन वल— 'छिकपिनि केहँ विष्णुमाया ..... न्हिल्याखय् नेपाः वइगु जुल । एयरपोर्टय् कायेत झासँ ।'

दूतावासं वःगु फोन न्यनाः मोहनकाजीयात झन हे पिर जुल । दूतावासया अधिकृततय्सं छाय् फोन याःगु ? केहँचां हे छाय् फोन मयाःगु ? नुगलय् ग्यानापुगु न्हयसलं वाल्लइल्ल मिंकाच्वन । मोहनकाजीया मिखां सल्लल ख्वबि बाःवल ।

मनूतय्गु हाडहू अप्वः तायेदत । विमान थ्यंगु जुल ।

विमान दिकेधुंकुसैलि मनूत न्ह्याःगु खनेदत । पिहां वःलिसे थःथः मनूत घय्घय् पुनाः थःगु लँ लित । मोहनकाजी नं केहँयात खंकेत मिखां छम्ह छम्ह मनूतय्त तुंक तुंक स्वयाच्वन । स्वःस्वःपि, खंखंपि मनूत फुक्क मेपिनि मनूत । सामान कायेथाय् अलमल जुयाच्वन जुइ धकाः थःथम्हं नुगः चित । थ्वः थ्वः मनूत वयाच्वन, तर मोहनकाजीया केहँ खने मदु । मोहनकाजी मन्यँसे च्वने मफुत । ट्रली घ्वाघ्वां वयाच्चंम्ह मनूयाके न्यन— "दुने यक्व हे म्वः म्वः जुयाच्वन कि छु ? जिमि मनू वःगु खने मदु ।"

“म्वः म्वः म्दु, निम्ह स्वम्ह हे जक मनूत दनि”— लिसः बियाः व मनू थःगु लँ लित ।

‘वयाच्चन जुइ’ धकाः मोहनकाजी थःत थम्ह लिसः बिल ।

ताउत लिपा व निम्ह स्वम्ह मनूत नं धिकिहि वयाच्चंगु खनेदत । तर केहँचा वःगु खने म्दु । व स्वम्ह मनूतमध्ये छम्हेस्यां मोहनकाजीयात ‘नमस्ते अंकल’ धकाः न्वात । मोहनकाजीया भचा सासः थहां वल ।

‘विष्णुमाया पिहां वयेत छाया लिबाःगु ?’ धकाः न्हयसः तयेन्हयः व मिजंयात मोहनकाजीया नुगःखँ थुइकेत ताउत म्वाःल । मिजंम्ह, मोहनकाजी व वया कलाः स्वम्हं बेज्यय् इवःलाक्क प्यतुल । विष्णुमाया मवःगु कँ हाःगु बाखं न्हयथन— “विष्णुमाया, जि व मेमेपि च्याम्ह झिम्ह मनूतय्त दिल्लीया लँ जुकाः संयुक्त अरब इमिरेट्स देशय् विदेशी रोजगार एजेन्सीया मनूतय्सं ब्नायंकूगु खः । सरकारी अफिस श्रम विभागया स्वीकृति मदयेकं विदेशी रोजगारया लागि मनूत यंकेमालकि थथे अवैध तरीकां यंकीगु खः । जिपि फुक्कसित संयुक्त अरब इमिरेट्सया अजमान धाःगु थासय् छकू क्वाथाय् तल । बहनिइ हे जिमित थःथःगु ज्याय् यंकीपि मनूत नापलाका बिल । उमिगु जिम्माय् पासपोर्ट नं बियाछवल । विदेशी रोजगारी एजेन्सीया मनूतय्सं जिमित होटल, रेस्टुराँ, निर्माण-ज्याय्, वसः सुइगु, लाकां दयेकेगु कारखानाय् ज्याय् तयेगु धकाः यंकूगु खः, तर अज्याःगु ज्याय् सुयातं मतः । मिजंतय्त सतक दयेकेगु, ट्रक ड्राइभरया ज्या, वस्तुत ज्वः वनेगु ज्याय् तयाबिल । अरेबियनतय्सं याये मफुगु ज्याय् मेथाय् देशं वःपिन्त घ्वंघ्वं स्याक्क ज्या याकीगु । मिसापिन्त अप्वः यानाः छँज्याय् छ्यलेत यंकीगु जुयाच्चन । विष्णुमायायात नं ओमानी मिसां दां पुलाः यंकल । व थाय् ला मनूत न्याये-मीगु थाय् जुयाच्चन । अनं लिपा जिमिसं विष्णुमायायात नाप मलाः ।”

कण्ठ वःगु पाठ गुरुयात खररर न्यंके थें, टेपरिकर्डर चायेके थें मोहनकाजी छुं हे न्यने म्वायेक व मिजनं भतिचा हे मपिसे खँ कनाच्चन— “छवयाच्चंगु मि थें तांन्वःगु थासय् ज्या याये हे मफयाः जि व जिमि पासापि थःगु देशय् लिहां वनेत ग्वहालि कायेत अन देशया दूतावासय् वना । अन दूतावासय् विष्णुमायायात नापलात । जिपि नापलायेवं थः-छँया दाजुकिजापिन्त थें कसिक्क घय्पुनाः खःगु दिके हे थाकुल ।

ताउत ख्वयेधुंकाः विष्णुमायां छँया निम्ह मालिकनीतय्सं अत्याचारनकसां कसा याःगु सह याये मफयाः चान्हय् हे म्हयाम्हछिं बिस्युं वयागु खँ कन । चान्हय् न्यासि जक वयाः सललाह धयागु थासं मस्कट धाःगु थासय् च्वंगु नेपाली दूतावासय् शरण काःवःगु जुयाच्चन ।' ..... विष्णुमायां अत्याचारनकसां हे कसा नयाच्च्वंगु खँ सीकाः नेपाली राजदूतं अनया छम्ह म्हस्यूम्हेसित दां खर्च याकाः नेपाः छ्वयेगु क्वःछित । नेपाः वये छन्हुन्हयः थ्व खँ सीकाः ओमानी मिसा, छँया मालिकनी दूतावासय् वयाः लसिं थें तिति न्ह्याः ल्वाःवल— 'व खद्यामा (इमिगु भासं भ्वाति)यात वया देशय् लित छ्वये दइ मखु । वयात जिं निद्वः रियाल पुलाः न्यानागु खः, पत्याः मजूसा जिके बिल दु । जिगु दां मपूतले व खद्यामा जिगु हे हकया जुइ ।' ..... विष्णुमायायात व मिसां लप्पु ज्वनाः सात्तु साल । खल्ती लिकयाः निद्वः रियाल, झीगु थ्यंमथ्यं न्यागू लख दांया बिल राजदूतया टेबुलय् बस्वात । 'थन शरणय् वःपिन्त लित छ्वये मज्यू राजदूतया लिसलं गः कीधुंकाः नं हि त्वने मखंम्ह लसिं थें हिहि चायाः पतिं धस्वाकाः ततःग्वःगु मिखा कनाः धाल— 'छिमिसं वयात गथे यानाः वया देशय् लित छ्वइ स्वये का । वयागु राहदानी नं जिके दु । यदि वयात जिथाय् लित छ्वया महल धाःसा जिगु सम्पत्ति खुयाः बिस्युं वंगु धकाः मुद्दा तयाबी ।' ..... ओमानी मिसा लिहां वन, तर राजदूत व आधिकारिक मनूतय्सं छुं हे न्ववाये मफत । धात्थे व ओमानी मिसां खुँया मुद्दा तल धाःसा विष्णुमाया नेपाः वये फइ ला मफइ ला धाये मफु ।"

व मिज्या खँ न्यनाच्च्वंम्ह मोहनकाजी गुबलय् बनावन वाः चायेके मफुत । फ्यतुनाच्च्वंगु बेज्चं बैय् धेचुया वन । कलाःम्हं काचाक्क ज्वन, मखुसा बेज्चं कुतुं वन जुइ । यक्व मनूत मुन । सुनां सःताः मस्यु, एम्बुलेन्स थ्यंकःवल । फुक्कस्यां लःलः यानाः मोहनकाजीयात एम्बुलेन्सय् तल । भ्वांप्वां भ्वांप्वां यायां एम्बुलेन्सं इपांथिपां मदयेक मोहनकाजीयात अस्पताल ब्वाकल । एम्बुलेन्सया तिस्सलं विदेशी दांया लोभं विदेशी रोजगारय् वनीपिन्त ख्याच्चः बियाच्चं थें च्वं । तर व ख्याच्चःयात वाः चायेकीपि सुं म्दु ।

\*

ने.सं. ११३९ दिल्लाथ्वः १४

## स्याः मचायेकूगु दुघाः

‘मनूया जन्मनाप कर्मद्यः नं थःम्हं हे ज्वनावइ’ ज्याथ-जिथिपिनिगु  
धापू फुकस्यां पत्याः मयाःसां सुचित्रायात पत्याः जुइमाःगु दु । सह  
याये थाकुगु दुघाःयात स्याः मचायेकेमाःगु दु ।

बनेज्या क्वचायेकाः जक इहिपाः यायेगु दृढ संकल्प यायां सुचित्रां  
डिप्लोमा क्वचायेकल । थुगुसी वया जिदी मांबौया न्ह्यःने क्वातु मजुल ।  
डिप्लोमा सिधयेवं उमिगु छैय् लमित दुहां-पिहां जुयातुं च्वन ।

बनेज्याय् जक क्वसाःम्ह सुचित्रा ल्यासे जूसां समाः यानाः  
बांलाके मसःम्ह । न्हू-फेशनय् मिखा तये म्हाःम्ह । मिजं थें यान्तांग  
तःधी जुयाः छॉटकाँट मदुम्ह मिसामचा जूगुलिं सुचित्राया किपा ज्वनाः  
लिहां वःपि लमितसें हानं लिफः मस्वः, वांछ्वयातःगु अप्पा थें । थ्व खं  
संगू पूछि हे मपाः सुचित्रायात । तर मांबौया नुगलय् धिमेबाजं थानाच्चन ।  
सुचित्राया किपा क्यनेगु ज्याखँ तालय् महंगुलिं सुचित्राया मांबौपिन्त  
लमितयगु विश्वास नं मदयावन ।

छन्हु सुचित्राया बौया मिलय् जूम्ह पासा तुल्सीमान मिजंमचा ब्नाः  
इहिपाःया खँ छुइत छैय् वल । फुककसिगु सहलहकथं इहिपाः याइपि मिसा  
व मिजंयात हे खँल्हाबल्हा याकेगु क्वःछित । सुचित्रायात क्वथाय् सःतल ।  
छुं समाः मयासे, गथे छैय् च्वनाच्चंगु खः अथे हे क्वथाय् दुहां वल ।

“छिकपिं खँल्हाबल्हा यानादिसँ !”— निम्हेसितं क्वथाय् तयाः  
फुककं पिहां वन ।

मिजं स्वयेबलय् सोझा-सीधा जुयाः नं मन्ह्याःगु खुसि थें गम्भीर  
खनेदु । तसकं गंसि जुयाः मिजंया फुँइफाँय् खने मदु । निम्हेसियां



निम्हेसित पुलुक स्वत । वास्याक्क न्हिल । निम्ह मौन । सुचित्रायात छु  
याये छु याये जुल । गांयाम्ह मिजं जूगुलिं न्हापां खँ न्ह्यथने मछाःगु खः  
ला धया थें सुचित्रायात ताल । छ्याकाछिकि मिजासम्ह सुचित्रां हे न्हापां  
थःगु म्हसीका न्ह्यथन— “जिगु नां सुचित्रा । एम.बि.ए. बने क्वचायेकाः  
जक इहिपाः यायेगु जिगु बिचाः । तर मांबौया इच्छाया न्ह्यःने .....

मिजम्हेसिया नवायेगु हौसला वल थें च्वं, सुचित्रायागु खँयात  
त्वाःथलाः लिसः बिल— “जिगु नां सुभाष । छिगुबारे जिं फुकक न्यनेधुन ।  
छितः छुं न्ह्यसः तयेगु मदु । इहिपाः यायेत जितः नं हथाय् मजू ।  
जागीरया पंगलं यानाः जिं नं मास्टर तगिं सिधयेके मफयाच्चन । छिगु  
बिचाःकथं बने क्वचायेकाः जक इहिपाःया खँ क्वःछीगु जुल । आःयात  
झी पासा जक जुयाच्चने । पासाया स्वापू क्वातुया वन धाःसा जिं  
मकँसें मगाःगु छतानिता खँ लिपा हे जक न्ह्यथने ।”

“खँल्हाबल्हा सिधल मखा !”— मांबौपि फुकक क्वथाय् दुहां वल ।  
सुचित्रा व सुभाषया खाः चकंगुलिं सकस्यां मिखाय् तिमिला त्वल ।  
मांबौया म्ह कपाय् थें याउँसे च्वन । भ्वासिपहः भ्याः भचा हे खने मदुगु  
सुभाषया खँल्हाबल्हां सुचित्राया नुगलय् मुलुं तिवक तिवक सू थें च्वन ।

निला प्यला लिपा । सुचित्रा एम.बि.ए. क्लासय् ब्वनाच्चंबलय्  
'एक्सक्यूज मी सर !' धयाः सुभाष नं क्लासय् दुहां वल । सुचित्रायात  
म्हगस थें ताल । सुचित्रा सुभाषयात अजुगति चाःगु मिखां स्वयाः  
न्हिल । वकुन्हुनिसें उपि क्याम्पसय् वये-वनेगु लँपु व ई छगू हे जुल ।  
बुलुहुं, क्याम्पस वने म्वाःगु दिनय् नं उपि नाप मलासे च्वने मफुत ।  
मांबौया इच्छाविपरीत मखुगुलिं लँपख्याः सुं मदु ।

छन्हु, न्ह्याबलें थें निम्ह क्याम्पसं लिहां वयाच्चंबलय् भौचां लँ  
त्वाःल्हाये थें सुचित्राया मिलय् जूम्ह पासा नीलम लँय् ध्वदुकक  
नापलात । सुभाष खनाः नीलमं पाउँखाः ज्यात । सुभाषया ख्वालय् नं  
ग्याःचिकु-पहः खनाः सुचित्रा वाताहां जुल । नीलमं सुचित्रायात लप्पु  
ज्वनाः छखेलिकक यंकाः छगू सासलं खँ न्यंकल— “सुभाषयात बांलाक  
म्हसीके यःसा कन्हय् जिगु छँय् छकः मवये मते ।” नीलमं सुचित्रायात  
पतिं धस्वाका वन । वया नुगः घाँय्म्वः-सु थें त्वाकःबुकः जुल ।

सुचित्राया ख्वालय् खिउँगु खसुं भुंगु खनाः थःम्हं लिक्कुंका तयागु  
 नुगःया खँ, स्याः मचायेका च्वनागु दुघाः न्ह्यथनेगु ई त्यल धकाः  
 सुभाषं तायेकल । सुचित्रां खँ न्यनाच्चंगु दु-मदुया छुं च्यूताः मतसे थःगु  
 खँ न्ह्यथन— “सुचित्रा, छं लुमंनि ला, झी न्हापांगु न्हिकुन्हु नापलानाबलय्  
 छता निता खँ लिपा हे जक कने धयागु ? शायद नीलमं व हे खँ छन्त  
 स्वां पुयाथकूगु जुइमाः । छुं हे खँ मसुचुकुसे कनेत थौं झीसं चन्द्रागिरिया  
 लँपु ज्वने । म्हाः धाये मते ।”

न्ह्याः-म्हाःया छुं लिसः मब्युसे म्हुतुइ पाकां सुयाः सुचित्रा सुभाषया  
 ल्यू ल्यू वन ।

चन्द्रागिरि गुबलय् थ्यन उमिसं वाः चायेके मफु । अनया न्ह्याइपुगु  
 लः व सिचुगु फसं नं उमित थी मफु । शून्यगु थासय् उपि निम्हं फ्यतुल ।  
 उगुंथुगुं खँय् ई वामछ्वसे सुचित्रायात सुभाषं अतीतया बाखं छसीकथं  
 न्ह्यथन— “च्यादँ गुदँ न्ह्यः एस.एल.सी. पास यानाः क्याम्पसय् ब्वनाबलय्  
 छगू हे गांयाम्ह, छगू हे क्लासय् ब्वनीम्ह मिसा छम्ह व जि तसकं यःत्यः  
 जुल । अल्लारे बैसय् सुनां सुयात अप्वः ययेका धयागु खँय् अप्वः खँल्हाबल्हा  
 जुइगु । न्ह्याइपुक ई न्ह्यानाच्चन । छन्दु जिमिगु गामय् लाः च्वइपि छथ्वः  
 मर्यात चाःह्यू वल । गांया ल्याय्म्ह-ल्यासेतय्सं थः मतिनामि व यज्जुपिनिगु  
 नां लाः च्वकल । जिगु नुगः नं चंचं धाल । थःगु लप्पाय् वया नां लाः  
 च्वाकाः कयना । व तसकं लय्तायाः खबि हायेकल ।

निला प्यला लिपा जितः तसकं ज्वर वल । लांलां ज्वर क्वमलाः ।  
 गंसि जुजुं वन । नये नं मयः । गामय् वासः यानाः मजिसेलि काठमाडौंया  
 अस्पतालय् कयंवया । डाक्टरया सहलहकथं हि जाँचय् याकेगुया नापनापं  
 सम्पूर्ण जाँच याका । छकः जक मखु, निकः स्वकः थी थी क्लिनिकय् हि  
 जाँच याका । छगू हे लिच्चः । व लिच्चलं जितः म्वाय् चुइकल । दक्व  
 रिपोर्ट स्वयाः डाक्टरं जितः तुंक स्वयाच्चन । डाक्टर झस्कय् जुल, बुलुहुं  
 धाल— “छिगु रिपोर्टय् ला एच.आइ.भी. पोजिटिभ खनेदु । नापं ब्वनायंकाम्ह  
 अबुया न्ह्यःने जितः एच.आइ.भी. जूगु न्यनाबलय् जितः सिना थे जुल । जि  
 पत्याः हे मजू । विना अपराध जि अपराधी जुल । बौ व डाक्टरया न्ह्यःने  
 तसकं खयेवल । बौया छ्यं क्वछूगु क्वछुलं । ..... जि ताउत खवाच्चनागुलिं

जितः डाक्टरं ह्ययेके थे धयाच्चन- दिपाः मकासे कथंहंक वासः यानावन  
धाःसा ल्वय् क्वलाना मवंसां थातय् जकसां तया तयेफइ । च्वत्यंक हे  
लनीगु ल्वय् मखुसां वासः यानांतुं च्वन धाःसा साधारण मनूत थे इहिपाः  
यानाः जिन्दगी हने मफइगु नं मखु । ल्वय्या लागाय् च्वने फयेकेमाः ।  
..... जितः म्वायेगु तिबः ब्युब्यु डाक्टरं म्हछम्ह जाँच यानाच्चंबलय् जिगु  
लप्पाय् लाः च्यातयागु खन । लाः च्यागु घाः नं बांलाक मलंनिगु खन ।  
'थ्व लाः गन च्चकागु, गुलि दत ? छिनाप सुनां सुनां च्चकल'- डाक्टरं  
पुलिसं थे यक्व न्ह्यसः तल । छुं खँ सुमचुकुसे जिं फुक्क खँ कना ।  
डाक्टरं जितः ध्वाथुइके थे कनायंकल- 'एच.आइ.भी. संक्रमित मिजं-मिसा  
दथुया यौन सम्पर्क जक थ्व ल्वय् पुनीगु मखु । उमिसं छ्यःगु मुलु मेपिन्त  
छ्यल धाःसा नं थ्व ल्वय् संक्रमित जुइयः । लाः च्वइम्ह मनुखं एच.आइ.भी.  
ल्वय् दुम्ह मनूयात छ्यःगु मुलु हे छिकपिन्त नं लाः च्वल जुइमाः । उकिं  
छिके नं एच.आइ.भी. खनेदत । शायद छिगु गामय् लाः च्वकूपि मनूतयत्  
नं थथे जुल जुइ । ..... अस्पतालं लिहां वयाः जिगु हियूगु नुगः भतिचासां  
सिचुइ ला धकाः जिं थःम्हेसिनं फोन यानाः खँ फुक्क कना । वं छुं भतिचा  
हे बिचाः मयासे सवाः कायेगाःगु चुइँगमयात म्हुतुं थू याये थे याउँक हे  
लिसः बिल- 'लाः च्यां एच.आइ.भी. ल्वय् जुइ ला ? प्यम्ह मनुखं पत्याः  
याइ ला ? जिं नं स्यू, छु जुलकि थ्व ल्वय् संक्रमित जुइगु धकाः । जिं  
छन्त थःत स्वयाः अप्वः विश्वास याना । छं ला जितः विश्वासघात यात ।  
एच.आइ.भी. संक्रमित जूम्ह छनाप जि सती वये फइ मखु ।' धाधां तमं वं  
फोन दिकाबिल । नालु-खिपः थे क्वातुगु जिमिगु मतिना कचिका थे  
चब्बुत । जितः म्वाये मास्ति मवयाः आत्महत्या यायेगु बिचाः वल । तर  
विवश जिं आत्महत्या नं याये मफुत । जिगु आत्मां नुगलय् कुति न्यात-  
'जिमि मांबौया जि याकः-सन्तान, जि उमिगु लिधंसा ।' ..... 'दिपाः मकासे  
वासः यात धाःसा इहिपाःया जिन्दगी नं हनेफइ' डाक्टरया नंग्वारा थे  
धिसिलाःगु हःपालं जितः म्वाकातल । उकिं सुचित्रा छं जितः पासा जक  
नालेगु खः कि जिन्दगीया पासा- जिगु लिधंसा जुयाबीगु खः, छंगु ल्हातय्  
लःल्हाना च्वना । नितां जिं लसकुस याये ।"

सुभाषया बुलुमि पुनाच्चंगु दुघाः खनाः सुचित्रा बल्सीइ लाःम्ह न्या  
 थें फाताफाता पुलाः वया नुगः स्वःतिपाँय जुल । 'आः जिं सुनाप सहलह  
 यायेगु ? पासापिनाप सहलह याःसा अःखः जितः ह्वॉय्च्वॉय् जकं याइगु  
 खः ला ? मस्यूगु खँ सीकेबी थें जक जुइ ला ? मांबौ, थःथितिनाप  
 खँल्हाबल्हा याःसा उमिगु नुगलय् कःति वाये थें जकं जुइ ला ? मांबौया  
 लय्ताया मुखूचात स्वां महवयेकं इवाः जुइगु जुल । न्हापांम्ह मिसां थें  
 जिं नं वयात गः कीगु लिसः बिल धाःसा थ्व पालय् आत्महत्या यायेगु  
 कुतः याइ ला ? ग्वःफसं पुइका यनी ला वयात, उखे लाः थुखे लाः  
 मदयेक फसं कुतुवःगु सिमाया क्वहः थें । द्वपं ला मिसातय्गु छ्यनय् हे  
 लाःवइगु जुइ । सुभाष थें सोझा-सीधापि मिजंतय्त छमा सिमा भ्वाभः  
 जुइवं गुँ हे भ्वाभः ताइगु जुल । छगः सिँ ध्वग्गीगु खनेवं सिमाय् जायेक  
 सःगु फुक्क सि ध्वग्गीगु थें तायेकीगु जुल । इहिपाः याये धाःसा  
 जिन्दगीभर नँया बजि न्हययाच्चने मालीगु जुल । इहिपाः मयाये धाःसा  
 निम्हं छम्ह, छगू आत्मा जुइधुंकल । ला व लुसियात फाये थें जुल ।  
 सिपूयात निफलाः यानाः वाँछवये थें अःपु मजू नुगः फायेगु । उफ् ! आः  
 छु याःसा जी ?— सुचित्राया ताःहाकः झसुकाः वल ।

लँ तपि लँजुवाःत थें निम्हं ताउतक वाताहां च्वनाच्चन । जिन्दगीया  
 खुसिचा न्ह्याइ कि मन्ह्याइ धया थें ज्याःगु न्हयसः उमिगु नुगलय्  
 ल्यहें ल्यहें पुयाच्चन । समुद्रया लःद्वम्बः थहां कुहां जुयाच्चनी थें उमिगु  
 आशा-निराशां थाःगाः काये मफयाच्चन । सुचित्रां सुभाषया ख्वालय्  
 मिखा ब्वल । नुगः ख्वयाः नं ख्वबि हायेके मफुगु सुभाषया मिखां  
 सुचित्रायाके म्वानासू फ्वनाच्चं थें ताल । सुचित्राया लिसः न्यने आयबुया  
 च्वं थें ताल । सर्गः नं खिउँसे च्वनावल । लिहां वनेगु ई नं जुयावल ।  
 ताउतक सुम्क च्वने मफयाः सुचित्रां ख्वाउँक झसुकाः ततं नाइक सः  
 पिज्वयेकल— “दिपाः मकासे वासः यानावन धाःसा, ल्वय्नाप पाखा  
 लिना वनेफत धाःसा इहिपाःया जिन्दगी हने । ह्वने मफइगु मखु’ ।—  
 डाक्टरया खँग्वः थें सुचित्राया लिसः न्यने दयाः थ्व म्हगस खः कि  
 धाथ्यें खः’ धकाः सुभाष थःत थम्हं कुति न्यानाः स्वल ।

\*

ने.सं १९३९ तछलागाः १२

## निपु तुतां

लोकतन्त्रात्मक गणतन्त्र दिवसया लसताय् लोकतान्त्रिक व्यवस्था स्वनेत जनआन्दोलनय् हवब्बाःपि आन्दोलनकारीतय्गु लुमन्ति गोष्ठी ज्याइवल्य् क्याम्पसय् विद्यार्थीपिन्त ब्वति कायेत सुचं तिकल । जनआन्दोलनय् न्हयज्याःपि महान् व्यक्तिपि, शहीद जूपि, अपाङ्ग जूपि व्यक्तिपिनिगु जीवनी न्यनेकने व ब्वनेज्या याइगु जुल । पासापिं फुक्कस्यां थःथःपिसं म्हस्यूपि सांसद्, मन्त्री, नगरप्रमुख व ततःधंगु पदय् आसीन जुयाच्चपिनिगु नां न्हयथना हल । जनआन्दोलनबलय् जि मचा हे तिनिगु जूगुलिं सुं छम्ह नं नां जाःपि महान् व्यक्ति म्हमस्यू ।

सुनाप सहलह याये ? सुयाके स्यल्लाःगु बिचाः कायेफइ ? नुगलय् गुता बीबः थें खँ वात्तुवाल । क्याम्पसं छँय् थ्यंगु हे वाः मचाल । छँय् थ्यनेव जितः अगःचा मालां देगःचा लू थें, खुत्यांम्हेसित तुतां लुइ थें दाइयात ध्वदुक नापलात । लोड सेडिङ्गया ई मफुवं प्वालाक्क मत च्याका हः थें जिगु दिमागय् नं आकाझाकां लुमन्तिया मत च्यानाः लुमना वल । “जनआन्दोलन जुयाच्चबलय् दाइ नं छम्ह क्याम्पसया विद्यार्थी खः । प्याहां वनेत्यंम्ह दाइयात जिं लँ पनाः थःगु नुगःखँ कना ।

जिगु खँ न्यनाः दाइनं जितः छत्वाःचा खँ न्हयथन— “देशया फुक्क जनतात हा थें छधी जुयाः, इमूचात थें लश्कर जुयाः जनआन्दोलन यानाः तिनि थ्व लोकतान्त्रिक व्यवस्था प्राप्त जूगु खः । व व्यक्तिं यानाः, थ्व व्यक्तिं यानाः देशय् लोकतान्त्रिक व्यवस्था न्हयज्याये खंगु खः धकाः सुनानं धाये फइ मखु । द्वलंद्वः आन्दोलनकारीतमध्ये छम्ह

सक्रिय आन्दोलनकारी म्हसीके माःसा कन्हय् छन्त जिमि पासा छम्ह म्हसीकेत यंके न्है !”

जि न्हयसः तयेलात— “दाइ ! व सु मनू ले ? वयागु नां छु ? थौकन्हय् व छु पदय् ..... ?”

तिछुँ माः थें लश्कर न्हयसः तयागुलिं दाइनं न्हातिका खिउँकाः लिसः बिल— “झीगु देशय् समाजय् बलनाच्चंगु त्वय् थ्व हे खः । खुसि छीधुनेवं तुतां त्वःमनीगु, त्वय् लनकि वासःया नां त्वःमनीगु । व जिमि पासा छुं तःधंगु पदय् च्वंम्ह मखु, तःमिम्ह मनू नं मखु, नां जाःम्ह मनू नं मखु । फुक्कस्यां त्वःमंके धुकूम्ह मनू खः । विद्यार्थीबलय्, जनआन्दोलन जुयाच्चंगु इलय् सक्रिय जुयाः थःगु जिउज्यानयात वास्ता मयासैं न्हयज्याःपि आन्दोलनकारीतमध्ये छम्ह सक्रिय आन्दोलनकारी खः व ।”

दाइया पासा नाप लायेत दाजु-केहें निम्ह थानकोट वनेगु बसय् च्वना । थानकोट थ्यनेवं बसं क्वहां वयाः बाघौति न्यासि वनाः पासाया छैय् थ्यन । छकूचा बुँ-दथुइ जस्तां त्वपुयातःगु कचिअप्पाया छैं नं धायेमछिं बल्वा नं धायेमछिं छकू बास दयेकातःगु दु । दाइ व जि समरमानयात सःतुसःतुं द्वाहां वना । समरमान खाताय् ग्वारा तुलाच्वन । जिपि खनेवं ल्हातं चुयाः दनेत स्वल, दने मफु । छपु तुतां न्हयःने दु, मेगु तुतां खाता-क्वय् लात, वं न्हयाये मदु । दाइनं काचाक्क व तुतां न्हयाये दयेकाबिल । तुतांया लिधंसाय् समरमान खाता-क्वय् दनेफत । सुनानं था-न्हा न्हुइक तय्ज्जू याये थें था-न्हा न्हुयाः जि झसंक वन । समरमान ला अपाङ्ग खनिं । निपां तुतिया पुलिंक्वय् थुत्था हे । पाइँटया निगः मोहता हुस्लुं पुयाच्वन ।

निम्ह पासापि थःथवय् घय्घय् पुल, लय्ताः-ख्वालं । स्वयेबलय् यक्व हे दत थें च्वं इपिं नाप मलाःगु । दाइनं जितः ‘केहेंचा’ धकाः म्हसीका बिल । जिपि वनागु हुनि नं कन । इपि निम्ह खाताय् फ्यतुल । जि न्हयःने च्वंगु भ्वाथःगु मेच सालाः फ्यतुना । दाइ व समरमान खँल्हाबल्हा यानाच्वन । व इलय् जिगु मिखा चाःचाः हुल । क्वथाया छकू कुनय् भ्वाथःगु टेबुलया दःने दम बीमाःगु छगः स्टोभ,

सिलेवरया जासि-कॅसि, करूवा, भु, रिकापि, ग्लास भवपुइकातःगु दु ।  
व थलबलं जितः कनाच्चन- 'समरमानं थःम्हं हे थुयाः नयाच्चन' धकाः ।

छुं ईतक क्वथाय् मौनता न्यनाच्चन । जिं मौनतायात चिरिफाना-  
"समर दाइ ! छि याकःचा ला ? मेपि सुं मदु ला ?"

समर दाइनं 'मदु' धया थें छयं हीकल । ख्वालय् सुपाँय् न्ह्याः थें  
च्चन । जितः भचा मछिना वल । काचाक्क जिं खँ हीकाः धया- "समर  
दाइ ! झीगु देशय् लोकतान्त्रिक व्यवस्था हयेत न्ह्यज्याःगु जनआन्दोलनय्  
छि विद्यार्थीया नायःया भाला क्वबियाः, सक्रिय आन्दोलकारी जुयाः  
न्ह्यज्याःम्ह धकाः दाइनं जितः कनादिल । व जनआन्दोलनय् छिगु  
अनुभव कनादीसा जिमित म्वानाच्चंगु इतिहास बनाव्चने थें जुइ ।"

जिगु खँ न्यनाः समर दाइनं व्यङ्ग्यात्मक लिसः बिल- "विद्यार्थीतय्  
नायः जुयाः निरन्तर न्ह्यज्यानागुलिं जनआन्दोलनय् लूगु थ्व सिरपाः  
खुत्पांताया निपु तुतां, वैसाखी छिकपिसं खना हे च्वंगु दु । वनेधुंकूगु  
हाथ्या लुमंके थें जक जुइ । अथेसां छि नं छम्ह विद्यार्थी जूगुलिं गुगुं  
नं इलय् जिगु अनुभव ज्या ख्वले दयेफु ।"

समर दाइनं थःगु अनुभवयात न्ह्यबल- "जिमिगु छँ तराईया  
कलैया गामय् खः । मचाबलय्निसें मांया मतिनाया सवाः मथू । बौनं  
बुँज्या यायां जितः बलंकल, बंकातल । एस. एल. सी. पास जूगुलिं  
जितः बौनं क्याम्पसय् बंकेत काठमाडौंलय् छव्याहल । व ई राजतन्त्रयात  
क्वःथलाः लोकतान्त्रिक व्यवस्था हयेत आन्दोलन न्ह्यज्यानाच्चंगु ई  
जुयाच्चन । थी थी पार्टीतय् नेतात दक्व धया थें क्याम्पसय् वनाः न्वचू  
बियाच्चनी- 'हलिमय् विकशित देशय् थें झीगु देशय् नं विकास व  
समृद्धिया लोकतान्त्रिक व्यवस्था महसें मज्यू । लोकतान्त्रिक व्यवस्था  
हयेत थ्व राजतन्त्रयात हाकुतिने फयेके माः झीसं । जनआन्दोलन  
मजुइकं राजतन्त्रयात क्वःथले फइ मखु । इमिगु खँ न्यँन्य विद्यार्थीतयगु  
न्हकुसँ हे तिं तिं स्वानावइगु । इमिसं जनआन्दोलनय् ब्वति काःवपि  
विद्यार्थीतय् कारवाही याये दइ मखु धकाः क्याम्पस प्रमुखतय् नं  
पतिं धस्वाका वनी । नेतातयगु भाषण न्यनाः विद्यार्थी फुक्क जुरू जुरू  
दनी । फुक्क विद्यार्थी जनआन्दोलनय् ब्वति कायेत न्ह्यज्यात ।

विद्यार्थीपाखें नायः जुयाः जि आन्दोलनय न्हयज्याना । थाय् थासय् न्हियान्हिथं आन्दोलन तच्चः जुजुं वन । ..... आन्दोलनया इवल्य जुलुस वःपि न्हियान्हिथं दुगंछि जक मखु स्वदुगं प्यदुगं जुयाः पुलिसतय्सं कःघाये मफत । सशस्त्र पुलिसतय्सं आन्दोलनकारीतय्त लःया फोहरा, अश्रुग्यास, रबरया गोली कयेकाच्चन । निःशस्त्र आन्दोलनकारीतय्सं अप्पा, ल्हं, सिसि न्हयःने छु दु उकें कयेकाछवल । यक्व आन्दोलनकारीतय्त ज्वनार्यंकल । उबलय् जितः नं ज्वनार्यंकाः महेन्द्र पुलिस क्लबय् कुनातल । तःन्हुतक त्वःता महः । अन मेमेगु थासं ज्वनाहयाः कुनातःपि यक्व हे मनूत छकू क्वथाय् हे पीम्ह न्यय्म्ह धया थें आन्दोलनकारीतय्त खाचातय्त थें क्वचिना तल । लः तक नं त्वने खनीगु मखु । मनूत नये पित्यानाः वां वां खानाच्चन । नये-त्वने मदयाः गुलि मनूत मूर्च्छा तक नं जुयाच्चन । महेन्द्र पुलिस क्लबय् कुनातःबलय् जिमि बौ मन्त खनिं । जितः खबर तक नं मब्यू । तःन्हु लिपा त्वःताहःबलय् तिनि जिं सिल । सीम्ह बौयात ततां हे माःगु हनेचने यात खनिं । जि हाःनाः मदुम्ह अनाथ जुयाः निरास जुल । अले ला जि सी धकाः ग्या हे मग्यात । देशया लागि न्ह्यागु नं याये धकाः जिं संकल्प याना ।”

“व इलय् जनआन्दोलन ‘राष्ट्रिय आन्दोलन’ जुझुंक्कूलिं छन्हु सिंहदरबारय् द्वाहां वनेगु ग्वसाः ग्वयाः आन्दोलनकारीत सिंहदरबारपाखे न्ह्यात । द्वलंद्वः पुलिसतय्सं न्ह्याः वये मते धकाः पनाच्चन । आन्दोलनकारीत छति हे मग्यासे सिंहदरबारय् द्वाहां वनेत न्ह्याःवनाच्चन । इपांथिपां हे मदयेक गोली कयेकाहल । उबलय् जितः नं गोली लानाः बेहोस जुल । उबलय् यक्व मनूत सित । तःन्हु लिपा जिं थःत अस्पतालया बेडय् लुइका । गोली लानाः निपा तुति नं नचुसे च्वंगुलिं निपां तुति चायेमाल । उबलय् सुनां सुयात जक वासः यायेफइ ? ततां गामय् च्वंगु छँ-बुँ मियाः वासः यात । थौतक आजीवन हे ततां लहीकाः च्वनेमाल ।” समर दाइनं मेगु खँ कने मफत, चार्ज फूगु मोबाइल खँल्हाबल्हा त्वाःदः थें जुल ।

छुं ई दिपाः कयाः समर दाइनं हानं छत्वाःचा न्वात— “दक्व जनतातय्गु त्याग, तपस्या, ग्वहालि व जनआन्दोलनकारीतय्गु बलिदानं



यानाः थौं झीगु देशय् लोकतन्त्रात्मक गणतन्त्र नीस्वंगु स्वयेदत । खासापलाखं जूसां देशय् विकास वयाच्चन । जि अपाङ्ग जूसां देश अपाङ्ग मजुइमा ! थुकी हे जितः सन्तोष दु ।”

समर दाइन् न्हयथंगु विद्यार्थी-जीवनया बाखं न्यनाः जनआन्दोलनया संकिपा हे स्वया थै जुल । समर दाइयागु महान् बिचाः व उगु इलय् जनआन्दोलनय् न्हयज्याःपिं महान् व्यक्तिपिन्त दुनुगलनिसें ज्वज्वलपा यानाः कृतज्ञता देछाया । समर दाइयात सुभाय् बियाः दाइ व जि त्याहां वयेत्यनाबलय् हानं समर दाइया सः तायेदत— “केहँचा ! छिं जनआन्दोलनया बारे बाखं, च्वखँ, चिनाखँ वा गोष्ठीइ न्हयागु खँ न्हयथंसां जिगु नां छता न्हयब्वये मते न्है ! जि देशया लागि आन्दोलनकारी जुयागु धकाः जितः लबः काये मयः ।”

गणतन्त्र दिवसया लसताय् जनआन्दोलनकारीतय्गु लुमन्ति गोष्ठीइ जिं नां न्हयमथँसे समर दाइयागु आन्दोलनं जाःगु जीवनी न्हयथना । आपाः हे मनूतय्गु मिखा प्याःगु जिं वाः चाः । गोष्ठीइ मुनाच्चंपिं मनूतय्गु नुगलय् उत्सुकता भय्बियाः न्यन— “व महान् व्यक्ति सु खः ले ?”

जिं थुलि हे जक लिसः बिया— “छम्ह महान् व्यक्ति जुयाः नं साधारण व्यक्तिया म्वानासू हनाच्चंम्ह, सुनानं म्हसीकेगु कुतः मयाःम्ह, नां दयाः नं नां मदुम्ह आन्दोलनकारी खः । थौकन्हय् व ला मात्र निपु तुतांम्ह, देशप्रति श्रद्धावान् व्यक्तित्व जुयाच्चंगु दु ।”

\*

ने.सं. १९३९ बछलागाः १०

(गणतन्त्र दिवस)

## लिसः मवल

शून्यगु क्वथाय् मोबाइलया सः थ्वल । कतारं वःगु फोनया ल्याः खनेवं कृष्णां जितबहादुरयागु फोन वःगु सीकल ।

“हेलो, जित दाइ ! जि कृष्णा नवानागु । आकन दाइपि सकसितं म्हं फु ला ? थन फुक्कं म्हं फु । आसे न्है ! जिं मांयात मोबाइल बीत्यना । मां ! जित दाइयागु फोन वयाच्चन ।”

म्हयाय् कृष्णां मां गन च्वनाच्चन अन हे वनाः मोबाइल बीयंकल ।

माहिलाम्ह काय् जितबहादुरयागु फोन वःगु न्यनेवं च्वनाच्चंग च्या हे ह्वस्त्यंक छ्वयाः काय्या सः न्यने हथाय्मह मां सीतां छगू सासलं सः पिज्वयेकल— “हेलो, बाबु जित ! तःन्हु हे दत छिमिगु फोन मवःगु । नुगः खुल्ल मिनाच्चन । छिपि नेपाः वल धकाः म्हगसय् नं म्हनाच्चन । छिपि निम्हं दाजुकिजापिन्त म्हं फु मखा ?! थुगसिया मोहनि-नखःबलय् छिपि नेपाः वयेगु मखु ला ? छिपि मदयेक ग्वःकःमछि मोहनि-नखः हनेधुन । जिमित मोहनि मखु, बहनि थें च्वं । छिमि मां छम्ह दत्तले ‘बिदा मदुनि, लिमलाःनि, दां मुंके हे मफुनि’ धकाः मवयेगु खँ ल्हाये मते । छिमि दाइ धनबहादुरयात लुमकिसा ..... ।”

काय्नाप खँ ल्हाल्हां सीताया मिखा लःलः धायावल । हिवक हिवक मिगु सः कथुं पने मफुत ।

झिदै न्हयः सीताया तःधीम्ह काय् धनबहादुर, निम्ह मचातय् बौ— जागीरं जक नके, त्वंके, ब्वंकेत दां मगाः धकाः जागीर त्वःताः मलेसिया वन । दां मुंके मफुनि धकाः आइक्वं वये, इवं वये धाधां प्यदै न्यादैतक नं नेपाः मवः । मलेसियाय् ड्राइभर लजगाः यानाच्चम्ह

धनबहादुर आकाझाकां आयक्सिडेन्टय् लानाः दिवंगत जुल । बट्टाय स्वथना हःगु लाश स्वयाकथं थः बनावंगु लुमनीबलय् सीतायात नकतिनि हे जक पामलखं कःगु थें च्वनीगु । चुरा, प्वत्या, सिन्हः मदुगु भौमचायागु भ्वइसे च्वंगु ख्वाः स्वया च्वनेमाल । मचात बःचाधिकः जुयावःलिसे “बाः छाया तापाक्क वंगु ? बाःयात छु जूगु ?” धकाः न्ह्यसः तइबलय् मचातय् मां कपाः दायाः ख्वइ, ह्ययेकां ह्ययेके मफयेक । ई न्ह्यानावलिसे सीताया नुगःघाः बुलुहुं पुईं चिनावसां इलय्-ब्यलय् तःधीम्ह काय्यागु किपा खनकि न्हि दाःगु घाः थें सह याये थाकुक्क दुनुगलंनिसे कँ हालीगु स्याःचाः लंगु मखुनि । मिखां पाखा हाइगु मद्युनिबलय् सीताया निम्ह कायपिं जितबहादुर व मिनबहादुरपिसं कतार देशय् वनाः लजगाः माःवनेगु खँ न्ह्यथन । सीताया नुगलय् त्वाकलय् चुपि भ्वाक्क दिक्क थें जुल । कायपिन्त पिने देशय् वने मते धकाः गुलि ह्ययेकल ।

“जिपि तःदँ च्वने मखु, याकनं ल्याहां वये मां” धकाः मांयात ह्ययेकाः निम्ह कायपिं नं छँ त्वःताः कतार देशय् वन । उकँ तःन्हुतक कायपिनिगु सः न्यने मखनकि स्यत्थाक्क मि पुइधुंकूम्हं मिलापू जक खंसां थान्हा न्हुइ थें सीता सातुपातु वनी ।

मांया ख्वःसः तायेदयाः काय् जितबहादुरया सः फोनय् थ्वल— “मां ! छाया नुगः मछिका च्वनागु ? थुगसी मोहनिबलय् जिपि नेपाः वयेगु जुल । जि व मिनबहादुर निम्हेसितं बिदा दइगु जुल । आपाः मखु लच्छि जक । लय्ताःखँ न्यंकेत थौं बिदा कयाः मांयात फोन यानाच्वना । ज्याय् वनकि फोन यायेगु ह्वःताः हे मदु । मिनबहादुरया कन्हय् बिदा दु । थ्व हे इलय् वं मांयात फोन याइतिनि ।”

कायपिं निम्हं मोहनिबलय् थ्यनीगु खँ न्यनाः सीताया मिखां लय्ता-ख्वबि बाःवल । ख्वबि हुहुं सीतां थःगु नुगःखँ न्ह्यथना च्वन— “जिल का बाबु । थौं सुथनिसें क्वः हाः वयाच्वंगु, बांलाःगु खँ न्यनेदत । मोहनि गबलय् वइ थें जुल बाबु ! अय्सा थुगसी छिपि निम्हेसिगुं इहिपाः-ज्या नं क्वचायेकेगु का, मज्यू ला ? इहिपाः याइपि मिसातय्त गुलि जक आसे आसे धकाः पीकातयेगु !”

मां व दाजुया ताःहाकः जुइक खँल्हाबल्हा यानाच्चंगुलिं कृष्णा नं दाजुनाप खँ ल्हाये हथाय् चाल । स्वम्ह दाजुया याकःकेहँ कृष्णां मांया ल्हाति मोबाइल स्वब्याकाः न्यासिचाःगु सः पिज्वयेकल— “जित दाइ ! ..... जिमित छु छु हयाबीगु ले ? जितः ला मोबाइल छगः माःगु दु ।”

केहँयात जित दाइया लिसः वल— “तताःजुयात, मांयात व छन्त घडी छगः व तपचा छज्वः छज्वः न्यानातयागु दु । अँ, मांयात लुँचुरि निपा नं न्यानातयागु दु । छिमि मिनबहादुर दाइनं छु छु ज्वना वयेत्यन, जिं मस्युनि ।”

दाजु व केहँया न्हिलाः न्हिलाः मोबाइल्य् खँ ल्हानाच्चंबलय् भाःत मद्रुम्ह तताःजुम्ह नं अन हे वल । भाःत मद्रुसँलिं विदेशं वइगु फोनया सः तालकि तताःजुया नुगलय् मिमलः जू वः थें ताइगु । तताःजुम्ह फरक्क फहिलाः थःगु क्वथाय् द्वाहां वन । कृष्णां ताउत खँ ल्हानाच्चने मफत । फोन दिकाबिल ।

थौं चीधिकःम्ह काय् मिनबहादुरया फोन वइतिनि धाःगुलिं सीतां मोबाइल पलख हे बैय् मतसे जँय् स्वचाका तल, मोबाइलया सः मताइ धकाः । छुं हे ज्या मयासे सीता थःगु क्वथाय् इरुथिरु जुयाच्चन ।

मोबाइल्य् सः थ्वल । हथासं फोन ल्हवन । म्हिगः थें तश्मीम्ह भौनं मोबाइलया सः तायेकाः नुगः हिइकी धकाः क्वथाया खापा तिनाः सीतां मोबाइल्य् सः थ्वकल— “हेलो, बाबु ! मिनबहादुर खः ला ? छन्त म्हं फु ला ?”

मोबाइलं सः पिज्वया च्वन— “मां ! जि मिनबहादुर न्ववानागु । मां जिपि मोहनिबलय् वयेगु जुल । नेपाः वयेत ताःहाकः बिदा कायेमाःगुलिं शनिवार, आइतवार नं जिपि ज्याय् वनाच्चना । न्हिच्छिया झिंप्यघौ धया थें ज्याय् सनेमाः । उकें मांयात फोन यायेगु भचा तापात । म्हिगः मानं जित दाइयात धाः थें बिदाय् वयेबलय् इहिपाः-ज्या नं सिधयेकेगु जिमिसं क्वःछिना । माःगु तिसावसः-ज्वलं जिमिसं हयेत्यनागु दु । मानं छुं च्यूताः काये मते न्है !” काय्म्हं फोन दिकल ।

थुगुसी कतारं निम्हं काय्पि मोहनिबलय् थ्यनीगुलिं नखः न्ह्याइपुकक हनेदइगु नापं काय्पिनिगु इहिपाः-ज्या नं पूवनीगु जुल धयागु लय्ताः-

खं यानाः सीताया चान्हय् न्हयः हे मवः । काय्पि थ्यनीगु थनि ग्वःन्हु  
मानि थें धकाः यखानातःगु न्हिल्याः-पतिइ सीताया मिखा ब्वांवना  
च्चन ।

सीतायात मोहनि वयेकेत आय्बूगु उलिथुलि हे महु । छँ सुचुकुचुनिसें  
कयाः अंगः ईकेगु ज्या नं क्वचायेकल । इहिपाः-ज्यायात माःगु हलंज्वलं  
नं मोहनिन्हयः हे ताःलाके धुकल । ग्वहालि याइपि थःथिति मनूत  
सःताः इहिपाःया सहलह नं यानाच्चन । जुइमानिपि सम्धी-सम्धिनीपि  
नापलानाः यायेमाःगु रीतिथितिया खँ ल्हाये नं क्वचायेकल । थः आखः  
मसःगुलिं ब्वनापौया ज्या छता जक बाकी दनि । आः धाःसा नःला  
स्वनेगु दिं नं प्यन्हु हे जक मानि । काय्पि थ्यनीगु दिं नं त्यल । फोन  
यानाच्चनी मखुत धकाः सीता धुकं च्वनाच्चंम्ह अजुगति चायेक  
मोबाइलया सः थ्वल । 'सुयागु फोन जुइ थ्व ? काय्पिनिगु फोन  
अवश्य नं खइ मखु' धयागु नुगल्य् खँ वायेकाः सीता मोबाइल्य्  
तीजक सः पिज्वयेकल— "हेलो ! सु न्ववानादियागु थें ?!"

मोबाइल्य् म्हमस्यूगु सः थ्वल— "जिं कतारं फोन यानागु ।  
जितबहादुर व मिनबहादुरया पासा शंकरप्रसाद न्ववानाच्चनागु । जितः  
इमि मांनाप खँ ल्हायेमाःगु दु ।"

"धयादिसँ ! जितबहादुर व मिनबहादुरया मां हे खः जि । इपि  
आःकन देशं प्लेन्य् ब्वयेधुकल ला ? गुलि बजे थ्यनीगु जुल ? जिपि  
नं एयरपोर्ट्य् वनाच्चने । छु धायेत छितः फोन याकूगु थें ?"

मांया लय्ताः-सः न्यलिसे पासा शंकरप्रसादया सलय् ख्वःसः  
पिज्वल । खाखःतय्सं खँ ल्हाये थें खँग्वः त्यामजिक सः पिज्वल—  
"काकी ! थन म म खु थे जुल । जिं ग...थे क...ने छितः ?!" शंकरं  
बालाक खँ कने हे मफुत, ह्वाँय् ह्वाँय् ख्वःगु सः तायेदत ।

शंकरप्रसाद खँ कने मफुगुलिं मेम्ह पासां न्ववाना हल— "काकी !  
धैर्य तयादिसँ ! आकन मेपि सुं महु ला ? सुं महुसा मेपि नं  
सःतादिसँ । म्हिगः बहनिइ जिपि प्यम्ह पासापि नापं जा नयाः थःथःगु  
क्वथाय् द्वांवना । थौं सुथय् ज्याय् वनेगु ई, न्हय्ताः ई जुलं नं इपि  
दना मवः । ज्याय् वनेत जिमिसं थंवना । खापा मचायेकू । गबाय्

खापा ध्या ध्या यानां नं खापा मचायेकू । मेपि पासापि नं सःताहया ।  
कम्पनीया साहुयात नं सूचं बिया । खापा तछ्यानाः फुककं द्वाहां  
वना । निम्हं क्वप्सां पुयाः द्यनाच्चन । थनेत म्ह गिलिगिलि यानाः म्ह  
पुइका स्वया । निम्हेसियां मिखा त्वलहं थकना च्वन । हथासं अस्पताल्य्  
ब्वाका । डाक्टरं स्वयेसाथं छ्यं हीकाः मदये धुकल धकाः लिसः बिल ।  
आः छु यायेगु ? सुनां छैय् सूचं बीगु ? सुयात सःतेगु ? पासापि  
सुनानं नवायेगु आँट मयाः । नये-त्वनेया ई हे मदयेक जिवंजीउ हे  
मजुइक ज्या यायेमाःगुलिं बहनिइ ब्लड प्रेसर यक्क थाहां वनाः मदुगु  
खः धकाः अस्पतालया डाक्टरतयसं लिच्चः बिल । कम्पनीया मालिक,  
पुलिस व मेमेपि मनूतयगु सल्हाकथं जितबहादुर व मिनबहादुरया  
मिलय् जूपि पासापि जिपि जूगुलिं भवितव्यं मदुगु खः धकाः जिमित  
सही याकल । लाश दुगु बट्टा नेपाः यंकेत नं जिमित हे भाला बिल ।  
मखुसा थन बेवारिस लाश धकाः थनया नियमकथं ज्या सनीगु जुल ।  
उकें कंस लाशया निगः बट्टा ज्वनाः नेपाः वयेगु जुल । छिकपि  
एयरपोर्टय् झासँ ।”

नेपालया फोनं छुं कुतुवं थे, छुं ग्वारा तू थे छसः तस्सःगु सः  
थ्वल “धाराङ्ग ।”

मोबाइलया सः शून्य जुल । कतारया मोबाइलं सः थ्वल— “हेलो !  
काकी ! आकन छु जुल ? छु सः वःगु ? हेलो काकी ! हेलो !”  
छुं लिसः मवल ।

\*

ने.सं. ११३९ चौलाथ्वः २

## च्याःगु दिप : रव्वाउँगु खसु

क्वने त्वाःया नां जाःगु पीठ पचलि भैराःद्यः । मनूतय्गु थःथःगु भावभक्ति अनुसार मोहनिबलय् थी थी पीठय् वनी । जि मचांनिसें न्ह्याबलें मोहनिज्वःछि पचलि भैराःद्यःयाथाय् हे वनेगु । थ्व जिगु आस्था धाये ला वा मचाबलय् मानं ल्यूल्हू तयाः गुन्हुयंक नौरथया पूजा यंकातःगु संस्कार धाये ! मोहनिया नःलिस्वां स्वँसांनिसे चालंतक पचलि भैराःद्यः दर्शन याःवनेगु जिगु बानी ।

थौं ला पचिमन्हः । पचलि भैराःद्यःया विशेष कथं जात्रा यानाहइगु दिं । भैराःद्यः कियातःगु लुँया त्यप गमय् स्वनीगु दिं । छुं नं भिगु ज्या यायेत साइत स्वयेम्वाःगु दिं । थुकिया ज्वःलाःगु जात्रा मेगु गनं पीठय् मदु थें च्वं । लुँया त्यप भैराःद्यः दर्शन यायेमाःगुलिं थौं भचा लिबाक्क हे पचलि पीठय् वना । सुथसिया न्हयताः ई जुइधुंकल, अयनं भैराःद्यः गमय् मथ्यनि । जितः छु याये छु याये जुल । दनाच्चनां नं गबाय्त च्वनेगु ? द्यः दर्शन मयासें नं गथे ल्याहां वनेगु ? न्हापा थें थौया दिनय् ज्यापु-समुदायया वःलाः तयेहइपिं मस्तय् नं चहःपहः मदु । न्हापा जूसा वःलाः तयेहइपिं मस्त लय्लय् तायाः तितिं न्ह्याः ख्वःसिया ह्वाग्रा म्हिताच्चनी । अज बाकूया पाँय् म्हिताच्चनी । कथिया पानदस म्हिताच्चनी । गुच्चां गौचा दायाः म्हिताच्चनी । तःधीपिं मनूत मस्तय्गु कासाय् दुबिनाच्चनी । अन्याःथाय् दनाः स्वया जक च्वंसां छधौ निधौ ई मचायेकं हे वनाच्चनी । थौकन्हय्या मस्त अन्याःगु पुलांगु कासा म्हितेगु ला छु नां तक नं इमिसं मस्यू । वःलाः तयेहःपिं मस्त फुक्क

थः मांबौपिनिगु मोबाइल्य् मख्ख जुयाः म्हिताच्चन । सुयातं सुं पासा  
माःगु मखु । थ्व ईया ह्यूपाः धाये ला वैज्ञानिक विकासया चिं धाये ।

जि अन पीठय् लातां केरा स्वः थें उखेथुखे स्वयाः इवालपाःद्यः थें  
याकःचा दनाच्चने मास्ति मवल । पीठया दक्षिणपाखे न्ह्यानाच्चंगु  
वाग्मती तीर्थ वनेगु लँय् पलाः छिना । अन तीर्थय् मोहनिया गुम्ह  
भगवतीद्यःया नापं मेपि फुक्क द्यःपि पलिस्था यानातःगु दु । अन थ्व  
छम्ह द्यः मदु धाये स्वाः । अन वनाः द्यः दर्शन याया हे छघौ बाघौ ई  
ला मचायेकं हे वनीगु । वाग्मती तीर्थय् थ्यंबलय् तसकं हे अजुगति चाल ।  
पीठय् स्वयाः नं थन यक्कव हे मनूत स्वः स्वः खना । थ्वःचा थ्वःचा मनूत  
मुनाः नुगः थुदीगु खँ ल्हानाच्चन । भैराःद्यः महःनिगुलिं जि नं व मनूत  
मुनाच्चंथाय् न्हाय्पं तिस्वाकाः न्ह्यःने वना । जि मिजं मखसे मिसा  
जूगुसा थथे न्ह्यात्तले च्वनेत गनं ई दइ, व नं मोहनि-नखःबलय् ।

वाग्मती खुसिया पश्चिमपाखे च्वंगु दिपपाखे फुक्कस्यां मिखा  
बयाच्चन । न्ह्यःने वलिसे धकिं चालावंगु दबू थें जिं फुक्कं खन ।  
अपायधंगु थासय् पलाः हे तयेथाय् मदयेक मनूत मुनाच्चन । दिपया  
न्ह्यःने क्वतालय् छम्ह सीम्ह तयातःगु खन । जिगु नुगः वाल्लइल्ल  
मिनावल । जिगु म्हुतुयात कत्तिके मफुत । छम्ह ल्याय्म्हम्ह मनू न्ह्यःने  
खनेसाथं न्यना- “सु मनू मदुगु थें हला ?!”

“जिथाय् त्वालय् च्वम्ह दक्कसिबय् थँजिम्ह बुरिम्ह मनू सीगु ।  
थन धाःसा थथे .....” धाधां व ल्याय्म्हम्ह मनू पूर्वक खँ हे मकँसे  
मनूतय्गु मेगु पुचलय् दुथ्यात । स्वःस्वःपिनिगु ख्वालय् केँहाःगु लकस  
बलनाच्चन । जिं नं म्हस्यूम्ह मनू खः ला धया थें नुगः खुलुखुलु मिनाः  
जि झन झन न्ह्यःने वना ।

छथ्वः मनूतय् पुचलय् सः थ्वयाच्चन- “थःत जन्म बियाः संसार  
खंकूम्ह मां, नये-त्वनेया, न्ह्यःया छुं च्यूताः मतसे, खिच्च कयाः  
बलंकूम्ह मांयात मि छप्वाः तयेत नं थपाय्सकं त्वापु यानाच्चंगु का !  
गन्याःगु ई जुयावःगु थ्व ? हरे शिव न्यने मात्रं हे ..... !”

मेगु मनूतय् पुचलय् सः थ्वयाच्चन- “मखु ! ..... स्वम्ह स्वम्ह  
काय्पि दु, सीम्ह मांयात मि छप्वाः तयेत छाया अलमल यानाच्चंगु ?!”



मेम्ह मनूया तं त्वाकज्याःगु सः थ्वल— “स्वम्ह ला छु, झिम्ह काय्पि दःसां छु ज्या ख्यले दइ कपूत काय्पि जुलकि ! तःधीम्ह काय्पि मि तयेत अबु दनि हँ । पू याये मज्यू हँ । माहिलाम्ह काय् न्हापा हे त्रिश्चियन धर्मय् द्वाहां वंगुलिं मि तयेके मज्यू हँ । त्रिश्चियन धर्मय् दुथ्याःम्ह काय्यात मि तयेके बिलकि फुकी बाकाय् व गुथियारत दिगुपूजा, गुथिभव्य, हनाच्चना फुक्कपाखे बायावनेगु हँ ।”

मेम्ह मनूया सः थ्वयाच्चन— “व दक्कय् चीधीम्ह काय्पि छु स्वयाच्चंगु ले ? कान्छाम्ह काय् जुयाः मांयात मि तयेगु ला वया धर्म नं खः कर्म नं खः ।”

बाज्यःति वम्ह मनूखं खँ द्यतँतं थम्ह न्यनागु खँ प्वकल— “स्वयादिसँ रे, व कान्छाम्ह काय्यात गुलिस्पां जक ह्ययेके धुंकल— मांयात मि छप्पाः तयां छन्त छु स्यनी !” धकाः अःखः वं हे सः तस्सः यानाः तित्तिं न्ह्याः लिसः बियाच्चन— “छिकपि थौं घौछि दनाच्चपिसं जिमिगु छँया चालामाला छु स्यू ? झिन्यादं मयाक न्ह्यवनिसें ब्यागलं च्वनाः मां-बाःपि बल्लाःबलय् तःधीम्ह काय्यात छँज्या याकाः छय्पिन्त सुसाःकुसाः याकाच्चन । दक्कफुक्क दुस्यः-सम्पत्ति काःम्ह तःधीम्ह काय् । मां-बौया अंशभाग दुकाःम्ह तःधीम्ह काय्, छँबुं मियाः दां प्वःच्युम्ह तःधीम्ह काय् । तःधीम्ह काय्पि न्यातका दां फुके म्वायेक प्यन्हुया ल्वचं मां मन्त धकाः कान्छाम्ह काय्पि मि तयेमाः धयां जिं मि तइ ला ? मां मफु, छकः स्वःवा धकाः दाइनं जितः छकः हे मसःतू । सीम्ह मांयात मि छप्पाः तयां जक गाः ला ? दच्छियकं हनाचना याये हे माल । गुलि अःपुक्क धाइ मनूतय्सं— मांयात मि छप्पाः तयां छु जुइ धकाः ! कन्हय् सु वयाः खँ ल्हाःवइ जिमिगु छँय् वयाः ?”

खँ न्यँन्यं जि ला वाकु हे ब्यनावनी थें जुल हे भगवान् ! खँ कनाच्चम्ह बुन्हा नुगः हिइकाः थःगु लँ लिनावन ।

खँ न्यँन्यं जिगु पलाः छथाय् हे तये मफत, उखेथुखे चाःचाः हुल । जि मचायेक हे सीम्ह तयातःथाय् थ्यन । अन म्हायाय्पि खः ला, छय्पि खः ला, तताकेहँपि खः ला मस्यु, मिसापिनिगु ख्वःसः हे जक थ्वयाच्चन । जिगु मिखा दिपया न्ह्यःने च्वंगु फल्वाय् तक्यन । गा छपुं

भुत्तुभुनाः, मिखा तिसिस्सिनाः, छयं क्वछुनाः, मिखां ख्वबि हायेकाः  
 अंगःया लिधंसा कयाच्चंम्ह बुराम्हेसित खन । सीन्ह बुरिम्ह सिनावंगु  
 मखु याउँक दानाच्चंगु थें च्वं । म्वानाच्चंम्ह बुन्हाम्हा सासः छम्ह ज्वनाः  
 सिनाच्चंगु थें च्वं । मचातय् मां मसीमा, बुन्हातय् कलाः मसीमा  
 धयातःगु खँग्वः इवास्स लुमना वल । जिं मचायेक हे जितः ताःहाकःगु  
 झसुकाः वयाः थः नं बुन्हा जुइधुंकूगु खं जिगु नुगःयात ख्वाउँगु खसुं  
 भुनाबिल । जिगु मिखां अन ताउततक स्वयाच्चने मफत, मेथाय् हे  
 मिखा चाःहीका ।

वाग्मती दिपया उखेथुखे च्वंगु देगःचाय् लोकाचारया लागि लाकां,  
 तपुलि त्वःताः स्वबः दुगु गां न्ययाच्चंपि स्वम्ह काय्पि खन । इमिगु  
 मिखा भाजं थें खाराखारा च्वं । इमिगु ख्वालय् मां सीगुया च्यूताःया  
 छुं भाव खने मदु । अंशबन्डाया मुद्दाय् वाद-प्रतिवाद यायेत अदालतया  
 बार्दलिइ दनाच्चंपि अपराधीत थें च्वं ।

मेगु छपुचः । थ्व पुचः मेपि मनूतयगु पुचः मखसे गुथियारतयगु  
 पुचः थें च्वं । इमिगु कःकू ब्यंगु सः थ्वयाच्चन— “का काजीपि ! छु यायेगु  
 खः, याकन त्याछीमाल ! जिमिसं सिधयेके माःगु फुक्क ज्या सिधल ।  
 सीम्ह सिँपैय् तयेधुंकाः नं गुलि गनथन यानाच्चंगु ? सुनां मि तयेगु धकाः  
 छैय् हे सहलह यानाः जक सिथं हयेमाःगु छिकपिसं । सुनानं खनी धया  
 थें च्वंक अस्पतालं हथासं शव-वाहनय् तयाः थन ब्वाकेहल । थन  
 थन्याःगु बेइज्जत यानाच्चन । मोहनि-नखः थें ज्याःगु इलय् जिपि गुलि सी  
 पियाच्चनेगु ? जिमि नं थन सिधयेकाः छैय् वनाः नीसी याःवनेमानि ।  
 मखुसा जिपि वनेत्यल, छिकपिनि यत्थे यानादिसँ ।”

हानं मेगु छपुचः मिसापुचःया सः तायेदत— “थ्व बुन्हाबुन्हितय्सं  
 न्हापा मिजंमचा छम्ह नं लहिनातःगु खः । न्ह्याम्हेस्यां व मचा सु  
 धकाः न्यंसां व नं काय् हे खः धाइगु । वयात हे मि तयेकूसा ज्यूगु  
 खः ।”

मेम्ह छम्ह मिसां खँ तन— “व केहँ धायेमाःम्हेसिया काय् लहिनातःगु  
 खः । ल्याय्म्ह जुयावसँलि वयात नं अंश बीमाली धकाः थः काय्पिसं  
 ल्वापु यानाः पितिना छ्वल ।”

मनूतय्सं खँल्हाबल्हा यानाच्वंगु सः हे ताये मदयेक बुऱ्हाम्ह थः  
च्वनाच्वंगु फल्वां चिल्लाय् दनाः हाःगु सः थ्वल । जिगु मिखा व  
न्हाय्पं व हे फल्वापाखे जूवन ।

“जि दयेक दयेक जिमि कलाःयात ब्रम्हूनं मि तयेकि धाःम्ह सु ?  
जिमि कलाःयात जिमि सुं नं काय्पिसं मि मतःसा जिं हे मि तये । थौं  
जिमि कलाः जक मखु जिगु स्वम्ह काय्पि नं सित धकाः जिं भाःपी ।  
जिमि कलाःयात मि तयाः जि नं थन सिनावनेगु ।” कलाः सीम्ह  
बुऱ्हाम्हेसिया सः थ्वयाच्वन । धेधे चुइक दनाः थःगु वसः थःम्हं  
झ्याराझिरि खुनाः फल्वां क्वहां वयेत्यंम्ह बुऱ्हा थस्सः पायेक छ्यनं  
चुइक दल । न्ह्यःने-ल्यूने च्वनाच्वंमि मनूतय्सं चिल्लाय् दनाः बुऱ्हायात  
ज्वनातल ।

फल्वां चिल्लाय् दनाच्वंगु सः हे ताये मदयेक हानं मेगु नुगः हे  
तज्याइ थें च्वंगु सः “यः मां ! जि छंगु ख्वाः छकः स्वये मखंकं छं  
त्वःतावन । आः जिं छंगु ख्वाः गन वनाः स्वःवने ?” धकाः सर्गः तज्याइ  
थें च्वंक ख्वयावःम्ह मिजंम्ह वयाच्वंगु खनाः फुक्क मनूत पौभाः जुल ।  
फुक्कसिगु मिखा व ख्वयावःम्ह ल्याय्म्ह मनूयाके जूवन । व मनूयात  
दिपया बुखँ सुनां कनाः ब्वनाहल, सुनानं मस्यू । सुयातं छुं मधासे व  
मनुखं मिप्पाः ज्वनाः सिँपँय् तयातःम्ह सीम्ह मांयात स्वचाः चाःहिलाः  
सीम्हेस्या द्यःने मिप्पाः तयाबिल । फुक्कस्यां छप्पाः म्हुतुं सः पिज्वल—  
“लहिनातःम्ह काय् ।”

नकतिनितक संकिपा थें तमाशा जुयाच्वंगु व थाय् सीम्ह छ्वयेकीगु  
दिप जुल । क्वाःगु कुँत्याः हाकुक्क सर्गतय् थाहां वनाच्वन । नागबेली  
काकां थाहां वनाच्वंगु कुँत्यालं “काय्पिन्त थाकुल ला ?” धकाः लिफः  
लिफः स्वस्वं सर्गतय् वनाच्वंगु थें च्वं । फुक्कसिगु मिखां ख्वबि  
हाल । नुगलय् ख्वाउँक खसुं भुन ।

\*

ने.सं. ११३९ पहेलाथ्वः ११

## विवशतां चिरिबाःगु नुगः

म्हिंगःतिनि अमेरिकाय् थ्यंपि गौतमया मां-अबुया तसकं म्ह न्यःगु वाःचाल । मिखा तिसितकि अय्लाखं काःपि थें इक्कुसे च्वनाच्चन । मिखा तिसितकि हुसुसुसु प्लेन न्ह्यानाच्चंगु थें ताइगु । “आः जिपि वयेगु सिबय् छिपि हे वयेगु कुतः या !”— मां-अबुं तःक्वःमछि काय्-भौयात धाःगु नं खः ।

“जिपि नेपाः वयेत मस्तय्गु स्कूल, कलेज व जिपि निम्हेसिया अफिसया बिदा ताःलाकेत तसकं थाकु । जिपि वयेबलय् स्ववाः, लच्छि अप्वः बिदा दइ मखु । उलि बिदा ला मिखा फुति याये थें फुनावनी । मां-बाःपि झाःसा न्ह्याक्वं च्वनेजिल ।”— काय्-भौपिनिगु माया वनापुसेच्चंगु खँ व छय्पिन्त बाःवनीगु मतिनाया नालु-खिपतं बुराबुरितय्त हस्ते हाइँसे यानाः सात्तु सालाच्चन । न्ह्याक्व थाकुसां प्यदँ न्यादँ लिपा थुगुसी नं गौतमया मां-अबु अमेरिकाय् थ्यन ।

“उफ् ! आइया ..... या ..... या ! पुलि नं गुलि जक क्वाता क्वाता स्याःगु थ्व ! तप्यंकूसां कय्कुंकूसां थाकु । दंसा फ्यतुइ थाकु, फ्यतूसा दने थाकु । म्हछम्हं छ्या छ्या यानातः थें स्याः । पालि नं गुलि क्वचिनाः तःजाः जुयाच्चंगु ! चच्छि न्हिच्छि प्लेनय् मिखा फुति हे मयानागुलिं छ्यं नं क्वाता क्वाता स्यानाच्चंगु । छन्त ला छुं मजू थें च्वं हला गंगामाया ?!”— गणेशप्रसादं थः बुरियात खँ थ्वकाच्चन ।

गणेशप्रसादया स्याःचाःगु नुगःयात फक्व सिचुके थें गंगामायां लिसः बिल— “जितः नं तसकं म्ह स्यानाच्चंगु दु । सह यानाच्चना का । म्ह मस्याइगु नं गनं ? निन्हु-निचा धया थें मेव छगुली कुचुक्क

फयतुना च्वनेमाः । उकिसनं उसिक्क सने मजीक पेटी चिनाः तुति यगाकाः च्वनेमाःगुलिं तुति व म्ह स्याइगु ला जु हे जुल नि ! नीघौ धया थें प्लेनय् च्वनेबलय् ल्यासे-ल्याय्महिनि हे म्ह न्यः धाइ, झी ला बुराबुरि जुइधुंकूपि । वये हे मखु धकाः नं झीसं धायेफुगु मखु, थ्व झीगु माकः-मायां यानाः । छु याये ? निन्हु प्यन्हु सह या ले बुरा !”

सुथसिया ब्रेकफास्ट यायेत सःतःवःम्ह गौतम, लुखाय् च्वनाः मांबौया खँल्हाबल्हा न्यनाः वया नुगलय् कँथं कः थें जुल । मां-बौया खँ मखुगु ला ख हे मखु । बुराबुरितय्त अमेरिकाय् वये-वने तसकं हे थाकु । घःचाः-मेच हे छ्यःसां नये, त्वने, दानेगु समस्या जुयाच्चनी । थाकु धयां नं छु याये ? निदँ प्यदँ मां-बौपि मवलकि याकःकाय् जूगुलिं गौतमया नुगः मछिना वइगु । मस्तय्सं नं तसकं म्हाइपुकीगु । अजा-अजिपि छँय् दइबलय् मस्तय्गु ख्वाः हे लय्तां भय्ब्यू । बुराबुरि जुइधुंकूपि मां-बौ थथे थाकुगु गुलि हे वयेफइ धयागु लुमना वलकि गौतमया थःम्हं मचायेक ताःहाकःगु झसुकाः पिज्वइ ।

“बाबु ! छं च्या त्वनेधुन ला ?”— मांया सलं गौतम झसइ वन ।

“मां-बाःपिन्त च्या त्वनेत सःतःवयागु । थौं शनिवार, जि बिदा दु । मां-बाःयात मसाज यायेथाय् ब्वनायंके मज्यू ला ? मसाज छकः यात धाःसा ल्हाः, तुति, म्ह स्याःगु फुक्क लनी ।”— गौतमं मां-बाःपिन्त लय्तायेकेकथं खँ न्हयथन ।

गंगामायां तुरुन्त हे लिसः बिल— “म्हां म्हां जि ला मसाजय् वने । बरु छिमि बाःयात ब्वनायंकि । जि छँय् हे आराम कयाच्चने ।”

काय्म्ह गौतम बौम्हेसित मसाज यायेगु क्वथाय् तयाः थः पिहां वन । गणेशबहादुर मसाज याकेत वसः त्वःताः क्वपुसां पुयाच्चंबलय् छम्ह मिसा ‘हेलो, गुड मर्निङ्ग’ धाधां दुहां वल । वयागु सः न्हाय्पनय् दुहां वनेव गणेशप्रसाद छकः झस्कय् जुल । वया सः न्हापा गनं गनं न्यनेधुंगु सः थें ताल । ख्वाः नं नेपाःमि थें ताल । ख्वाः छकः तुंक स्वये धकाः छ्यं चाःहीकूतले व मिसाया म्हुतुइ मास्क, छ्यनय् तपुलि, म्हय् आप्रोन पुने सिधल । थःथम्हं पत्याः याये नं थाकुल । गन व मिसा गांयाम्ह, बाज्यः वंगु छजु कुर्ता-सुरुवाः व चप्पल न्ह्यानातःम्ह । गन थ्व

मिसा जुल पाइँट, ज्याकेट व त्वान्नालय् थ्यंक बूट लाकां न्ह्यानाः टिपटप जुयाच्वन्ह । थःथम्हं थुइकल— मेक्सिकनत, थाई मनूत नेपाःमित थें हे च्वं । हानं मसाज याःवःम्ह मिसायात 'छ गन देशयाम्ह ? छन्त म्हस्यू थें च्वं ।' धकाः नातिकृति खँ ल्हानाच्चने नं मजिल ।

म्हछम्हं चिकं पाँय् पाँय् तयाः व मिसां गणेशप्रसादयात मसाज यानाच्चन । मसाज याइपि मेपि मिसापि जूसा त्वाँय् त्वाँय् गफ यानाः मसाज यानाच्चनी । व मिसाया म्हुतुं सः पिहां मवः । ल्हाः जक च्वयेका च्वन । मसाज याकाच्चम्ह गणेशप्रसादया म्हय् तःकःमछि हे वया लुसिं इवय्पी धुंकल । वं वाः मचाः । वया नुगलय् तसकं खँ वाः थें च्वं । गणेशप्रसादं 'लुसिं इवय्पिल' धकाः धायेछाःगु नं मखु । थथे हे नेपालय् पासां गणेशप्रसादयात दकलय् न्हापां मसाज याकेत ब्वनार्यंकूगु ई लुमना वलकि तसकं न्हिले मास्तिवइगु । न्हिलाः म्हुतु कत्ती मलावं नुगः थुंदीगु छता खं नं वया न्हाय्पं थ्वइगु ।

गणेशप्रसाद दकलय् न्हापां मसाज याकेत वंबलय् वसः त्वःताः चीकूगु रूमालं हिनाः मसाज याइम्ह मिसाया न्हयःने वनेमाःबलय् व सिना थें मछाःगु । छयं क्वछुका च्वनागु गुबलें त्वःममं वया । क्वपुसां पुयाः मसाज याकाच्चम्ह गणेशप्रसादया थः खासा थें कय् कय् कुनाच्चनागु व कुचु सह याये मफ्याः दम्बि थें वालावाला सनाच्चनागु लुमना वल । गणेशप्रसादं मसाज याये हे मछिंक सिमाहः थें फिरिफिरि म्ह संकाच्चंगुलिं मसाज यानाच्चम्ह मिसां धा हे धाल— "अंकल ! छाये थथे म्ह कय्कय् कुंकाच्चनागु ? मछिन कि, मछाल कि ? मछाले माःगु छुं मदु । जिमिगु सेवा छम्ह नर्सयागु सेवा थें हे खः । नर्सनाप मछाल धाःसा इमिसं गथे सेवा याइ ?" कपी थें नायूगु सलं मसाज यानाच्चम्ह मिसां गणेशप्रसादयात ज्ञान बिया च्वं थें च्वं । सभ्य यायेत कुतः यानाच्चं थें च्वं । मसाज याइम्ह मिसाया मेम्ह पासा वयाः इमि जूगु खँल्हाबल्हा न्यँसेलि गणेशप्रसादं थःगु मछाःपहःयात फसं पुइका यंकू थें ताल ।

"संगीता ! थौं छ न्हापां वनेमानि धयागु मखु ला ? छं मचायात फिजियोथेरापी यायेथाय् यंकाः वया तुतिया त्वय् क्वलानावं थें च्वं ला ? खास छु जूगु खः मचाया तुति ?"

पासाया न्ह्यसःया लिसः बीत संगीतां मसाज यानाच्चंगु ल्हाः  
दिकल । ताःहाकःगु झसुकाः तल । नुगः क्वतुंगु सलं संगीतां लिसः  
बिल— “त्वय् ला छु म्हो जुइ ? स्याःगु जक म्हो जुइगु खः । मचा  
प्वाथय् दुबलय् तिलय् ग्यनीगु नसा नये मखंगुलिं मचा ब्वलने मखन  
हँ । मचा बूबलय् हे निपां तुतिया पुलिंक्वय् तुति चीपुम्ह मचा बुल ।  
तुति अप्रेशन यायेमानि हँ । तःधिकः जुलकि नँया तुति तयेमानि हँ ।  
च्यागू झिगू लाख दां मदयेक ज्या सिधइ मखु धाल ।”

संगीताया मिखां तिकिनंगु ख्वबिं जिगु म्हय् तिकिनंगु मिं थें  
स्यथाक्क पुत ।

संगीताया खँ न्यनाः पासाम्ह छकः थाराक्क न्हुल । मधासँ च्वने  
मफुत— “अहो ! उलिमछि दां झीसं गुबलय् मुंके फइ खला ? व  
मचाया जिन्दगी अथें हे फुनावनीगु जुल का ! व नं म्हाय्मचा ।”

पासाया सः मद्युनिबलय् संगीताया सः दुनुगलंसिं थ्वल— “मखु  
पासा ! जिं जिमि म्हाय्यागु जिन्दगी अथें फुके बी मखु । जिं  
न्ह्याक्व दुःख सीमाःसां कतार, दुबई, मलेसिया वनाःसां जिमि म्हाय्यात  
अप्रेशन यानाः तुतिं चुइकां त्वःते ।”

अतीतया खँ लुमंकाः मसाज याकाच्चम्ह गणेशप्रसादयात ‘मसाज  
याये सिधल’ धकाः मसाज याइम्ह मिसां सूचं बिल । म्हछम्ह वाफ  
कायेकेत मेगु क्वथाय् फ्यतुके यंकल । वाफ कायेत ज्वलं मिलय्  
यानाच्चँच्चं हे वयागु मोबाइलय् सः थ्वल । मोबाइलया नम्बर छकः  
स्वल । मोबाइलया ल्याः खनेवं वया नुगः कय्कय् च्यात । मोबाइलय्  
मचाया ख्वःसः थ्वल । हथासं जितः वाफ कायेके बियाः व मिसा भःभः  
न्हुहुं पिहां वन ।

क्वथालिक्क, पिने च्वनाः खँ ल्हानाच्चंगुलिं वयागु सलं जितः  
करेन्ट ज्वं थें जुल । वं नेवाःभासं हे मोबाइलय् लिसः बियाच्चन—  
“ख्वये मते पुता ! ग्यानिम्ह जिमि पुता, जिमि बाबा ख्वये मते धया !  
मां फक्व नं याकनं वये खं ला ! छंगु तुतिया अप्रेशन यानाः वासः  
यायेत दां मुंके धुनकि मां याकनं लिहां वये न्है पुता ! छ तसकं  
ग्यानिम्ह आमथे ख्वयाच्चने मज्यू न्है ! अजियात ख्वयाः दुःख बी

मते ! थन मांया यक्व ज्या दु । आः फोन तयाबी । हन्चा जिगु क्वाथां  
फोन याये न्है, ग्यानिम्ह पुता ! अजि ग्व ? अजियात फोन छकः ब्यु  
सा !”

फोन अजियात मब्युसे मचां हे दिकाबिल थें च्वं । फोनय् मेगु सः  
मथ्वल ।

म्हय् वाफ काये सिधयेकाः वसः पुनाः क्वाथां पिहां वःम्ह गणेशप्रसादया  
नुगः मिसायात खनाः तज्याइ थें च्वन । नकतिनि जक ख्वखनासः हे  
पिमज्वयेक मचायात ह्ययेकाः खँ ल्हानाच्चंम्ह मिसा आः वाक्कु छिनाः  
फक्व नं चीसः यानाः हिहिलनाः ख्वयाच्चन । मोबाइलयात निपा  
ल्हातिं छातीइ प्यपुंका तल । स्वयेबलय् नं मचायात हे कसिक्क  
घयपुनाच्चंगु खः ला धया थें च्वं । ‘छ संगीता हे मखु ला ?’ धकाः तक  
नं न्ह्यसः तये मफयाः लातापाकः थें गणेशप्रसाद वाताहां दनाच्चन ।

\*

ने.सं. ११३९ थिलागाः १४



## जःल्यूने हाकुगु किचः

जेठ महिनाया न्हि । सिथिनखःया जःखः । तसकं म्हाइपुसेच्वंगु ई । शनिवारया बिदा जूगुलिं जा नयाः गन वने, गन वने जुयाः विवेक लासाय् ग्वारा तुलाच्वन । गनं वने ला धाःसा चा हे नायावनी ला धया थें च्वक सूर्धवें नं थःगु पौरख क्यनाच्वन । सिंग्वः थें न्हिच्छि लासाय् ग्वारातुला च्वने नं विवेकयात मंमन्त । उकुन्हु तिनि छगू पूजा-गुथिपाः फये सिधयेकूपि, बुराबुरि जुइधुंकूपि तःबाः-तःमांपि म्हां फु ला मफु ला स्वःवनेमाःगु लुमन्तिं वयात नुगलय् कुतिं न्यात । विवेकयात गुबलें ल्वःमं मजू, वयात थः बौनं छकःपतिकं न्यंकाच्वनी— 'स्वऽ बाबु ! छं तःबाः-तःमांपिन्त बिचाः यानातयेगु व माःबलय् ग्वहालि यायेगु गुबलें ल्वःमंके मते । जिमि मांबौपि मचाबलय् हे मदुगुलिं व दाजुं थः ब्वने मखंसां जिमित आखः ब्वंकाः तुतिं चुइकाबिल ।'

तःबाः-तःमांपिनि निम्हं काय्पि अस्ट्रेलियाया नागरिक जुइधुंकल । धुच्चापतिकं वयाः स्वयेफुगु ला ख हे मखु । विवेकया मन मच्वन । जुरूक्क दनाः तःबाः-तःमांपिनिगु छैय् वनेत पलाः न्ह्याकल ।

“यः तःबाः, यः तःमां ! छिकपि गन थें ?”— सः ब्युब्युं विवेक तःबाःया छैय् थहां वन ।

“कुने सु थें ? बाबु विवेक थें च्वं खः ला ?! जिपि बइगलय् दु । थहां वा न्है !”— तलं तःमांया सः थ्वल ।

“खः तःमां । छिकपि गन थें ? जि विवेक वयागु ।”— खँ पूमवनिबलय् विवेक तःमां-तःबाःपिनिगु न्हयःने थ्यन । बुराबुरि निम्हं भुग्लुं च्वनाः दुरू मदुगु हाकु-च्या व पाउरोटी बागः न्हयःने तयाः च्या त्वनाच्वन । विवेकं मचायेक हे घडी छकः स्वल । न्हिनसिया झिनिताः

जू-मजू ई जुल । मन्थेसे च्वने मफुत । विवेकया सः पिज्वल—  
 “तःबाः-तःमांनि अरन्त इलय् च्या भपियाच्चन । थ्व सुथसिया च्या  
 खः कि न्हिनसिया च्या खः ? ज्यःनां सिधःगु खः ला मखु ला ?!”

विवेकयात लिसः बीत बुराबुरि निम्हेसिया भचा अलमल जूगु  
 इमिगु ख्वालं धयाच्चन । मछिपहः वयेकाः तःमांनं लिसः बिल— “थौं  
 जिपि निम्हं ज्वर वइ थें जुयाः म्ह-म्हि स्यानाः दनागु लिबात । पसलय्  
 दुरु नं फुनाच्चने धुंकल, उकें थौं हाकु-च्या हे .....”

भतिचा सासः थकयाः हानं खँ दतन— “न्हिच्छि याउँक च्वने,  
 अले हन्चा बहनिइ जक न्हयथ्याक्क ब्यलि थुइ का । छं नं च्या त्वने  
 ला हाकु-च्या जूसां ?”

“जि ला नकतिनि जा नया वयागु । च्या त्वनेगु ई मजूनि ।  
 अपाय्धंगु द्यःपूजा-पाः सिधःगु । छिकपि म्हं फु ला मफु ला ? उकुन्हु  
 तःबाः ला तसकं म्ह न्यः थें च्वं । जिमित हे तसकं त्यानु चाल ।  
 थाकुसा पाःब्व मकाःसां ज्यूगु खः ।”— मतिनां भय्ब्यूगु विवेकया नुगःखँ  
 न्यनाः निम्हेस्यां छुं ईतक लिसः मब्यू । मधासे च्वने मफुत मखा जुइ,  
 झसुकाः ततं तःबाःनं लिसः बिल— “छु याये बाबु, झी फुकी बाकातय्  
 जहान व जःपि यक्व दयावल । छं व जि जक सुं मदु । मेपिनि  
 फुक्कस्यां म्हाय्मचा, जिलाजं, भिनामचा, छय्मचा फुक्कं यानाः  
 सच्छि खाः-मखाः वयेधुंकल । जिपि थें न्याःपि बुराबुरितय्त ज्यां नं  
 थाकु, ध्यबां नं थाकु का । सहलह याःबलय् थुगुसी जिं देगुपूजा पाः  
 फये थाकुइ थें च्वं । सुं मस्त नं दुगु मखु धकाः खँ न्हयथनागु खः ।  
 फुकीत फुक्क हां न्याये थें हाल— ‘छि जक मखु झी फुक्क हे बुराबुरि  
 जुइधुंकल का । थाकुल धकाः झी बुराबुरितय्सं हे गुथि-गाना, पूजा पाः  
 फयेत लिचिल धाःसा अजा-अजिपिसं न्ह्याकाथकूगु रीतिथिति, संस्कार,  
 गुथिगाना, देगुपूजा फुक्क न्हंकाछ्वयेगु ला’ हँ । ‘पूजा यानाः दच्छिइ  
 छकः हे फुकीत ममुन धाःसा सुया सन्तान सु धकाः गथे म्हसी’ हँ ।  
 ‘सुया छैय् छुं हाथ्या वल धाःसा सुनां ग्वहालि याःवनी’ हँ । ‘प्वाः छगः  
 जक जायेकाः म्वायेगु खःसा प्यपां चूपिसं नं नयाच्चंगु दु’ हँ ।”

खँ कनाच्चंम्ह बुराम्ह तःबाःया मदिक्क थुसुथुसु मुसु वयाच्चंगुलिं  
 खँ कने मफत । भतिचा ई दिपाः कयाः हानं थःगु नुगलय् मन्थंगु खँ

पंकल— “हानं व थकालि धुसिबुरां गुलि ध्याचू नकल, स्यू ला बाबु ! गुलि जक सःस्यू जुयाः खँ ल्हाःगु ! ‘झीगु जिन्दगी छप्वाः त्वाःदेवा खःसा त्वाःदेवा च्याकाः जः बियाच्चनीगु झीगु रीतिथिति, संस्कार, संस्कृति खः । जः हे मन्त धाःसा त्वाःदेवा न्ह्याक्व तःजाः जूसां छुं मू मदु’ हँ । ‘व ला लीखू, कँयखू जक जुइ’ हँ । ‘सिनावनेबल्य सुनानं सम्पत्ति ज्वनाः वनी मखु’ हँ, ‘नां छता हे जक च्वनाच्चनी’ हँ । छु धाः छु धाः । अले छु याये बाबु, जिं पाः मफयां जिल ला ?”

सासः हे हहतिक खँ कनाच्चंगुलिं तःबाःया खँ त्वाःथलाः विवेकं न्वात— “म्वाःल, म्वाःल तःबाः ! नुगल्य स्याकादी मते । वँय म्दुगु मे याउँक ल्हवनीपि मनूतयगु खँया च्यूताः तयादी मते । च्या ख्वाउँल, भपिया दिसँ । ज्यःनाः-ब्यलि इलय थुयाः भपिया दिसँ । जि नं वनाछ्वये ।”

गुलि ताउत च्वन उलि हे बुराबुरितय्त तांन्वःबलय् मकः पंके थें जुइ धकाः विवेक छँय लिहां वल । ‘तःबाः-तःमांपि थथे छाया नयें सिनाच्चंगु जुइ ? न्हापा ला थथे याःगु गबलें मस्यू ।’ नुगल्य खँ वाःगुलिं तांन्वयाः ज्वनावंगु कुसा काये त्वःमन ।

कन्हय्कुन्हु अफिसं लिहां वयाः तःबाःया छँय कुसा कायेत थहां वन । थौं नं म्हिगः थें तःबाः-तःमांपिन्त सःतुसःतुं बइगल्य हे थहां वन । तःबाः-तःमांपिनि ख्वाः म्हिगः थें हे, वा वये मफुगु सर्गः थें सुपाँचं भुनाच्चन तिनि । प्यपा न्यापाति छुचुंमरि न्ह्यःने तयाः हाकु-च्यानाप नयाच्चन । विवेकं मछिंपहलं सः पिज्वयेकल— “अफिसं लिहां वयाबलय् लँकथं लाःगुलिं म्हिगः त्वःफ्यूगु कुसा काःवयागु तःबाः । थौं नं च्या त्वनाच्चंगु इलय जि थ्यन का । खुताः इलं मल्याये धुंकल । गुबलय् ब्यलि थुयादीगु ?”

तःमांनं चीहाकःगु लिसः बिल— “थौयात थ्व हे ब्यलि का बाबु । ज्या याये थाकु, छु याये ?!” ज्या याये थाकुगु खँ पत्याः जूसां ‘थौयात थ्व हे ब्यलि’ धाःगु खँग्वलं विवेकयात नुगल्य मुगःचां छ्याये थें जुल । फसं लप्ते हायेके थें विवेकया म्हुतुं नं आसे हे धाये मलावं नुगःया खँ स्वब्यात— “तःबाः-तःमांपिनि म्हिगः नं ज्यःनां याना मदी । बहनिइ व सुथय नं ज्यःनां-ब्यलि थुयादी ला मदी ला ? थथे मरि, च्या, पाउरोटी जक भपियां गाः ला ? चान्हय न्ह्यः वइ ला ? प्वाः खाली जुलकि

न्ह्यागु ल्वय् नं जुइफु । ज्या थाकुयाः जक ब्यलि थुया मदियागु खःसा थौ जिमिथाय् हे ब्यलि यायेत झासँ ।" विवेकया खँ न्यनाः छुं ईतक बुराबुरि निम्हेस्यां लिसः मब्यू ।

"जिमि चान्हय् न्हयः वइगु ई ला द हे मन्त नि बाबु । छु याये ! जिन्दगी थथे हे खः ।"— तःबाःनं चीसलं लिसः बिल । तःबाःया खँ थुइके मफुत विवेकं । तःमानं लिसः द्यतन— "थौयात मरि छुइ हे धुन । कन्हय् जा थुयाः नये । धन्दा काये म्वाः बाबु ।"

विवेकयात मेगु खँ द्यतने मास्ति मवल । कुसा कयाः हियूगु नुगः ज्वनाः छे पिहां वल ।

कन्हय्कुन्हु अफिसं छैय् लिहां वनाच्चंम्ह विवेकया पलाः तःबाःपिनिगु छैक्वय् थ्यनेवं गाडीया ब्रेक ज्वने थें तक्क दित । छैय् छकः थस्वत । मनू दुगु छै थें मच्चं । विवेकया नुगः गुताबीबः थें त्वाकःबुकः जुल । 'छकः थहां वनाः स्वःवने ला ? थौ नं ज्यःनां-ब्यलि थू ला मथू ला ? हानं गुलि तुचुतुचु वयाच्चंगु धाइ ला ? वने ला ? मवने ला ? मेपि ककाया मस्तय्सं वास्ता याःगु मखु । जि छम्ह मवसा सु वनी ? न्ह्यागु धाःसां थधा, बुराबुरितय्सं धाइगु च्यूताः तयां छु याये ?' विवेकं थःगु पलाःयात ची मफुत ।

विवेक थौ म्हिगः म्हिगः थें बइगलय्थ्यंक वने म्वाःल । तःबाः व तःमापि निम्ह च्वत-क्वथाय् हे नापलात । बुराबुरित वालातःगु आलु-घासानाप बजि नयेत ताःलाका च्वन । नये मलाःनि । शायद स्वाहानेसः वःगुलिं जुइ । विवेक न्हयःने वयेवं तःमानं म्हं मफुपहः यानाः खँ न्हयथन— "थौ बजि नये मास्तिवःगुलिं ..... । छं नं निगःचा बजि न न्है ।"

ज्यू-मज्यूया छुं लिसः मन्यँसे तःमानं थःपिन्त ब्व तयातःगु देमाचा निपातं निकूचा निकूचा आलु-घासा लिकयाः बजिया देमाचा विवेकया ल्हातिइ ज्वंकल । विवेकया व याये थ्व याये मन्त ।

आः धाःसा विवेकया बाम्ह खापां काना च्वं थें जुल । मयः धकाः बजिया देमाचा बैय् तये नं मछिन । नये धाःसा इमि नयेत न्हयच्याये धुंकूगु देमाचां आलु-घासा छता दुगु नं क्वताःबलय् ल्वसा निकूचा जुल । थलय् मदयाः मखा जुइ थथे थःगु ब्वं हे क्वताःगु ! न्हापा जूसा न्ह्यागु नःसां जा छप्यय् मनयेकं न्हयः मवः धाइपि बुराबुरित । थौं जिं

सीक हे स्वन्हु प्यन्हु दयेधुंकल क्वाक्क जा थुयाः मनःगु । गुबलै हन्चा थुयाः नये धाइ । गुबलै कन्हय् थुयाः नये धाइ । छाय् थथे यानाजूगु जुइ ? बुराबुरितय् कचमच जुयाः जकं जा मथूगु खः ला ? अथे ला मखु थें च्वं । जा हे थुइ मफयेक म्हं मफुगु नं मखु थें च्वं । नुगलय् खँ वायेकु वायेकुं गंक आलु-बजि नयाच्चंम्ह विवेकया हिकु थहां वल । लः त्वनेत करुवा कायेत्यंबलय् बुराबुरितय्सं नं करुवाया लखं बजि कथुं घुर्काच्चंगु खन । विवेक अन ताउत च्वनाः स्वयाच्चने मफुत । मांयात खँ प्वंकः वनेत विवेक हथाय् चाल । विवेकया नुगलय् च्वःप्वः लुइके मफुगु स्वःतिपाँय्या गथि च्युँच्युं वन । “दिसँ न्है !” बाहेकं तःबाः-तःमापिन्त छुं धायेगु खँग्वः विवेकया म्हुतुं पिहां मवल ।

छैय् थ्यंकाः लाकां हे मत्वःतुसे लबय् च्वंगु मेचय् थुचुक्क फ्यतुत । इताः फ्यनाच्चंम्ह मांयात खनेवं थःम्हं खनागु तःबाः-तःमापिनिगु पहःचहः न्हयब्बयाः धाल— “मां, छ छकः वनाः तःबाः-तःमापिनिगु खँ थुइका वा ले । छन्त जूसा खँ कनी ला !”

काय्यागु जिज्ञासां फूचाःगु खँ त्वाःथलाः मांनं लिसः बिल— “थौं जि न्हिनय् अन छैय् वनागु खः बाबु ! तःबाः म्हं मफु धकाः दनाच्चन । तःमांनं छकूचा खँ स्वांपुल— ‘तःधिकःम्ह काय् नं स्वलायात नये-त्वने यायेत छ्वयाहःगु दां देगुपूजा पाः फयाः फुत हँ । दां भचा मगात, छ्वया हजि धकाः तःधिकःम्ह काय्यात फोन याःबलय् नुगलय् थुंदिक्क, न्हाय्पं हिइक खँ न्यंकल हँ । दां छ्वयाहयागु लच्छि हे मदुनि गुलि याकनं दां फुत हँ । जिमि नं थन दां कमय् यायेत जिपि मेशिन जुयाः ज्या यायेमाः । स्वलातक नये-त्वने गाःगु दां स्वन्हु भवय् यानाः फुके धयागु नं दइ ला ? आः दां छ्वयाहयेगु पाः किजायागु खः नि । वयात हे धा रे !’ धकाः फोन तयाबिल हँ ।”

“चीधिकःम्ह काय्यात गुथिपाः फयाः दां फुत । दां भचा छ्वयाहजि धकाः फोनय् धाःबलय् ‘जिं दां छ्वयाहयेगु ई निला लिपा तिनि मखु ला बाः ? दाइनं छ्वयाहःगु दां गुलि याकनं फुकागु ? दां फुकेगु जुलकि छिकपिसं लिफः स्वइ मखु ।’ काय्नाप खँ ल्हानाच्चंम्ह छिमि तःबाःनं फोन हे तज्याइ थें च्वंक फोन बस्वानाः तयाबिल । उकै छिमि तःबाःया ख्वाः चमकंगु । प्यन्हु न्यान्हु दत हँ पिहां नं मवं । मचाखाचा

चीधी जुत्तले द्यांलाइ, उसाँय मदइ, इलमी मजुइ धकाः झीसं गुलि पिर कयाः इमित बलंकेगु ? थौं इपि फुक्क च्याःगु मत जुल, झी बुराबुरित किचलं दायेका च्वनेमाल, छु याये भमचा ! आः निलाति गथे गथे दु अथे अथे नया च्वनेमानि । धकाः तःमानं मिखाय् ख्वबि लःलः दायेकल । जितः ला छु धाये, छु मधाये जुल । बरु छ हे छकः वनाः भचा दां बियाः ग्वहालि यायेगु खः ला ? काइ ला मखु थें च्वं ।”

देगुपूजा पाः फयाः तःबाः-तःमांपिनि प्वाथय् क्वातुक्क जनी चीमाःगु खँ बल्ल विवेकं थुल । न्हाचःनिसें नुगलय् ग्वाराग्वारा दायाच्वंगु खँ प्वःचिना च्वने मफत । मांयात थुइके थें धाल— “अजा-अजिपिसं थः सन्तानतय् ब्यकुं च्याकाथकूगु इज्जत व सम्पतिरूपी संस्कार, धर्म, रीतिथिति फुक्कं क्वपुलां जुयाः धिकय्प्वः ज्वनाजुइ थें जुइधुंकल । ईब्यःकथं व भ्वाथःप्वः हिलाः चिकिचाधकं न्हू-कापःया थ्यासु तयावन धाःसा गुलि बांलाइ । न्ह्यागु गुथिगानाय् नं छ्वय्लाभू, ख्यलय् वनेगु, कन्हय्कुन्हु जाभू धकाः स्वन्हु स्वन्हुमछि भव्य न्यायेकेबलय् न्ह्याम्हेसितं थाकुयाच्वंगु दु । तर इज्जतय् घाः लाइ धया थें ग्यानाः साया घाः क्वखं मस्यू थें यानाः सुनानं म्हुतु मचायेकू ।”

छुं ई बिचाः याये थें वाताहां च्वनाः विवेकं हानं थःगु बिचाः मांयात प्वंकल— “आकिवं ला देगुपूजा पाः झीगु मखु ला मां ? झीगु पालनिसें स्वन्हुयंकं भव्य न्यायेकेगु मखु । ख्यलय् वनाः द्यः पूजा यायेगु छन्हु जक भव्य यायेगु रीत स्वनेगु यायेमाल । सँय् सच्छिं फै सच्छि नइ धयागु धापूयात ल्वयेक रीतिरीवाज यायेगु मखु । न्हापां छम्हेस्यां जक न्हूगु पलाः छी थाकु । लिपा ला फुक्कसित अःपुइगु लें खः नि । न्हापा थें भव्यज्या फुक्क थःथःपि मुनाः दयेकेमाःगु मखु । फुक्कं क्याटरिङ्गतय् हे जिम्मा बीगु खः । मू-पूजा जक फुकीत मुनाः भव्य न्यायेकेगु । फुक्कसित अःपुइगु छन्हु रीत जुइ । थथे यानाः ला देगुपूजा न्यायेकेगु रीति स्यनी मखु थें च्वं मखु ला मां ?!”

काय्यागु दुग्यंगु खँ न्यनाः विवेकया मानं ‘खः खः’ धया थें छयं ल्हुकुल्हुकु संकाच्चन । मांयागु नुगलय् छु दु विवेकं थुइके मफुनि ।

\*

ने.सं. ११३९ थिलाथ्वः ४

## कङ्झालय् ह्वःगु स्वां

छय् आशिषं न्हूँछया जग स्वँसानिसें अजिया नुगलय् तसकं स्वां ह्वः । ख्वालय् लय्ताः बाःवःगु ला उलिथुलि हे मदु । न्ह्याम्हं थःथिति व म्हस्यूपि मनूत नापलातकि छय्नं न्हूँछ दनाच्चंगु खँ कनेत हथाय् चाइगु । सुनानं न्यने हे माःगु मदु ।

न्हूँछया जग स्वनाः लिहां वसानिसें लां लां हे दत अजिया लिपा छकः हे स्वःवने मखंनि । थौं ढलान यानागु, थौं पिलर थनागु, थौं अंगः दनागु’ इत्यादि बुखँ बहनिइ जा नयेगु इलय् छय्म्हं अजियात कनाच्चनी । अजिया न्हूँछ हानं छकः स्वःवने मास्तिवःगु उलिथुलि हे मदु । थः याकःचा वनाः स्वःवने फुगु मखु । काय्-भौपिनाप वनेत पसः त्वःते मज्यू । छय् आशिषया न्हिच्छि लिमलाः । हाउजिङ्गया ठेक्कापट्टाया ज्या जूगुलिं नये-त्वने यायेगु तक नं ईब्यः मदु ।

शनिवार छन्हु त्यानु लंके थें आशीष न्ह्याबलें लिबाक्क पिहां वनीगु । छय्या च्या त्वनाच्चंबलय् न्हूँछ स्वःवने मास्तिवःम्ह अजिया नुगः प्वःची मफयाः छय्यात धा हे धाल— “बाबु आशिष ! थौं छ छँ दनाच्चंथाय् वनीतिनि हला ? जि नं छनाप वये न्है ! गुलि ज्या सिधल ? न्हूँछ गथे च्वन थें ? जितः तसकं स्वये मास्ति वयाच्चन । ज्यू ला बाबु ?”

अजिं मस्तय्सं थें लय्ताः-ख्वालं न्ह्यथंगु खँ आशिषं ‘म्वाः, मज्यू !’ धायेफइगु ला खँ हे मदु । छय्या तसकं यःम्ह अजि । आशिषं बांलाक हे स्यू— मांबौनं थःत जन्म जक ब्यूगु खः । मचानिसें थौतक दुःख सियाः सुसाःकुसाः यानाः ब्वलंकूम्ह ला अजि हे खः । छय्या न्ह्यागु ज्या यायेमाःसां थौतक अजिं हे यानाच्चंगु दु । द्यःया स्वां छय्या

छ्यनय् तयाबीबलय् छय् नं 'भागि याये ति !' धाइबलय् 'याकनं न्हूँ दने फयेमा' धकाः सुवाः बीगु खँग्वः अजिया म्हुतुइ हे घानातः थें । मू-दां स्वयाः नं लबः वःगु दामय् मिखा तःग्वः धया थें काय्-भौपि स्वयाः अतिकं यःम्ह छय् । खँक्वस्यां 'छय् ला अजिया नुगःचु' धाइगु ।

"अजि ! मोटरसाइकलय् बांलाक च्चें ! जितः क्वातुक्क ज्चें न्है ।" आशिषं सतर्क यानाः अजियात मोटरसाइकलं न्हूँ दनाच्चंथाय् थ्यंकल । छँ दनाच्चंथाय् थ्यनेवं 'आसे' हे धाये मलावं अजि थः हे स्वाराक्क मोटरसाइकलं कुहां वल । गपाय्सकं हथाय्गु न्हूँ स्वयेत अजियात ! 'ओहो । छँ ला दरबार थें च्वन बाः ! अझ ग्वःतँ जाः थकाइ तिनि थें मस्यु । छतँ, नितँ, स्वतँ, प्यतँ ..... ।' छँया जाः ल्याःखाखां थहां वनाच्चंम्ह अजि छति हे त्यानु मचाः । अजा-अजि, मांबौनं याये मफुगु ज्या तिप्यंका क्यंम्ह छय्या पुरुषार्थ खनाः आशिषयात मचाबलय् थें छ्यनय्, न्यतालय् पित्तुपियाः चुप्पा नये मास्तिवल अजिया । थःम्हं मचायेक हे अजिया सः पिज्वल— "स्याबास पुता !" छय्यात छकः घय्पुल ।

"अजि ! थन घौछि च्वनाः छँ स्वयाच्चनादिसँ । जि ज्या छगू सिधयेकाः वये न्है !" अजियात मेचय् फ्यतुकाः थःगु ज्याय् वन आशिष । अजिं छँया प्यतँजालं खनेदक्व पिनेया लु उखेथुखे न्ह्याइपुक्क स्वयाच्चन । छँ दनाच्चंपि ज्यामि, दकःमितय्त् मिखा ब्याच्चन । अजि याकःचा जूगुलिं दकःमि-नायः ज्या यायेगु त्वःताः अजिनाप फ्यतू वल । तसकं अजुगति चाःगु छता खँ अजिं मन्यँसे च्वने मफुत । अजिं दकःमि-नायःयाके न्यँ हे न्यन— "हुँकन कुनय् च्वनाः अंगः दनाच्चंम्ह नानि दकःमि खः कि ज्यामि खः ?" दकःमि-नायःनं अजिया खँ थुल, वास्यां न्हिलाः लिसः बिल— "व सरस्वती नानि दकःमि हे खः अजि । ज्या याइगु तसकं बांलाः । सुंक धयागु च्वनी हे मखु । वं याःगु ज्याय् कुं खिनेथाय् हे मदु ।"

थःगु मिखां स्वयाच्चनाः नं अजिया पत्याः याये थाकुरा च्वन । थःम्हं मचायेकं हे अजिं न्ववाना हल— "ओहो ! थौकन्हय् मिजं व मिसातय्गु ज्या धयागु छुं मपात का हला ? थःगु मतापं ज्या यानाच्चंगु गुलि बांलाः ! उखेंथुखें स्वये नं म्वाः । मिसामचा जुयाः नं दकःमि ज्या



गनं सयेकूगु ? गथे यानाः सयेकूगु ? याये नं गथे न्ह्याःगु ? ल्यासे-ख्याः  
जुयाः नं गुलि गम्भीर जुयाच्चंगु ? मेपि मिसापि ज्यामित जूसा गुलि  
हाऽ हाऽ हुऽ हुऽ यानाः ख्याः यानाच्चनी !”

अजिया उत्सुकतां भयब्यूगु न्ह्यसःत न्यनाः दकःमि-नायःनं खाउँक  
झसुकाः तल । सरस्वती नानिं थः बौयागु लजगाः दकःमि-ज्यायात  
पाछाःगु बाखं दकःमि-नायःनं बुलुहुं कनाहल— “छु याये अजि, मनूतसें  
जन्मया नापं कर्म नं ज्वनावइ धयातःगु धात्थे खः थें च्वं । नानिया बाः  
व जि मचांनिसें छपाः भुइ नयापि पासा खः । पासा शिवं हे जितः  
दकःमि-ज्या स्यनाब्यूगु खः । न्ह्याथाय् ज्याय् नं जिपि नापनापं वनेगु,  
बायाः गनं मवना ।”

स्वम्हं माचाछि न्ह्याइपुक्क न्ह्यानाच्चंगु हे खः पासा शिवया  
छैय् । सरस्वती न्यादैति दुबलय् सरस्वतीया मां मेम्ह सन्तानया मां  
जुइम्ह जुल । थुगसी ला काय्या बौ धायेके दइगु खः धयात्थे शिव  
तसकं लय्लय् ताल । तर व लय्ताःया खुसि ताईतक बाःवने मखन ।  
शनिश्चरं वयागु लय्ताः-खुसिचायात पनाः धः बाः वयाच्चंगु मंगालय्  
क्वफाना बिल । इमिगु जिन्दगी गुबलें मंगालं थहां वये मफुत ।  
सरस्वतीया मांया लां दनाः मचा आः बुइ थें अलय् बुइ थें जुयाः न्यान्हु  
खुन्हु व्यथा जुयाच्चन । गामय् मचा बुइकीगु अस्पताल मदुगुलिं मचा  
बुइकीपि गांया दिरिअजिपिनिगु कुतः व ग्वहालि कायेगु बाहेकं मेगु छुं  
लेंपु मदु । प्यन्हु न्यान्हु लिपा मचा बुल । व नं काय्मचा हे । तर  
जिवय् हि मगानावंगु व तःव्यथा जूगुलिं सरस्वतीया मांयात म्वाके  
मफुत । च्यान्हु झिन्हु लिपा काय्मचा नं सित । पासा शिवया छ्यनय्  
मिमलः-पामलखं कयाः निला प्यला ला वैय् थें हे जुल ।

सरस्वती बौम्ह ख्व जक ख्वयाच्चंगु खनाः जिल्ल जुयाच्चन ।  
मचां “बाः, छाया ख्वयाच्चनागु ? मां गन वन ? गबलय् वइ ?” धकाः  
न्यनीबलय् जिमि फुक्कस्यां नुगः तज्याइ थें जुइगु । गांया फुक्क  
मनूतय्सं “जूगु जुइधुंकल, छं न्ह्याय्यागु ख्याः स्वया च्वनेमाः । छ  
छम्ह छुं जूसा थ्व मचाया छु गति जुइ ? बिचाः या सा” धकाः शिवयात  
थुइकाच्चन । अस्पताल मदयाः थः कलाः व काय् अकालं सित धया थें

नुगः क्वतुंका च्वन । म्हयाय् पाछायाः गां त्वःताः शहरय् वल । शिवयात याकःचा छ्वये मफयाः जि नं वया ल्यू ल्यू शहरय् वया ।”

खँ कनाच्चंम्ह दकःमि-नायःया मिखां बाःवःगु ख्वबि लंचां हुयाः भचा सुंक च्वन । अजिया नं मिखा लः लः धायावल ।

भतिचा ई सासः फिनाः दकःमि-नायःनं हानं पासायागु बाखं छुनाहल— “पासा शिव शहरय् वयाः तसकं हे दुःख सियाः मां नं थः, बौ नं थः हे जुयाः सरस्वतीयात ब्वलंकल । मचायात घौछि हे मत्वःतुसे न्ह्याथाय् वंसां माकलं मचा क्वबिया जुइ थें शिवं नं मचायात लुकुं छिनाः जिल ला, ब्यकुं च्यानाः जिल, ल्हाः ज्वनाः जिल यानाः न्हयः न्हयः ल्यू ल्यू तयाजुल । ‘मेम्ह इहिपाः या’ धकाः न्ह्याम्हस्यां न्ह्याक्व हे धाःसां म्हयाय् नं दुःख सी धकाः छपा न्हाय्पनं न्यनी, मेपा न्हाय्पनं पित छ्वइ । सरस्वतीयात स्कूलय् छ्वयेधुंकाः नं स्कूल बिदाबलय् व स्कूल त्वःतेधुंकाः नं थः ज्या यायेथाय् हे हयातइगु । जिमिसं यानागु ज्या स्वरवं हे वं नं दकःमि-ज्या सयेकल । एस. एल. सी. पास यानाः नं सुथय् क्याम्पस वनाः न्हिनय् दकःमि-ज्या यानाः बौयात तिबः बियाच्चन ।”

“दुःखीम्हेसित हे दुःखं चाकःलि पां पां कासा म्हिताच्चनीगु खनिं अजि । दँबदँ न्ह्याइपुक्क सर्गतय् निभाः त्वयाच्चंबलय् छन्हु सरस्वतीया जीवनय् आकाझाकां वाफय्-ग्वःफय् वयाः इतःमतः जक कंकूगु मखु कर्मद्यः हे थाःगाः मन्त । सरस्वतीयात शनिश्चरं लिउतु लिनाच्चन । तःभ्वखाय् ब्वःबलय् जिपि ज्या यानाच्चनाथाय् लिक्क च्वंगु छँ दुनावयाः शिवयात ल्हात । जिपि ला भचा घाःपाः जक जुल । जिमित घाःपाः जूगु च्यूताः हे मतसे फुक्कस्यां अप्पा, चा, धलिं चीकाः शिवयात लिकयाबलय् सासः जक दनि, बांलाक खँ ल्हाये मफुत । अथेसां बल्ल बल्ल थुलि धाल— “छं मस्त मदु । जिमि म्हयाय्यात छं म्हयाय् नाला का !” पासा शिवं थुलि धयाः न्ह्याबलैया लागि मिखा तिसित । सरस्वतीयात जिमिसं म्हयाय् नालाः उबलय् निसें जिमिगु छँय् तया ।”

खँ कँकं दकःमि-नायःया म्हुतु गनावल । करुवां लः छक्वः घट्घट् त्वनाः हाकनं खँ छुनाहल— “निथाय् स्वथासं वःगु इहिपाःया खँ

नं दकःमि-ज्या यानाच्चंगुलिं त्वाःदल । मिजंमस्तयूत ला सरस्वती  
नानि यःगु खः । छैजःपिन्त दकःमि-ज्या याइम्ह मिसा भौमचा याये  
मयः हँ । सा, मेय् थें न्हिच्छिं पिहां वनाः ज्या वनीपि मिसातसें छै  
यानाः नइ मखु हँ । मचांनिसें मांबौ मदयाः सरस्वतीया न्हातिका  
खिउँगु गुबलें चमकं । उकिसनं वःवःगु इहिपाः-खँ चब्बूगुलिं ख्वालय्  
न्हिलासू हे मवल । जिपि निम्हतिपूनं सरस्वती नानियात गुलि ह्ययेका-  
दकःमि-ज्या त्वःताछ्व धकाः । खँ न्यंगु हे मखु । अझ वं हे जिमित  
ध्वाथुइका च्वनीगु । 'बौनं लःल्हाना थकूगु ज्या त्वःते मखु' हँ । 'ज्या  
यानाः नयेत छाया मछाले माःगु ? जिं थः मांबौयात लही मखन । जिं  
छिकपिन्त लहिनाः सुसाःकुसाः यानाच्चने' हँ । वयागु खँ न्यनेबलय्  
जिमि लयूताः-ख्वबि बाःवइगु । खःथाय् ज्यूथाय् सरस्वती नानियात  
लःल्हाये फतकि तिनि जिमिसं पासा शिवयात बियागु वचन पूवनी  
अजि । व दिं गुबलय् चूलाइगु खः मस्यु अजि ।"

भतिचा दिपाः कयाः दकःमि-नायःनं आस्कुति ख्वालं तीजक मेगु  
खँ छुत- "अजि ! बरु छिं सुं भिपि मिजंमचा म्हस्यूपि दुसा बिचाः  
यानादिसँ ले अजि ! सम्पत्ति दुपि माःगु मडु । इलम छगू दयाः  
ग्यानिम्ह जुलकि गात का ।"

दकःमि-नायःया अझ नं नुगलय् मन्ह्यंगु खँ अजियात कने  
मास्तिवःनि । बजि नयेगु ई जूगुलिं बजि-म्हिचा ज्वनाः सरस्वती नानि  
न्ह्यःने वल । बल्ल दकःमिया म्हुतुप्पाः तित ।

छय् आशिषया मोटरसाइकल थ्यंकःवःगु सः नं तायेदत । अजिं नं  
छयनाप लिहां वनेत पलाः न्ह्याकल । मि पुनाः नं ह्यंग्वाः जुइधुंकूम्ह  
सरस्वतीया माया वनापुसे च्वंगु ख्वाः मिखाया न्ह्यःने न्ह्यःने खने  
दयाच्चन । दकःमि-नायःनं न्यंकूगु कंमाय् ह्वःगु स्वांया बाखं अजिया  
नुगलय् थासां त्ययेकूगु थें जुयाच्चन । छाया खः मस्यु अजिया मतिनाया  
मूति सरस्वतीपाखे बाः वयाच्चन । पुलांगु छपु धापू- 'म्ह्याय् बीगु  
तःमिथाय्, भौमचा स्वयेगु चीमिपिथाय्' अजिया लुमना वल ।

च्यान्हु झिन्हु लिपा अजिं दकःमि-नायःयात नापलाः वन । दकःमि-  
नायःया न्हायपनय् लिक्क वनाः लयूताः-खँ प्वंकल । पत्याः याये हे

थाकुक्क लयताः-खँ न्यनाः दकःमि-नायः छकः थारा न्हुल । लिसः नं बि हे बिल- "न्हयलय् हे खंके थाकुगु म्हगस ज्वलय् क्यनाः सरस्वती नानिया नुगलय् कःति वायेगु ज्या यानादी मते अजि ! अजिया ययेवं छय् आशिषया यइ ला मयइ ला ? थौंकन्हय् ल्याय्म्हतय् कंमाय् ह्वःगु स्वां न्ह्याक्व बांलाःसां यइ मखु । प्लास्टिकया यइपुसे च्वंगु स्वां हे जक ययेफु ।"

दकःमि-नायःया खँ त्वाःथलाः अजिया ल्यूनेसं च्वनाच्च्वम्ह आशिषं सः थ्वयेका हल- "कका ! जिमि यःम्ह अजिं न्हयथंगु खँ जिं मन्यनी ला ? अजिया यःम्ह जितः नं यः ।"

छँया दथुअंगः दनाच्च्वम्ह सरस्वती खँल्हाबल्हा फुक्कं ताल मखा जुइ, लिफः स्वयाः आशिषयात व अजियात पुलुक्क स्वल । मुसुक्क न्हिलाः छयं क्वछुकल । यक्व ई लिपा ल्हाप्सा प्वालाक्क त्वयाः जः वये थें सरस्वतीया ख्वालय् नं न्हिलासू खनेवं दकःमि-नायःया नुगलय् नं न्ह्याइपुक्क स्वां हवल । पासा शिवयात लुमंकाः निफुति लः हायेकल ।

\*

ने.सं. १९३८ कौलाथ्वः १

## आमाइया चान्हय् मिलाया जः

“थौ शनिवारकुन्ह नं गन वनेत्यनागु छिपि ? छिमि तता नाइट ड्यूटीइ दु, लिहां वये फइ मखु हैं । स्वम्ह स्वम्ह म्हायपि दयाः नं जि याकःचा हे च्वनेमाः ।” शोभां दिक्क चाःगु सलं म्हायपिन्त न्वात ।

“बिदा जूगुलिं केहँचित छकः चाःहिका हयेत्यनागु मां । न्हिच्छि बनेधुंकल । मेबल्य् स्कूल वनेमाः । गनं वनेत ई दुगु मखु । वयात नं म्हाइपु जुइ नि । मखु ला मां ?” म्हायपि रत्नं नाइक लिसः बियाः निम्ह तताकेहँपिसं छे पिने पलाः न्ह्याकल ।

म्हायपि निम्हं पिहां वंगु स्वयाः शोभा लुखाया खापा तिनाः दुहां वल । भुतूज्या छता त्वःताः मेगु छुं ज्या मयाकुसे सुसाःकुसाः यानाच्वंम्ह स्वम्ह म्हायपिनि मां शोभा ।

शोभाया स्वम्हं म्हायपि छम्ह थे छम्ह तसकं ग्यानि । मेहनती, भलादमी जूगुलिं त्वालय् न्ह्याम्हसियां थः मस्तयत् न्वाये मालकि ‘शोभाया मस्त थे जुइ फयेकेमाः छिपि नं । हिरा, रत्न, मोति स्वम्हं हे गुलि जक भिपि मस्त ! शील-स्वभाव स्वःसा उत्तिकं बांलाः । अन्याःपि मस्त ला न्हय्गू त्वालय् माःवंसां दइ मखु थे च्वं । ‘शोभा ! छं गथे जक यानाः म्हायपिन्त छ्यलाः उत्तिग्यंक बलंकागु ?’ धकाः सुनानं न्यनीबलय् शोभाया ख्वालय् तिमिलाया जः जहां थिनावइगु ।

स्वम्हयंक म्हायप्या म्हायपि बूबलय् माजु, बाःजु, भाःत व छँजःपिसं शोभायात हेबाय्चबाय् जक याइगु मखसे छम्ह अपराधी हे खः ला धया थे भाःपिया च्वन । हेपय् याइगु नं छगू लागा दइ नि । म्हायपि मचाबलय् भचा हाकुखाः जूगुलिं अजा-अजिपिसं दुईचा, स्यौचा व दुसिचा धकाः नां छुनाबिल । व खँ लुमंलुमं हे थौतक नं नुगलय्

चिमल्ला थनातइगु थें च्वनीगु शोभायात । आमाइधुंकाः पुन्ही अवश्य वइ धकाः शोभां म्हगसय् नं खंके मफु ।

ख्खीदँ मदुनिम्ह जूसां न्हेदँ फहिले धुकूम्ह थें बुरि खनेदुम्ह शोभाया आमलि चुचु प्यानाः बाकी दनिगु च्याम्पति थें, क्वँय् व छयंगू जक दुगु वया ख्वाः । यःसिंघः थें यान्ताङ्ग यान्ताङ्ग च्वंगु वया म्ह । काय् बुइके मफुगुलिं छँया जःपिसं वयात कागती थें तिसी जिव्व तिसिनाः वांछ्वयाहःगु कागती-ख्वला थें पितिनाहःम्ह शोभा । भुतूज्या सिधयेवं त्यानु लंकेत छुं भतिचा ई दने धकाः फुंगाया छयं जक छु दिकल लुखाय् घण्टी न्यायेकूगु सः तायेदत ।

‘म्हयाय्पि ला याकनं हे लिहां वल का’ धकाः लय्ताःख्वालं खापा चायेकः वन । लुखा चायेकेवं शोभा गबाय्त तक इवाता जुयाच्चन । नर्स जागीर नयाच्चंम्ह तःधीम्ह म्हयाय् हिराया नापं निम्ह म्हयाय्पि रत्न व मोतिया ल्यू छम्ह बुराम्ह मनू छयं क्वछकाः दनाच्चंगु खन । क्वँय्कालि थें च्वंगु वया म्ह । ग्वाय्, दान्हि, सँ ताःहाकः जुयाः जिरिङ्ग च्वंगु वया छयं । ह्वागलां प्वागलां च्वंगु वसः, स्वयेबलय् नकतिनि हे जक न्यानाः पुंकाहःगु थें च्वं ।

मिजंत सुं मदुगु छँय् म्हस्यू नि तास्यू, स्वयेबलय् नं ल्वगिम्ह बुरायात छँय् दुत हःगु खनाः गुबलें तं मचाइम्ह शोभा म्हयाय्पिनाप तंचाल । तं पिहां वःसां शोभाया म्हुतुं सः पिमज्वः । व बुराम्ह मनूयात छाया छँय् ब्नाहयागु ? व सु खः ? धयागु अजुगति चाःगु न्हयसः जक शोभाया नुगलय् वाल्लइल्ल मिनाच्चन ।

शोभा, अंगः थें दनाः, त्वलहं न्हयःसू वःम्ह थें स्वया जक च्वंम्ह मांयात खनाः म्हयाय्पिसं थुइकल— मांम्हं व मनूयात म्हमस्यूगु हे खः धकाः । म्हयाय्पि मांयात हथासं खँ कनेत नं ग्यानाच्चन । अस्पतालया नर्स जागीर नयाच्चंम्ह तःधिकःम्ह म्हयाय् हिरां बुलुहुं खँ छुत— ‘मां ! व बुराम्ह मनूयात जि ज्या यायेगु अस्पतालया दीर्घ पाजुं प्यला न्याला न्हयः भर्ना यायेहःगु खः । टि. बि. ल्वचं कयाः मनू हे जुइ ला मजुइ ला धया थें च्वंम्ह वयात दीर्घ पाजुं अस्पतालया हयाः भर्ना यानाबिल । वया कलाः व काय् नं ल्वय् पुनी धकाः छँया दलानं हे थत मकाः हँ । थ्व मनू छिमि नं थः लाः । छिमि बाःया गामय् च्वंम्ह हे खः । बांलाक

बिचा: यानाब्यु न्है !' धा:गुलिं जिं शनिवार व मेमेगु बिदा दुसां  
अस्पताल वना: बिचा: या:वना च्वना । दीर्घ पाजुया छँ नं बा:पिनिगु  
गामय् धा:गु मखु ला ? झीत न्ह्याबलें ग्वहालि यानाच्च्वंम्ह दीर्घ पाजुं  
धासेंलि याये हे माल नि मखु ला मां ?"

शोभां म्हयाय्यागु खँ न्यना जक च्वन । छुं लिस: बीफुगु मखु ।  
थ: भा:तं मेम्ह कला: इहिपा: याना: काय् छम्ह नं दत धा:गु दीर्घ हे  
कनात:गु खं शोभाया न्ह्यपुइ गं थात । तम्वं धाये ला, बाध्यतां धाये  
थ: मस्त ब्वलंलिसे बौया खँ न्यनेस:बलय् 'छिमि बा: उबलय् हे मन्त,  
गुबलय् छिपि थन शहरय् वल' धका: लिस: बियागु नं शोभाया नुगलय्  
नकतिनि हे मिमलखं क:गु थें जुल ।

म्हयाय् हिरां थ:गु खँ स्वानातुं यंकल— "वासलं ल्वय् क्वलाना  
वल्लिसे व बुराम्हं जित: तुंक स्वया: मिखाय् ख्वबि जायेका हइगु ।  
स्वयेबलय् नं छुं न छुं ज्या स्यंका:-द्वंका: प्रायश्चित्त यानाच्च्वंम्ह मनू  
थें । छन्हु जित: तसकं अजुगति चायेक व बुराम्हं न्ह्यस: तल— 'नर्स  
नानी ! छं निम्ह केहँपि व मां दु खला ? छिमि मां म्ह हे फु मखा ?  
छं निम्ह केहँपिनिगु ख्वा: छक: जित: क्यने हजि न्है !' वं झिपतिं  
प्यपुंका: ज्वज्वलपा यासैं ख्वख्वं धाल । ताईतक लां लां सुसा:  
यानाच्च्वनागुलिं ख: ला, थ: बौ मदुगुलिं ख: ला, वा झीथाय् गामय्याम्ह  
मनू धा:गुलिं ख: जि नं व बुराम्हेसित तसकं माया वन । केहँपि  
नापलाके यंकाबलय् नं व यक्व ख्वल । 'जिपि खनकि छाय् ख्वयेगु ?  
छि सु ?' धका: गुलि न्यना । 'छिमि दीर्घ पाजुयाके न्यना स्व !' थुलि  
हे लिस: वं बिल । थौं अस्पतालं डिस्चार्ज या:गुलिं गामय् वनेन्ह्य:  
छक: मानं म्हस्यू ला धका: न्यनेत 'म्हा' धायेक ब्वनाहयागु ।"

म्हयाय्यागु खँ न्यनावलिसे शोभां बुराम्हेसिगु ख्वा: तुंक स्वस्वं हे  
जिरिङ्ग च्वंगु वया सँ ख्वालं चिलावं थें च्वन । तुं थें गा: वंगु वया  
न्यता: ला-हिं जाया: हृष्टपुष्टगु ख्वा: लुयावल । शोभा छक: मू हाल ।  
ग्याक्क म्हगसय् खना: थारा न्हूम्ह थें जुल । मि पुना: नं ह्यंग्वा:  
जुइधुंकूम्ह शोभाया मिखाय् थ्यंमथ्यं सुइन्यादं मल्याक न्ह्य:यागु अतीतया  
लु न्ह्य:ने न्ह्य:ने चा:चा: हूवल ।

सुइन्यादं मल्याक न्हयः शोभा छम्ह छुं हे मस्यूम्ह गामाःनी मिसा धयागु लुमना वलकि थः हे पत्याः जुइ थाकु । गांया रीतिकथं शोभायात न्यासि वनेमाःगु, गामय् च्वम्ह सुइन्यादँ दुम्ह मिजंनाप इहिपाः यानाः मांबौनं माजुबाःजुपिनाप लिकाछ्वःगु ।

झिन्यादँया बैसया इलय् तिसा-वसतं छायेपी दयाः लय्लय् तातां माजुबाःजुपि, छँजःपिनाप न्हयाक्व न्यासि वंसां शोभाया त्यानु मचाः । शोभां मस्यू वया पलाः गुलि न्हयात उलि हे वया तुति ध्वपय् दुना वनाच्वंगु दु धकाः । गामय् थ्यँसानिसें भमचाया ज्याकथं सुचुकुचु यायेगु, जाथु, कँथु जक यायेगु मखु, सा-मेय्, दुगु, च्वलय्चातय्गु गः इयूवनेगु, घाँय् लःवनेगु, बाघौनं मल्याक न्यासि वनाः लः ल्हय्याहयेगु ..... फुक्क ज्या शोभाया छ्यनय् क्वचित । मांबौ लुमंकाः ख्वख्वं ज्या यानागु लुमनावलकि थौतक नं शोभाया मिखां ख्वबि तिकि ननीगु ।

दच्छि लिपा झिंखुदँ दुबलय् शोभा मचाया मां जुल । म्हयाय् बुइकल धया थें छँजःपिनि व भाःतया ख्वाःपाः हासापाः थें जुल । त्वहः मदु त्वहः चिनाः ज्याय् कुं खिनाः ब्वः बियाः त्वापु याइगु । भाःतया ख्वालय् न्हयाबलें हाकु-सुपौय् । चान्हय् धाःसा नरपशु थें, न्हिच्छिया ज्यां त्यानु व थाकु धयागु छुं च्यूताः मदु ।

निदँ लिपा शोभा हाकनं निगू जिउम्ह जुल । प्वाथय् दुगु स्युसानिसें 'थुगुसिइ नं म्हयाय् बुल धाःसा छँय् च्वनाः नये गाइ' धकाः धुच्चापतिकं न्यंकीगु । छु मयः धाल व हे जुल । थुगुसी नं म्हयाय् हे बुल । इमित ला त्वहः द हे दत । मचाबू जिवय् नकें-त्वंके माः धयागु ला इमिगु नुगलय् हि हे मदु । बंश न्हयाकेत काय् बुइके मफुम्ह धया थें हाम्वःयात पहाड दयेकाः निगति निगति खँय् नं भाःतं दयेगु यानाहल । थःछँ वने धयां— 'उलिमछि दां फुकाः इहिपाः यानाहयागु, काय् छम्ह मबूतले गनं नं वने दइ मखु हँ । माजुबाःजु, भाःतं ब्यूगु मिब्बालां पुकाः शोभा सी-म्वायेया दथुइ यग्गाना च्वन ।

शोभा छम्ह मिसा मखु, मनू मखु, काय् बुइकेगु मेशिन न्यानाहःगु भाःपिया च्वन छँया मनूतय्सं । दुरु त्वंम्ह मचा दच्छि हे तिनि दत, शोभाया गर्भय् हानं मचा दत । न्हयाक्व गर्भय् दुसां मानं जन्म जक बीगु खः । बूँख्याःचा थें सुं ज्यानाः धिकय् नं भुनाः गर्भय् स्वथने ज्यूगु



मखु । सुयागुं सराः हाये थें थुगुसी नं म्हयाय हे बुल । अले ला छु मानि इमित ? जि जक ज्यूसा शोभायात छ्वालिप्वाः थें च्याकाछ्वये मास्तिवः इमि । छन्हु आमाइया चान्हय्, गांया मनूतय्सं मखनीबलय् चान्हय् हे स्वम्हं म्हयायपि नापं शोभायात नं पितिना हल ।

स्वम्हं मस्तयत्त पर्सिच्चतं भुत्तुभुनाः लुखा-पिनेसं पाछायाः शोभा छैनं पिहां वल । पिहां मवनां नं छु याये ? न्हियान्हिथं कसा फयेगु वया शक्ति हे मन्त । गांया फुकी दाजु धायेमाःम्ह दीर्घ दाइ लैय् नापलाःगुलिं शोभां फुक्क खँ प्वंकल । थः केहँ हे भाःपियाः दीर्घ दाइनं थःछैय् मछ्वसे काठमाडौलय् थःगु बालं-क्वथाय् ब्वनाहल ।

काठमाडौंया बालं-क्वथाय् इमित तयाः दीर्घ दाइ पासापिनिगु बालं-क्वथाय् च्वंन । कन्हय्कुन्हुनिसें गुरुद्वारय् बुराबुरि ल्यू ल्यू तयाः सुसाः यायेगु ज्याय् तयाबिल । तिछुंमाः थें वंथाय् स्वम्ह मस्त ज्वनाः ज्या याःगु स्वये मफयाः बुराबुरि सुसाःकुसाः याःथाय् हे नयेगु, त्वनेगु व च्वनेगु थाय् नं गुरुद्वारया धर्म दुपि मनूतय्सं मिलय् यानाबिल । मस्त बलना वःलिसे ध्यबा पुले म्वायेक सरकारी स्कूलय् नं तयाबिल । ब्वंसां मब्वंसां प्यघौ न्याघौ ला मस्त धुक्कं तयेदत धया थें शोभाया नुगलय् बुलुहुं स्वां हवल । तर मस्त ग्यानि जुयाः थौतक न्ह्याबलें न्हाप हे जुयाः ब्वनाच्चन । अतीतया समुद्रय् दुब्वानाच्चंम्ह शोभा वर्तमानय् पिहां वये हे त्वःमं । छुं हे न्वमवासे त्वलहं बुराम्हेसित जक स्वयाच्चंम्ह मांम्ह खनाः म्हयायपि थान्हा न्हुल । म्हय् गिलिगिलि यानाः “मां ! मां ! छन्त छु जुल ? छाया न्वमवासे च्वनागु ? व बुराम्हेसित म्हस्युगु खः ला ?” धकाः न्यन ।

शोभां म्हयायपिन्त फुक्क खँ कने मफुसां थुलि सः पिज्वयेकल— “खः मस्त ! वयात बांलाक हे म्हसिल । स्वम्हयंकं म्हयाय् या म्हयाय् बुइकाः काय् बुइके मफुम्ह अवला मिसाया भाःत खः व । सीत्यंम्ह मनूयात सुसाःकुसाः यानाः म्वाकूपि स्वम्ह म्हयाय्या बौ खः व बुराम्ह ।”

इमिगु क्वथाय् आमाइया खिउं बै इलाब्यूगु खः । आमाइधुंकाः मिलाया जः ह्वलाब्यूगु खः । म्हयायपिसं थुइका काये मफुत । स्वम्हं म्हयायपिसं बुराबुरितयत्त निस्तब्ध जुयाः स्वयाच्चन । बुराम्ह ताख्वाँय् जुयाः न्यनाच्चन ।

\*

ने.सं. १९३८ गुलागाः ३०

## विर-थापितया खालु-सवाः

तःदँ लिपा लन्डनया लजगालं ई कयाः दिलबहादुर व वया तिरिमयजु चन्दा थःगु छैय् दुस्वः वल । थःगु छैक्वय् थ्यंबलय् लुखाय् तालं ग्वयातःगु खन । थःगु छै थःत पितिका च्वना थें ताल । दिलबहादुर व चन्दा निम्हं थःम्हं हयागु सामानत पसः ब्वये थें लुखान्दयःने ब्वयाः छैछखां बालं कयाच्चंम्ह केदारमानयात पियाच्चन ।

‘अहो, दिलबहादुर ! नकतिनि थ्यंगु ला ? मस्त महया ला ? फुक्कसित म्हं फु ला ?’— जःलाखःलापिनिगु छगू हे न्हयसः रेकर्ड चायेके थें जुल । धन्य ताउत पी म्वाःल । केदार व वया कलाः निम्हं मोटरसाइकलं थ्यंकःवल ।

‘दिलबहादुर दाइपि थ्यंकःझाइगु छुं खबर हे मदु । फोन छकःसां यानादीसा ज्यूगु खः । तापाक वनेलाःसा जकं गबाय्त पीमालीगु जुइ !’— केदारया कलातं अजुगति चाःगु सलं म्हुतु न्यायेकु न्यायेकुं लुखाया ताःफ्वः चायेकल, स्वयेबलय् दिलबहादुरपि उमिगु छैय् हाय्म्वःपाहां जुयाः वःगु थें च्वं । केदारमानपि हे छैथुवाः खः ला धया थें च्वंगु पहः खनाः दिलबहादुरपिनिगु नुगलय् इमूचां न्याःथें जुल ।

‘वये-च्चने यायेत निकू क्वथा तालं ग्वया मथकूगु जूसा जकं थुमिसं .....’ नुगलय् खँ वायेकाः दिलबहादुरपिसं थःगु क्वथाया ताः चायेकल । च्या व लः ज्वनाः केदारया निम्हतिपुलिं क्वथाय् वल । च्या व लः ला इपि क्वथाय् दुहां वयेत जक थें च्वं । इमिगु ख्वालय् हथासं न्यने मास्तिवःगु न्हयसः यत्थें खनेदु ।

‘छाय् दुःख यानादिया ? जिपि पिहां हे वनेत्यनागु । नये-त्त्वने नं पिने हे याःवने धकाः च्वनागु’— दिलबहादुरं इमित म्हुतु हुइके थें धाल ।

“छता खँ न्यनेमाःगुलिं याकनं थहां वयागु ।”- केदारमानं हथाय्चाः-  
पहलं नुगःखँ न्ह्यथन ।

“थौ वया, थौ हे न्यनादीमाःगु छु खँ खः, धयादिसँ केदारमानजु !”-  
लिसः बियाः दिलबहादुरया म्हुतु कमत्यूनि, केदारमानं छगू सासलं  
थम्हं न्यनागु खँ न्ह्यथन- “छिकपि थ्व छँ मीत झाःगु धकाः न्यनागु,  
खः ला मखु ला ? खःसा मेपि मनूत मालादी म्वाःल । जिमिसं हे थ्व  
छँ न्यानाकाये । मेपि मनूतय्सं गुलि मू तल उलि हे जिमिसं नं मू  
पुले । दलालतय्त छाये दां नकेगु मखु ला दिलबहादुर दाइ ? जिपि  
थ्व छँय् च्वनागु नं झिदं मयाक दयेधुकल ।”

बालं च्वःबलय् सुटकेश छगः ज्वनाः द्वाहाँवःपि मनूत । छँक्वय्  
खासाया सामानत ब्याः बँपसः तयाः लजगाः न्ह्याकूपि मनूत । थौ  
थःगु छँ मीगु खः ला धकाः न्यनेफुगु खनाः दिलबहादुरपि वाताहां  
जुयाः व धाये थ्व धाये मसियाः थुलि जक न्ववायेफत- “थ्व खँय्  
जिमिसं बिचाः हे मयानानि ।”

दिलबहादुरपि पिहां वनेत लाकां न्ह्यासँलि केदारपि कुहां वन ।  
हथासं क्वथाय् तालं ग्वयाः कुहां वनेत्यंबलय् ‘दिलबहादुर दाइ’ धकाः  
सः ब्युब्युं हानं सुं मनू थहां वल ।

“छिकपि सु थें ?” धकाः न्यने हे मलाःनि थहां वःपि मनूतसँ  
थःथम्हं म्हसीका बिल- “जिपि हुं न्ह्यःने च्वंगु छँय् बालं च्वनाच्वनागु  
खः । छँक्वय् च्वंगु कोल्डस्टोर पसः जिमिगु खः । छिकपि छँ मीत  
लन्डननिसें झाःगु खँ न्यनाः जिपि हथासं थहां वयागु । थ्व खँ खःसा  
मेपि ग्राहकत मालादी म्वाःल, जिमित बियादिसँ । बरू जुयाच्वंगु मू  
स्वयाः भतिचा अप्पः मू तयाबी दाइ, मज्यू ला ?”

“थ्व खँ लिपा ल्हाये न्है ..... !”- फ्यासुगु लिसः बियाः दिलबहादुरपि  
हथासं कुहां वन । छँ मीत वयागु खःसां नं सुयातं क्वातुक्क मधयानिबलय्  
हे छँ न्याइपि मनूतसें भुंवःगु खनाः दिलबहादुर तसकं छक्क जुल ।  
देय्या कुंकुलामय् च्वंपि मनूतय् काठमाडौं शहरय् छक्का छँ न्यायेफतकि  
छ्यं धस्वाइगु, न्हाय् म्वाइगु, लजगाः तब्या जुजुं वनीगु खँ दिलबहादुरं  
थुल ।

सरप्राइज बीगुकथं दिलबहादुपिनि मिलय् जूपि पासापि नापलायेत  
मखं व असं त्वाःपाखे पलाः न्ह्याकल । मखनय् थ्यंबलय् उमित झुमिं  
यंकू थें ताल । झिदैया दुने मखं त्वाः ला यक्व पानाच्चन । प्रकाशया  
छैया थासय् अफिस-कम्लेक्स-भव्यगु छें खन । पुलां-छें मियाः प्रकाशपि  
गन च्वं वन जुइ धयागु नुगलय् खँ वायेकाः असंया लँपुइ पलाः छित ।

असनय् च्वंम्ह मिलय् जूम्ह पासा देवेन्द्रया छँक्वय् थ्यंकाः दिलबहादुरं  
घन्टी न्यायेकल । स्वयेबलय् नं मारवाडी साहुजी थें च्वंम्ह बुराम्ह  
मनुखं खापा चायेकाः वाताहां स्वयाच्चन । दिलबहादुरं नेवाःभासं हे  
न्यन— “थ्व छँ देवेन्द्रयागु मखु ला ? छकः सःता बियादिसँ ले !”

व बुराम्हं फुँइक्क च्वनाः झ्यातु-पहलं लिसः बिल— “वय्कःपिसं थ्व  
छँ जिमित मिया वनेधुंकल ।” थुलि धयाः व मनू खापा तिनाः थहां वन ।

नखःचखः, थी थी जात्रा, नेवाः-संस्कार व संस्कृतिया धुकू,  
नेवाः-म्हसीकां भय्ब्यूगु मखं, असं त्वाःया थाय्बाय् सदांया लागि  
विस्थापित जूगु खँ न्यनाः दिलबहादुरया तसकं नुगः थुंदित । सरप्राइजकथं  
पासापि नापलायेगु दिलबहादुरया ग्वसाःयात फसं पुइकल । छँय् लिहां  
वनाच्चंम्ह दिलबहादुरया मिखाय् असं, मखं, थःने, क्वःनेया त्वाल्य्  
दछियंकं जुइगु नेवाः-जात्रात इवःइवः दंवल । क्वःनेया चिकंमुगः व  
मजिपाः त्वाःया दथुइ लाःगु थःगु छँ मियाः दां ज्वना वनेगु ग्वसालं  
थःत हिस्याना च्वन थें ताल दिलबहादुरयात । दिलबहादुर छँय् थ्यनेवं  
पासापिन्त थः नेपाः थ्यंगुलिं नापलायेत इनाप यात । दिलबहादुरया  
मेसेज खनेवं कन्हय्कुन्हु पासापि देवेन्द्र व प्रकाश हथासं नापलाःवल ।  
म्हं फु मफुया बुखँ न्यनेकने धुंकाः दिलबहादुरं पासापिन्त म्हिगः  
नापलाः वयां म्हाइपुक लिहां वयेमाःगु खँ न्ह्यथन । पासापि निम्हेस्यां  
न्हातिका खिउँकाः छ्यं क्वछुकल । प्रकाश व देवेन्द्र निम्हेस्यां पुलांछँ  
मियाः न्हूँछँय् विस्थापित जूसां नं खालु-सवाः कयाच्चन धकाः दिलबहादुरं  
थुइकल । न्यने हे म्वायेकं पासापिसं पालंपाः थःथःगु नुगःघाः उलाक्यन ।

न्हापां देवेन्द्रं खँ न्ह्यथन— “जिपि प्यम्ह दाजुकिजापि जूगुलिं छँ  
इनाकायेत मछिनाः छँ मीमाःगु बाध्यताय् जि तक्यन । जिं स्वयम्भूया  
ल्यूने रिगरोडया पिने दंक जग्गा न्यानाः छँ दंवना । जग्गा न्यानाः नं

छँ दनेबलय् उलि ध्यबां ला न्ह्याये हे मदु खनिं । व हे जग्गा बहः  
तयाः नीगू लाख दां बैकय् त्यासा कयाः तिनि बल्लं छँ दने क्वचायेका ।  
न्हूछँय् च्वनाः प्यला खुला लिपा मस्तय्सं व न्हिनय् हे शून्यगु थासय्  
म्हाइपुका हल । न्ह्याबलें जात्रा व नखःचखः थें च्वंक न्ह्याइपुगु असं  
त्वाल्य् बलंपि मस्त । न्हूगु थासं स्कूल वये-वने यायेत तसकं थाकुल ।  
लँय् जाम जुइबलय् ला मस्त छँय् थ्यनीगु तसकं लिबानाः नयेपित्याकाः  
ख्याः हे वँचुका वइगु । जिमित नं अफिस वये-वनेत तसकं हे थाकुल ।  
च्यादँ व खुदँ जक दुपि मिसामस्त जक छँय् च्वनेमाःगुलिं ग्याःचिकुं  
पुनाः न्हियान्हिथं भुग्लुं च्वनावन ।

छन्हु मवँसै मज्यूगु इलय् वनाः इलय् हे लिहां वये धकाः जिपि  
निम्हं भव्य वना । छाउनीइ थ्यंबलय् तसकं वा वल । उबलय् हे  
मोटरसाइकल नं स्यन । ट्याक्सी छगः दुगु मखु । बसय् च्वनेफुगु  
मखु । बसय् मनूत थुलि क्वचिनाः हइ कि बस हे छ्वर्मुया वइ थें  
च्वं । बुराबुरि व मस्त ला सँन्या थें पति चिनी थें च्वं । मिसापि व  
मिसामस्तयत् ला मनूतय्सं न्ह्याक्व धितुधिनाः अभद्र व्यवहार याःसां  
सुनानं न्ववाये फुगु मखु । फुक्कस्यां छँय् थ्यंकेमाःगु दु । उकिं जिपि  
वा वयाच्वंसां स्यंगु मोटरसाइकलयात घ्वाघ्वां न्यासि हे वनाः छँय्  
थ्यंकःवना । तसकं लिबात । मस्त ला ग्यानाः खापा हे चायेकः मवः ।  
नां कयाः सःताः तिनि बल्ल खापा चायेकः वल । कन्हय्कुन्हु चीधिकःम्ह  
म्ह्याय् ग्यानाः ज्वर हे वयेकल । न्हूपि मनूतयत् पुलांपि मनूतय्सं सह  
हे याइ मखु खनिं । मिसामस्त जक च्वनीगु सियाः गुबलें झ्यालय्  
चागःचां कयेकाहइगु हँ, गुबलें सुलि पुयाहइगु हँ । गुबलें ला अस्यःपि  
मिजं-मस्तय्सं लुखाय् घन्टी बियाः बिस्सुं वनीगु हँ । छन्हु थे छन्हु  
न्ह्याबलें उथें जुइ मखु धकाः मस्तय् मां, जिमि कलातं जागीर हे  
त्वःताछ्वल । जि याकःचिगु कमाइन छु निं यायेगु ? बैकया त्यासा  
पुलेगु ला गन ब्याज तकं पुले मफयाः वाथावाथा कनाच्वन । खापां  
काःम्ह भौचा थें जि जुल ।— देवेन्द्रं ताःहाकःगु झसुकाः तल ।

गथे देवेन्द्रया ख्वालय् झसुकालं भुत्तुभुनाच्वन, अथे हे प्रकाशया  
ख्वालय् नं औशीया किचः बांलाक खनेदु । प्रकाश न्वमवासे च्वनाच्वंगु

खना: दिलबहादुरं मन्यँसे च्वने मफुत । दिलबहादुरं बुलुहुं न्यन— “प्रकाश, छं ला निम्ह जक दाजुकिजा खः, चीखागु छँ जूसां निम्हेसित मगा: हे ला मजू थें च्वं । छिमिसं छाय् मियागु ? छ गन च्वं वना ले ?”

प्रकाशया छँया खँ कने मास्ति मवःसां सः पिज्वयेका हल— “छु याये पासापि ! दाजुकिजाया खँ मिलय् जूसा ला छँ मी माली हे मखु नि । छँ मी हे मखु नि । दने मफुतले ज्यूज्यूथे च्वने धका: दाइयात गुलि कर याना, दाइनं जितः नुगलय् थुदिवक लिसः बिल— “छं ला काय्-म्याय् सुं मदु, न्याथे याना: च्वंसां ज्यू । जि ला काय्पि तःधी जुइधुकल । इमित क्वथा दयेके हथाय् जुइधुकल । म्याय्—जिलाजपि नखत्या सःतेबलय् थाय् मगाना: मछालापुसे च्वं । मी मास्ति मवःसां जिगु भाग नं छं हे न्याना का । जिं छँ न्यानाकाये फुगु मखु । जि करं हे क्यन । छँ मीगु ज्याय् सही तयेमाल । .... जि ग्वंगःबुँया बस-स्टपल्यूने छँ न्याना: च्वं वना । न्हापांनिसें मांबौपि जिनाप च्वनाच्वंगुलिं इमित नं न्हूँछँय् तयेयंका । तर मांबा:पिनि ख्वा: चमकं । मांबा:पिन्त छँय् कुने थें जक जुल हँ । बस, ट्याम्पुइ जुइ मसःगुलिं गनं छपला: पिहां वने मखन हँ । इमि ल्यूल्यू न्याथाय् नं जिपि वने ला:गु मखु । तिथिकथं थी थी झीगु नखःचखःबलय् थाय्थासय् दैके वनेमा:पिं मांबा:पि । विहारय् वना: बाखं न्यनेमा:पि इपि । मांबौपिन्त ला तुतिइ सिखलं चिनातये थें जुया: एकान्तय् च्वंगु छँय् च्वने हे मं मदयेकल ।

छन्हु देगुपूजा वनेमा:गु त्वहः चिना: दाइयाथाय् वंपि मांबा:पि लिहां वये म्हायेकल । निला प्यला लह्यूबलय् छँ मियाबलय् कयागु मांबा:पिनिगु भाग दां लित बीमाल धका: दाजु-तता:जुपि जिपिनाप न्हिच्छिं त्वा: वयेगु यात । छँ न्यानाबलय् मांबा:पिनिगु दां नं फुकेधुन । गथे याना: व दां लित बीगु ? बालं कया: तयेमा:सां शहरय् दुने हे तयेहये धका: ह्ययेका: मांबा:पिन्त लित हया । तर जितः इलं म्वाय् चुइकल । दाइपिथासं लित हयागु चान्हय् हे तसकं प्वा: स्याकूगुलिं बा:यात अस्पताल यंकेमाल । स्वथाय् प्यथाय् एम्बुलेन्सयात फोन यानां नं इन्गेज सः जक वयाच्वन । थःगु त्वाल्य् जूसा न्याम्हेसिगु गाडीइ सां अस्पताल ब्वाकेदइगु, अन न्हूगु थासय् बांलाक छुं स्यूगु मखु ।

बल्ल छगः एम्बुलेन्सनाप खँ जुल, एम्बुलेन्स थ्यनेसाथ बाःयात अस्पताल  
 ब्वाका । लँय् छटपट छटपट जुजुं हे बाःनं न्वमवात । अस्पताल  
 थ्यनेवं डाक्टरं जाँचय् यानाः छ्यं हीकाः लिसः बिल । बाःयागु ख्वाः  
 त्वपुनाः धाल- 'बाघौति न्ह्यः जक अस्पताल थ्यंकेहःगु खःसां म्वाके  
 फइगु जुइ । वय्कःयात अपेन्डिसाइटिस जुयाः प्वाः स्याःगु खः ।  
 तुरुन्त हे अपरेशन यायेखंगु जूसा म्वाइगु जुइ ।' जिं थःथम्हं कपाः  
 दाया च्वनेमाल ..... थौकन्हय् दाजु-तताःजुपिसं प्यम्ह मनूया न्ह्यःने  
 'मांबौया अंशभाग कयाः नयेसः, बिचाः याये मसः' धकाः न्यंकीबलय्  
 जिगु नुगलय् कःति वाः थें जुइगु । थौकन्हय् जितः नं व तख्खागु  
 न्हूछें हिस्याना च्वं थें जुइगु । न्हिछिं व हे असं त्वाःया पुलांगु छँ जक  
 मिखा-न्ह्यःने दंवइगु । बुरिम्ह मांया लागि नं जिं हानं थःगु त्वालय्  
 लिहां वनेगु बिचाः याना, बालं च्वनेमाःसां ।"— प्रकाशयागु म्हुतु कतित ।

छुं ईतक अन क्वथाय् मुलु कुतुं वंसां सः तायेदइ थें शून्य जुल ।  
 भतिचा झासु लनाः प्रकाशं हानं तीजक सः पिज्वयेकल- "दिलबहादुर,  
 छं नं थःगु छँ पुलां जुल धकाः मियाः दां ज्वनावनेगु ग्वसाः ग्वयावयागु  
 जूसा छ कन्हय् हे लिहां हुँ । मखुसा छंगु बुद्धि नं जिमिगु बुद्धि थें  
 दांया किलं नयाः भ्वाभः जुइ । अजा-अजि, मांबौपिसं हिचःति हायेकाः  
 दयेकाथकूगु पुलांछँया मू जिमिसं थें छं नं मथुयावनी ।"

देवेन्द्र व प्रकाशया दुनुगलंनिसैं थ्वःगु स्याःनुगःया सः न्यनाः थःगु  
 ग्वसाः पासापिन्त कने मफुत । पासापिनिगु न्ह्यःने दराज चायेकाः  
 प्लेनया टिकट लिक्काः थःपि लिहां वनेगु न्हिल्याः क्वथीक स्वयाच्चन ।

\*

ने.सं. ११३८ अनलागाः ५

## चखुंप्वालं तिकिन्नंगु झसुकाः

सूर्यमायां द्यनेगु कुतः याःलिसे वनाप न्ह्यः तेलकासा म्हितुम्हितुं बिस्सुं वनाच्चन, ज्वने हे मफयेक । चान्हसिया छताः ई नं मल्याक्क जुइधुंकल । वया मिखा हथं थें ग्वग्वलानाः खापा मदुगु लुखा थें हवातां चालाच्चन । गुबलें जवं, गुबलें खवं फाताफाता मू पुलाच्चन— लः मदुगु थासय् न्यात त्वःते थें । थौं सुथसिया भौया खँग्वलं सूर्यमायाया नुगलय् च्वाम्मुसेच्वंगु चुपिं इवाइवा सुयाच्चन । त्वःमंके हे मफयाः सूर्यमायाया नुगलय् खँ ग्वाराग्वारा दासि वयाच्चन ।

थौं सुथय् काय्-भौ अफिसय् वनेत पिहां वनेत्यंबलय् काय्-नं— “यः मां ! जिपि अफिस वनेत्यल, खापा त्यूवा ! बांलाक च्वँ न्है !” धकाः न्हापां सःतूगु जिं मताल । काय्-नं लिसा कयाः हानं सःतल— “मां ! यः मां ! जिपि पिहां वनेत्यल । खापाय् चुक् तःवा न्है !” धकाः काय्-नं निक्वः स्वक्वः ‘मां ! मां !’ धकाः सःताच्वंगुलिं भौनं थः भाःतयात नर्थक्क हक्काः— “गुलि जक मां ! मां ! धकाः सःताच्वंगु ?! लिबात धयागु स्यू लाकि मस्यू ? छैय् च्वनेत बांलाक खापा तिनाः च्वनेमाः धकाः बुरिपिन्त धया च्वनेमाःगु ला ? अपाय्-सकं मां-प्यासी जुयाच्चने मास्तिवःसा छ नं छैय् हे जक च्वनाच्वँ !” धाधां स्वहानेय् पलाः बस्वास्वां वंगु सः न्हाय्पनय् क्वाःगु चिकं लुइ थें जुयाः सूर्यमायाया नुगलय् चि-मल्ता हाऽ हाऽ याः थें जुल । न्हिच्छि हे मिखां पाखा हायाच्चन, असारया झरी थें । थःगु नुगःधाः सुयातं उलाः क्यने धाःसा सूर्यमायाया सुं मदु । बुराम्ह भाःतयात कने धाःसा त्वापुया मा पी थें जुइगु जुल । छु कनेगु ? सुं थःथितियात कने धाःसा याकः-भौयात सह



हे मयाः धया थै थः हे खँजाः जुइ । 'बुराबुरित हे मज्यू, याकः-भमचा छम्हनाप हे सहलह जुयाच्चने मफुपि' धाइ । छु याये ! ई-ब्यः फुकक अःखः जुइधुकल । ताःसां मताःछु यानाः सह यायेगु बाहेकं मेगु लँपु हे मदु । सूर्यमायां ताःहाकःगु झसुकाः ततं दानेत कुतः यानाच्चन । थनिनिसै कायनं 'मां !' धकाः सःते हे ग्याइगु खः ला धया थै सूर्यमाया सात्तुवम्ह मचा थै थाराक्क थाराक्क न्हयाच्चन ।

थौं नं म्हिगः थै खालुं बुलातःगु खँग्वः न्येनेमाली धकाः सूर्यमाया काय-भौपि अफिस मवंतले लुखान्ह्यःने हे फ्यतुना च्वन । काय-भौ, छयपि फुककं पिहां वनेधुकाः सूर्यमाया व बुराम्ह भाःतम्ह खापा तिनाः निभाः पायेत कःसिइ थहां वन । बुराम्हेसिया नुगलय् ला प्वंगु धम्प ग्वम्पय् थै न्ह्यागुं स्वथनेफु । याउँक निभाः पानाच्चन । हिइसे ख्वाउँगु नुगः ज्वनाच्चम्ह सूर्यमायाया धाःसा निभाःया क्वाःजः कया थै मच्चं । म्हिगःया त्वःमंकां त्वःमंके हे मफुगु भौया खँग्वलं वयात कँथं कयाच्चन । 'हरे शिव ! थौं जिपि जंक्व यायेत्यःपि बुराबुरितयत् इमिसं मिखाया धू यानाच्चन । फत्तले जिमिसं नं ल्हाःया झिपतिं छ्यलागु हे खः । थौं जिमिसं थः नयेत जाकि निगः हे दायेके मफुत । उकै जुइ ..... थथे ..... ।' स्वः स्वः वःगु ख्वबि बैय् तिकि तिकि ननाच्चन ।

सुयां न्ह्यःने 'हाले मज्यूगु मे, कने मज्यूगु बाखं' नुगलय् स्वथनाः चि नःम्ह खाचा थै भुगुलुं च्वनाः सूर्यमाया निभाः पानाच्चन । आकाझाकां 'भाराक्क' सः वःगुलिं सूर्यमाया छकः थाराक्क न्हुल । सः वःथाय् मचायेक हे वया मिखा ब्वात । थःगु छँया अंगलय् च्वंगु चखुंपालं छम्ह चखुंचा भाराक्क कुतुं वःगु सूर्यमायां खन । कुतुं वःम्ह चखुंचा, पा-पि हायाः जिरिङ्ग च्वम्ह बुरिम्ह चखुंचा खन । चखुंपालय् थःम्ह हे थ्वकाम्ह हिसिचा दुम्ह बाचखुंचा व अथे हे हिसि दुम्ह नच्चाम्ह माचखुंचा निम्हस्यां धितुधिनाहःगुलिं बुरिम्ह चखुंचा चखुंपालं कुतुं वःगु सूर्यमायां बालाक हे खन ।

व बुरिम्ह चखुंचां न्हापा नं निकः खँय् थ्वकाः चखुंचात ब्वलंका च्वंबलय् सूर्यमायां न्हिन्हिं च्वकि ह्वलाबीगु । म्हिगः स्वयाः थौं गुलि तःधिकः जुल धकाः सूर्यमायां चखुंपालय् न्ह्यइपुकक स्वयाच्चनी । खँचं

पिहां वःपि चिचीधिकःपि चखुंचातयत् माचखुंचां छगः छगः च्वकि त्वाथय् तयाबीगु । च्वकि नके गातकि थःगु पपू फक्व चकंकाः मचातयत् क्वखं खंकी धया थें माचखुंचां त्वाथं सालाः पपुति त्वपुयाः थःगु छाती क्वाःजः बियाच्चनी । व निम्ह चखुंचा बलंगु तःन्हु हे मदुनि गन वन गन वन जुइक ब्यावन । माचखुंचां चखुंप्पालय् च्वनाः छ्यं चाःचाः हीकाः मस्तयत् पियाच्चन, न्ह्यःने च्वकि छपुचः तयाः, थःम्हं मनसैं ।

छन्हु व माचखुंचां हानं खँय् थ्वकल । खँचं चखुंचा मथ्वःतले माचखुंचा व बाचखुंचा खँय्यात घौछि हे मत्वःतुसे पियाच्चन । थुबलय् नं खँचं बाचखुंचा हे थ्वल । माचखुंचा व बाचखुंचा निम्हं लयल्य तायाः पपू चकंकाः भुररं भुररं प्याखं हुल । थ्वपालय् ला मांबौ चखुंचां च्वकि जक मखु चिचीधिकःपि कीचात व दम्बि नं मफु मफु ल्हययाः नकेहल । मचा चखुंचा याकनं हे बलनाः नसा माःजुइ सल ।

न्हापा लिपा थें नसा माःवंम्ह माचखुंचा म्ह सुख मदयाः न्हिनय् हे थःगु चखुंप्पालय् लिहां वल । व चखुंप्पालय् थःम्हं हे बलंकाम्ह हिसि दुम्ह चखुंचा व मेम्ह नच्वाम्ह मिसा-चखुंचा नाप च्वनाच्चन । बुरिम्ह चखुंचा व चखुंप्पालय् मन्ह्यन । नच्वापि निम्ह चखुंचां माचखुंचायात घ्वातुघ्वानाः चखुंपालं कुर्काहल । बुरिम्ह माचखुंचा पपू भ्यभ्य लुइकाः स्वां स्वां सासः फिनाः बैय् भ्वसुलाच्चंगु बुराम्ह चखुंचां गन च्वनाः स्वयाच्चन मस्यु, बुराम्ह चखुंचा नं अन हे जूवल । छ्यं ल्हुकु ल्हुकु संकाः बुराम्ह चखुंचां छकः छकः थःगु चखुंप्पालय् स्वइगु, छकः छकः तुति, पपुति नं चुइ मफयाः त्वाथं बैय् चुयाच्चंम्ह बुरिम्ह चखुंचायात स्वयाच्चन । छुं भतिचा लिपा व बुरिम्ह चखुंचां पपू छकः भाररं संकाः बैय् चाःचाः हिल । तुति तिल्ल प्यंकाः छ्यं बैय् भ्वसुत । बुराम्ह चखुंचां सीम्ह चखुंचायात सातु सालाच्चन । छु याःगु, छु धाःगु, छु मथूसां सूर्यमायां वाताहां स्वयाः थःगु हियूगु नुगःया च्वापु-लः हायेका च्वन, हायेका च्वन ।

स्वस्वं हे चाता वानाच्चंम्ह सीम्ह चखुंचायात ल्ह्वना यंकेत क्वः छम्ह चंचं धायाः न्ह्यःने न्ह्यःने तुचुतुचुं वल । क्वःया न्ह्यःने छम्ह चीधीम्ह चखुंचा, व नं बुरा जुइधुकूम्ह चखुंचां छु यायेफइ ? क्वखं

सीम्ह चखुंचायात त्वाचाक्क ल्हवनाः यंकल । चखुंप्पालय् च्वंपि निम्ह  
नच्चापि चखुंचातय्सं चखुंप्पालं छयं पिकयाः तुंक स्वयाच्चन । बुराम्ह  
चखुंचां थःगु चखुंप्पालय् छकः पुलुक्क स्वयाः सीम्ह चखुंचा ल्हवना  
यंकूम्ह क्वः गुखे ब्यावन उखे हे ब्यावन ।

तिन्हिनय् शून्य ईयात चखुंप्पालं तिकि ननाच्चंगु झसुकालं चिरि  
फायाच्चन— चिरि चिरि कःतिं सिं फाये थें । सूर्यमायां थः नं व हे  
चखुंप्पाःया बुरिम्ह चखुंचा हे खः ला धया थें झसुकाः तयाच्चन ।

\*

ने.सं. ११३८ बछलागाः ६

## त्यपय् दुने स्वःगु निभाः

प्रदीप स्वयाः सुदीप यक्व दँ क्वकालि जूसां इपि निम्ह मर्निङ्ग वाक वनीपि तसकं मिलय् जूपि पासापि खः । छँ नापं जूगुलिं नं इपि भतिचा ई दतकि हे वं वयात वं वयात सःताः नापलाना च्वनीगु । न्ह्याक्व नापलाःसां इमि दथुइ खँ गुबलें सिमधः । मर्निङ्ग वाक जक वंसां इमि थःथःगु छँया समस्यानिसें कयाः राजनीतिक गफ तक नं जुयाच्चनी । इपि थथे मिलय् जूगुलिं म्हमस्यूपि फुक्कस्यां 'दाजु-किजा खः ला ?!' धकाः न्यनीगु । दाजु-किजा थथे मिलय् जूसा ला सामाजिक कलह दइ हे मखु नि । दाजु-किजा धयापि ला न्ह्यागु छँय् नं लः व मि थें जुयाच्चनी । गन छँय् दाजु-किजा मिलय् जू व छँय् शान्तिया वास दया हे च्वनी ।

सुथन्हापां प्रदीपया कलाः प्रेरणा एकसुरं वसिबँ पुयाच्चंबलय् झसंक वंक न्ह्यसः ततं सुदीप थ्यंकःवयाः धाल— "आःतकं मदनि ला प्रदीप दाइ ? खुताः ई जुइधुंकल, मर्निङ्ग वाक वने लिबात । लिबातकि तसकं तान्वये यः । प्रेरणा, छँ प्रदीप दाइयात कन्हसंनिसें भचा न्हापां न्हापां थना बीमाल का !"

सुदीप व प्रेरणा न्हापा क्लास-मेट जूगुलिं 'तताःजु' मधासे नां हे कयाः खँल्हाबल्हा याइगु । सुदीपया न्ह्यसःया च्यूताः मतसे प्रेरणां थःम्हं स्यू थें ताः थें थःगु खँ न्ह्यथन— "मर्निङ्ग वाक न्हापां न्हापां वनेगु ज्यां झीगु म्हायात भिं सिबय् मभिं अप्वः दु धकाः गुलिमछि पत्रिकाय् डाक्टरतय्गु च्वसुत पिदनाच्चंगु दु । छिकपिसं मबना ला ? तान्वःसां छु जुल ले ? न्यासि वनाःसां चःति पिकायेगु हे खः । निभालय् न्यासि वन धाःसा झीत माःगु भिटामिन डी नं दइ हँ !"

डाक्टरतय्गु खँग्वः थें च्वंगु प्रेरणाया खँ न्यनाः भचा अजू चाःगु, भचा पत्याः मज्जुगु सलं सुदीपं न्यन— “न्हापां न्हापां उलिमछि मनूत वाकिङ्ग वयाच्चंगु दु । बेफाइदा जुइगु जूसा सु वइ ? न्यने हे मनंगु खँ प्रेरणा, छं गथे सिल ?”

“का छिं मब्बं जुइ का ! हर्ट स्पेसलिस्ट, कार्डियोलोजिस्ट, डाक्टर व इन्भायरोन्मेन्ट विषय कयाः पिएच. डी. याःपिं डाक्टरतय्सं पिथंगु च्वसुइ च्यातःगु दु— ‘सुथन्हापां ख्वाउँनिबलय् धूफ्वःत (पोल्यूशन) क्वहां क्वहां वयाच्चनी ! झी ब्वाँय् वनाः ताताःहाकःगु सासः ल्हायेबलय् व धूफ्वःत दक्व कथुं द्वाहां वनी ! थुकिं यानाः झीत सेखं चाइगु, कपाः स्याइगु, वाक् वाक् वइगुनिसैं स्वँया कयान्सरतक नं जुइ यः ! निभाः त्वःलिसे धूफ्वःत याउँयाः च्वय् च्वय् थाहां वनी ! उकिं .....”

सुथंनिसैं उसाँय् भिनीगु कलाःया न्वचु न्यनाः प्रदीप नं वास्यां न्हिलाः वाकिङ्गया लागि क्वहां वल । खँल्हाबल्हा यायां हे वसिबैं पुइ सिधयेकाः ‘भतिचा लिबाक्क वाकिङ्ग झासैं धाःसा खँ न्यनी हे मखु’ धया थें मनय् खँ तयाः प्रेरणा नं तलय् थाहां वन ।

वाकिङ्ग वंपिं बाघौ हे मजाःनि, लुखाया घण्टी तसकं वात्तुवां न्यायेकूगु सः थ्वल । ‘सु वःगु जुइ ? छु जुल जुइ ? छाया थपाय्सकं घण्टी न्यायेकूगु ? गुलि याकनं ल्याहां वःगु जुइ !’ धकाः छः पुज्यानाच्चंम्ह प्रेरणां हथासं क्वहां वयाः खापा चायेका बिल । निम्हेस्यां ख्वाः वँचुसे तयाः सातु वंपिं मस्त थें ग्याःचिकु पहः वयेकाः इपांथिपां मदयेक द्वाहां वल । प्रदीप स्वाहानेय् थाहां वनेत स्वःबलय् अय्लाखं काःम्ह थें तुति ललद्यानाः थाहां हे वने मफु । वयात निम्हेस्यां लप्पु ज्वनाः क्वथाय् थत यंकल । प्रेरणां निम्हेसितं लः त्वनेत लः-ग्लास बिल । निम्हेसितं झ्यालं हे ख्वाः छकः सिके बिल । सुदीप ताःहाकःगु झसुकाः छकः तयाः सोफाय् थचक्क पयतुल । प्रदीप होश दुम्ह ला मदुम्ह ला थें जुयाः लासाय् हे ग्वारा तुल ।

‘छु जुल ?’— धकाः प्रेरणां निम्हेसिकैं न्यनेफुगु मखु । न्यनाच्चनेगु ई नं मखु ।

प्रेरणां हथासं दराज चायेकाः स्टेथिस्कोप (छाती जाँचय् यायेगु ज्याभः) व स्पिग्नोमाय्मिटर (ब्लड प्रेसर जाँचय् यायेगु ज्याभः) लिकयाः प्रदीपयागु प्रेसर जाँचय् यात । प्रेसर ला यक्व हे दयाच्चन— २००/१०० । प्रेरणां थःम्हं स्यू थें प्रेसर क्वहां वइगु वासः व न्हयः वइगु वासः नकल । बुलुहुं प्रदीपं न्हयः वयेकल ।

प्रेरणां छप्ति हे आत्तय् मचासे थः भाःतयात छम्ह नर्स थें सुसाः याःगु सुदीपं वाताहां स्वयाच्चन ।

छुं ई लिपा सुदीप नं भचा नर्मल जू थें खनाः प्रेरणां बुलुहुं न्यन— “सुदीपजी लैय् छु जुल, याकनं ल्याहां झाल ?! छुं मजुइक ला वय्कः थथे जुइ मखु !”

ताःहाकःगु सासः फिनाः सुदीपं धयाहल— “जिपि निम्हं फटाफट वाकिङ्ग वनाच्चनागु, सहिद गेटया न्हयःने बस-स्टपयाथाय् थ्यंबलय् लैय् वनाच्चं पि मनुत, क्याम्पस वनेत बस पियाच्चं पि मिजंमस्त-मिसामस्त फुक्क चिल्लाय् दनाः हालाहल— ‘का ! का ! स्व ! मिजं-मचा छम्हेसित माइक्रोबसं थक्कर नकल । वयात थनाबीमाल । बिस्सुं वनेत बस बाय्क याःबलय् हानं क्यल । ड्राइभरयात ज्वनेमाल ।”

गुलिस्त्र्यां धाल— ‘बसया नम्बर च्वयेमाल ।’ फुक्क मनुत न्हयःने बाँय् वैंव हे ड्राइभर इपांथिपां मदयेक न्हयःनेलाःथे बाय्क यानाः बिस्सुं वन । मिजं-मचा ला जेब्रा क्रसिङ्ग लाइनं हे वयाच्चंगु खः । खालीगु माइक्रोबस यक्व मनुत कायेत मखा जुइ ब्वाकेहःगु ! मिजंम्ह जेब्रा क्रसं वयाच्चंगु हे मखं । न्हापां ला जेब्रा क्रसं लै क्रस यानाच्चम्हेसित बसं थि जक थियाः ग्वारातूगु खः । बिस्सुं वनेत बाय्क याःबलय् प्वाथय् हे प्याच्च क्यल । ‘आया’ छकः हे धाये मलात का ! उखे-थुखे हि बाः वःगु खनाः प्रदीप दाइ अथें अथें बनावन । लैय् नापं वयाच्चम्ह छम्ह मनु व जिं लिधँसा बियाः बल्ल छैय् लित हया । जिमिगु मिखान्हयःने जूगु दृश्य खनाः जि नं नुगः भारा भारा मिनाः इक्कुसे च्वन । वाक वाक वयाच्चन । का प्रेरणा ! जि नं वना हे छ्वये का ! प्रदीप दाइयात बांलाक सुसाःकुसाः या !”— धाधां सुदीप छैय् लिहां वनेत दनेत स्वःबलय् इकुयाः हानं सोफाय् हे प्यतू वन ।

“सुदीपजी, छि नं भचा याउँक झासु लनादिसँ ! च्या छकः त्वनाः जक झासँ !” धकाः प्रेरणा च्या दायेकः वन ।

प्रेरणा याकन हे च्या ज्वनाः क्वहां वल । च्या त्वँत्वं सुदीपं हानं खँ न्ह्यथन— “क्याम्पस वनेत प्याहां वःम्ह मिजं-मचा थें च्वं ! सुया काय् जुइ ? थ्व खँ न्यनीबल्य् मांबौया नुगः गथे जुइगु जुइ ? न्हापां छकः थक्कर नःबलय्तुं बस दिक्कू जूसा व मिजंमचा घाःपाः जक जुइगु जुइ, सी ला मखु थें च्वं ! व बेइमान ड्राइभरं तुरुन्त फनक्क हे बस बाय्क याःबलय् ला उफ्, केरा क्यले थें का !”

“व हे ला थौकन्ह्य् ड्राइभरतय्गु छु चाला जुयावःगु ? मनूतय्त थक्कर नकाः ग्वारा तुलकि ला मखंक ब्याक यानाः स्याना हे बीगु का ! ड्राइभर नं ला मनू हे खः नि ! गथे माया-दया मदुगु ?”— प्रेरणां खँ द्यतन ।

सुदीपं थःगु बिचाः कन— “ड्राइभरतय्सं नं थथे छाय् मयाइ ले ?! मनू क्यलाः सितकि स्वीखुद्धः दां पुला बिलकि त्वःताहइ । घाःपाः जूसा मलंतले वासः-खर्च याना च्वनेमाः । सरकारी कानून हे थथे प्यासुसे च्वं, छु याये झीगु देशय् ?!”

सुदीपया खँ न्यनाच्वँच्वं हे प्रेरणां थथे थःपिनिगु मिखान्ह्यःने हे जूगु घटना कनाहल— “दछिति न्ह्यः जि व प्रदीप वाकिङ्ग वनाच्वनाबलय् छगः मोटर-साइकलय् कलाःभाःत वयाच्वंगु । मोबाइलय् कल वल थें ! लँ-सिथय् मोटर-साइकल दिकाः फोन यानाच्वंम्ह भाःतम्हेसित फि ल्ह्यइगु टिपर-गाडी थक्कर नकल । मिजंम्ह मोटर-साइकलया न्ह्यःने थस्सः पाःवन । ‘मनूयात थक्कर नकल, आसे !’ धाधां हे ड्राइभरं गाडी न्ह्यःने ब्याकल । कलाःम्हेसिगु न्ह्यःने घौछिं हे भाःतम्ह मन्त । श्राद्ध याये स्वयाः नं निसलाः बीगु थाकु धाइ थें न्याःगु कानून जुत्तले ड्राइभरत महसूर हे जुयाच्वनी । उबलय् ला ड्राइभरयात ज्वनार्यक्कू खः । ज्वनार्यकां छु याये, यातायात व्यवसायी संघया मनूतय्सं ब्रेक फेल जूगुलिं भवितव्य घटना जूगु धकाः बयान दयेकाः छगू लाख जरिवाना पुलाः ड्राइभरयात त्वःतका हल । व ध्यबा नं यातायात व्यवसायी संघं हे पुलाब्यूगु हँ ! उलि ध्यबा पुलेत संघयात छुं थाकुगु

मखु । जनता सीसा सीथमा, यातायात व्यवसायीत सुरक्षित यायेगु हे यातायात व्यवसायी संघया मूज्या जूवन । अले झाइभरत च्वय् च्वय् मधाइ ! अले न्हयःनेलाःथे यानाः बस चलय् मयाइ ?! टिकटया ध्यबा म्हो यायेमा, विद्यार्थीतय्त, बुरा-बुरितय्त बसया ध्यबा म्हो यायेमा, बस मगाःथाय् सरकारं बस तनाबीगु कुतः याःसां थ्व हे संघं हडताल याइगु । न्हयःनेलाःथे यानाः बस चलय् याइपि झाइभरतय्त कारवाही यायेमाः धकाः सीम्ह मनूया थःथितित, त्वाःबाःयापि मनूत जुलुस वन, हाःवन । छु निं छु का ! संघया झाइभरयात कारवाही यानां व सीम्ह मनू म्वाना वइ ला हँ ! क्षतिपूर्ति गुलि ध्यबा माः, इमिसं बी हँ ! छु मनू धैपि सा-मेय् थें वस्तु खः ला, ध्यबा पुलाबी धायेत ! इमि थः हे काय्मह्याय्, मांबौयात जुलकि तिनि इमिसं सी का ! थ्व घटना खंबलय् नं छिकपिनि प्रदीप दाइया प्रेसर तसकं हे थाहां वनाः बिरामी हे जुयाः च्यान्हु झिन्हु अस्पतालय् तयाहया । उबलय्निसें डाक्टरतय्सं थथे बिरामी जुल धाःसा प्रेसरया वासः व न्हयः वइगु वासः नकाः याउँक थ्यनाब्यु धयातःगुलिं थौं नं व हे वासःत नकागु का !”

प्रेरणाया खँ कनाः म्हुतु मदीनि, सुदीप नं थः पाजुया काय् छम्हेसिगु खँ कनाहल— “जिमि दाइ छम्हेसित नं अफिसं त्याहां वयाच्चंबलय् ट्रकं कययेकाः बिस्युं वनेत हाकनं ब्याक यायेत्यंबलय् मनूत फुक्क मुनाः झाइभरयात ज्वनेफत । बिरामी मलंतले वासः-खर्च बीगुबारे पुलिसतय्गु न्हयःने खँ क्वःछिनाः, यातायात व्यवसायी संघया मनूत जमानी च्वनाः झाइभरयात त्वःताछवल । त्वान्नाःया क्वँय् हे नद्युक कयःगुलिं तःकः हे अपरेशन यायेमानि धकाः लांलां हे अस्पतालय् तयेमानिगु खँ सियाः झाइभर थौंतक बेपत्ता का । जमानी च्वंगु यातायात व्यवसायी संघ व पुलिसतय्थाय् गुलि उजुरी तल । थौंतक छु नि छु का ! थौं जिमि दाइ निपा तुति मदयेकाः अपाङ्ग जुयाः मचाखाचां लहीकाः च्वनेमाल । झाइभरयात व हे यातायात व्यवसायी संघया मनूतय्सं हे बिसिके छ्वःगु खँ न्यनेदु । का प्रेरणा, ताउत हे जाल । छँय् वना हे छ्वये का ! प्रदीप दाइयात हन्चा स्वःवये का !”—  
धाधां सुदीप छें पिहां वन ।



प्रदीपया ब्लड प्रेसर बांलाक थातय् मलाःगुलें प्रेरणां स्वन्हु  
 प्यन्हुयकं न्हापां वइगु पत्रिकात कयँ हे मक्यँसे सुचुका तल । पत्रिकाय्  
 न्हियान्हिथं कयलाः सीम्ह मिजं-मचायागु किपा तयाः 'बाय्क यानाः मनू  
 स्याइपि ड्राइभरतय्त कारवाही याये हे माः । इपि ज्यानमारा हे खः ।  
 इमित म्वात्तले जेलय् हे तयेमाः' धकाः तःग्वःगु आखः च्यातःगु ध्वँय्  
 ज्वनाः बस व्यवसायी संघया मनूत व ड्राइभरत जुलुस वयाः थाय्थासय्  
 गाडीत पनाः विरोध यानाच्च्वंगु बुखँत वयाच्चन । बस व्यवसायी संघया  
 मनूत व ड्राइभरतय्सं हे थथे विरोध याःगु बुखँ न्यनाः सकलें अजू  
 चायाच्चन ।

सीम्ह मिजं-मचा ला बस व्यवसायी संघया अध्यक्षया काय् हे  
 जुयाच्चन । बल्ल बस व्यवसायी संघया मनूतय् मिखा चाल थे च्वं !  
 थाय्थासय् यक्व विरोध जुयाच्चन ।

\*

ने.सं. ११३८ कछलागाः ९

(लँय् खनागु पलाः' पाखें)

## क्वातुगु प्रतिकार

“ए रुक्मणि, शारदा, कमला, राजु, रत्नमान, ज्ञानु ! फुक्कस्यां जिगु खँ न्हाय्पं बियाः न्यँसा ! थ्व लच्छि सकलें बहनिइ हथासं वने मते । सुथय् नं न्हापां न्हापां वा ! थ्व लच्छियंक वइगु शनिवारकुन्हु बिदा नं बी मखु । छाय् धाःसा जापानं यक्व गलैँचा अर्डर वःगु दु । इमिसं धाःगु इलय् इमिगु देशय् गलैँचा छ्वयेमाः । झीगु कारखानायागु गलैँचा मेपिनिगु गलैँचासिबय् यक्व तःजि, ग्यसुलाः व रङ्ग नं जाः हँ ! छिमित नं गुलि अप्वः गलैँचा थायेगु ज्या दइ उलि हे ध्यबा दइगु हे खः । अर्डर मवल धाःसा छिमि नं ल्हाः हुस्लुं प्वाः फुस्लुं जुइ मखु ला ?”— तःधी जुयाः नं ग्वारामाराचिक ल्हवँम्ह कारखानाया साहुजी स्ये स्ये फुं फुं वयेक फुक्कसित न्वानाच्चन । कारखानाय् गलैँचा थानाच्चपिनि धाःसा न्हाय्पनय् द्वाहां वं ला मवं ला मस्यु ! निम्ह स्वम्हेस्यां जक ‘जि हे ज्यू नि’ धकाः लिसः बिल ।

गलैँचा कारखानाया क्वथाय् छकू कुनय् च्वनाच्च्वंम्ह सन्ध्यां साहुजी धाःगु खँ ला छु ताइ (?) कारखानाया क्वथाय् द्वाहां वःगु हे वाः मचाः । ख्वाः खिउँसे तयाः न्हकु तियाः त्वल्हय् जुयाच्चन । सन्ध्यां साहुजीया ख्वाः नं मस्वः, न्व-नि नं मवाः । ल्हाः प्वःचिनाः त्वल्हय् जुयाच्चंगु खनाः साहुजी सन्ध्याया लिक्क वनाः न्यन— “सन्ध्या ! छाय् त्वल्हय् जुयाच्चनागु ? म्हं मफु कि छु ?” अझ चीसः यानाः न्हाय्पनय्थ्यंक वनाः धाल— “हन्वा छैँय् छकः वा न्है ! ज्या छगू दु । छिमि साहुनी नं शहरय् वनाच्चन ।”

सन्ध्यायात खुसुक्क थुलि धयाः साहुजी थःगु लँ लित । 'हन्चा छकः छैय् वा !' धकाः चीसलं साहुजी सन्ध्यायात धाःगु लिक्क च्वंम्ह पासा करुणां बांलाक हे ताल । झुमिं यंकूम्ह थें थःत थःम्ह तंकाच्वंम्ह सन्ध्या साहुजीया सुलि पू थें न्याःगु सलं सातु वंम्ह मचा थें थाःहाक्क न्हुल । पासापिनिगु ख्वाः छकः स्वल । सुयातं छुं मधासे जुरुक्क दनाः क्वथां प्याहां वन ।

बजि नयेगु ई जुल । फुक्कं थ्वःचा थ्वःचा मुनाः थःथःगु छैय् नं हःगु— गुलिस्यां मरि-तरकारी, गुलिस्यां बजि-तरकारी, गुलिस्यां गुन्दुनाप कःनिमुस्या लिक्कयाः नल । सन्ध्या फुक्क पासापिं स्वयाः छखे लिक्क च्वंगु द्वम्बःचाय् फ्यतुनाः त्वल्हय् जुयाच्वन । स्वयेबलय् नं नुगलय् मन्हयंक पिर स्वथनाः वाथावाथा कनाच्वंम्ह थें च्वं ।

सन्ध्याया थ्व पहः खनाः करुणा व कमला वया लिक्क फ्यतूवन । कमलां बुलुहुं सन्ध्यायात खँ छुत— "सन्ध्या ! छाय् थथे छ झुमिं यंकूम्ह थें याकःचा याकःचा त्वल्हय् जुयाच्वनागु ? ग्वःन्हुमछि दयेधुकल, जिपिनाप खँ-खिं नं मल्हाः । छं गलैँचा नं थाये मास्ति मवः थें च्वं !"

करुणां कमलाया खँ त्वाःथलाः मेगु खँ छुत— "छु याये ! थः मिजं ज्या यायेत मलेसियाय् वनाच्वन । काय् छम्ह पासा दुगु नं काठमाडौँलय् बंकेत छ्वयातल । मिसा जात, याकःचा छैय् च्वनाच्वन । इमिगु पिर कयाच्वन जुइ का ! मिजंत छैय् मन्तकि पिर ला जुइगु हे जुल नि !"

"आम्हे यक्व पिर काये मते सन्ध्या ! आम्हे मनसे पिर कयाः त्वचं कयाः सने मफत धाःसा सुनां बिचाः याइ छन्त ?"

"छं बजि हयागु मदुसा जिमिसं हयागु बजि इनाः नये का वा, सन्ध्या !" — कमला व करुणा निम्ह पासापिसं फक्व नुगः तयाः ह्ययेकल ।

निम्ह पासापिसं गुलि नुगः तयाः खँ ल्हात उलि हे सन्ध्याया नुगः तज्याइ थें च्वनावल । मिखां नं न्यतालय् ख्वबि बाः वयाच्वन । आः ला तसकं हिकुहिकु लनाः ख्वया हे हल । ख्वःसः तायेदयाः मेपि पासापि नं अन हे सन्ध्यायात 'छाय् ? छु जुल ?' धाधां भुंवल । पासापुचलय् दक्कलय् थँजिम्ह रूक्मणिं छैय् ततां न्वाये थें धाल— "छन्त छु दुःख जुल ? थथे ख्वया जक च्वन धाःसा जिमिसं गथे यानाः

सीकेगु, छन्त छु जुल धकाः ! छ खयाच्चंगु स्वयेबलय् ला छन्त तःधंगु हे आपत्-विपत् वः थें च्वं ! छं छुं हे खँ सुमचुकुसे पूर्वक धा सा !”

मेमेपि पासापिसं नं लिधंसा बियाः धाल— “खः खः सन्ध्या । जिपि फुककं द हे दु नि, छन्त ग्वहालि यायेत । पासापिन्त छुं मकँसे ख्व जक खयाच्चनां जी ला ?”

सन्ध्याया सास भचा थहां वल, इमिगु लिधंसां जाःगु खँ न्यनाः । गाच्चतं ख्वबि हुहुं भचा मछिंपहलं वं थःगु नुगःखँ उलाहल— “जिमि काय् व मिजंयागु छुं पिर मदु । फुकक पाय्छि जुयाच्चंगु दु । इलय्-ब्यलय् फोनं खँ नं जुयाच्चंगु दु । बरु व साहुजी .....” धायेसाथं फुककस्यां न्हाय्पं तितिं स्वात । म्ह पीसे च्वनावल । फुककस्यां छप्वाः म्हुतुं छसलं न्यन— “छु यात साहुजी ? अथे जुयाः का न्हाचः न्हाय्पनय् थ्यंक वयाः ‘छैय् छकः वा सन्ध्या, ज्या दु’ धकाः स्वां पुयावंगु । व नं कलाःम्ह मदुबलय् । अँ सन्ध्या ! खँ पूर्वक धा सा, व बेइमान बुन्हायात झीसं बाकी तये हे मखु ।”

सन्ध्यां पासापिनिगु स्यल्लाःगु लिधंसा दत धया थें तायेकल । थःगु नुगलय् च्यान्हु झिन्हु न्हयवंनिसैं उकुसमुकुस जुयाः मि पुनाच्चंगु थें ज्याःगु नुगःघाः सिच्चुक फसय् ब्वये थें सन्ध्यां मछाः मछाः प्वंकल— “जिमि बुन्हा मलेसिया वँसेलि जिमि काय् नापलायेगु त्वहः चिनाः साहुजी जिगु छैय् निकः प्यकः वल । जिमि काय् एस. एल. सी. पास जूगुलिं काठमाडौंलय् च्वंगु बांलाःगु क्याम्पसय् ब्वंवेनेगु इच्छा यात । जिमि काय् व जि ध्यबा मगाःनिगु खँय् खँल्हाबल्हा यानाच्चनाबलय् साहुजी त्वाक्क थ्यंकःवल । वं जिमि काय् यात— “ध्यबायागु छु पिर ! जि द हे दु नि !” धकाः लिधंसा बिल । कन्हय्कुन्हु हे न्येद्वः दां जिमि काय् यात छैय् थ्यंक बीहल । काय् लय् लय् तायाः काठमाडौंलय् च्वंगु बांलाःगु क्याम्पसय् बांलाक हे ब्वनाच्चन । इलय्-ब्यलय् बुन्हां विदेशं ध्यबा छ्वयाहइबलय् फक्क नं याकनं पुलाबी धकाः बिचाः यानाच्चना ।

काय् काठमाडौं वनेधुंकाः नं जि याकःचा धकाः मखा जुइ (!) निकः स्वकः हे छैय् वयेत कुतः यात । तर जिं दुमकया । उकिं जितः त्वहः मदु त्वहः चिनाः, ज्या दु धकाः छैय् सःतीगु । उकुन्हु नं ‘छैय् वा,

ज्या दु' धका: स:तल । छँ छखां बै पुना: वस: हिया: पिहां वयेत्यनाबलय्  
'आवनिसें गन वनेगु ? थ्व जक छँ मखु ला ? ज्या दनि' धका: जित:  
पाचिना: दुने यंकल ।

'साहुजी ! छु यानादियागु ? जित: थथे म्हय् थीगु मय: । सुनानं  
खंसा हानं छु धाइ ?' धका: झातापाता याना: जिं वया ल्हा: स्वहायेका ।  
साहुजी हानं ह्यामि-सलं न्हिला: न्हिला: धाल- 'छ नं याक:चा, जि नं  
याक:चा । जिं बांलाक हे स्यू- छु य:, छु मय: धका: । जिं धयागु खँ  
न्यंसा जिं बियागु ध्यबा नं लित काये मखु, अझ मा:मा:बलय् माक्व ध्यबा  
बी' धाधां जिगु लप्पु ज्वना: घ्वात्तुघ्वाना: क्वथाय् यंकेत स्वत । साहुजीयागु  
थ्व पह: खना: जि ला तुंथिइ क्वब्बाये थें जुल । व गिद्धयागु पञ्जा  
त्व:फिकेत जिगु जिवय् च्वंगु फुक्क बल पिकया: वयात घ्वाना: लुखापाखे  
ब्याँयवना । अले ला छु मानि (?) चल्लाचित ज्वनेत धुँ तिन्ह्या वये थें  
व जिपाखे वल । जि चिल्लाय् दनेत्यनाबलय् कुने लुखाय् सुनानं ध्या  
ध्या या:गु स: तायेदत । पलिं कुतुं वंम्ह मचायात द्यवं ल्हातय् फयाकाये  
थें जित: नं द्यवं हे पनाब्यू थें ताल । काचाक्क खापा चायेका बिया ।  
साहुनी हे । छन्दु लिपा छँय् थ्यनीम्ह, छन्दु न्हापा हे थ्यंक:व:गु जुयाच्चन ।  
साहुनीनं जित: क्वथीक छक: स्वल, छुं मधा: । जि लें छपुं छपला: तया  
थें याना: सास: हे मल्हासे छँय् थ्यंक:वना । छँय् थ्यना: नं गबाय्त न  
गबाय्त म्ह थर्रर खानाच्चन । थ्व खँ सुयात कने ? गथे धका: कने ?  
धका: मनय् भुखाय् ब्येका: नुगलय् मि च्याका: च्वच्चना । थौं हानं 'ज्या  
दु, छक: वा !' धका: धयावन । थज्या:गु खँ जिमि काय् व बुन्हां सिलकि  
जित: छु याइ ? जि ला सिना हे वंसां जिल ।'- सन्ध्या हानं ह्वाँय्ह्वाँय्  
खल । सन्ध्याया खँ न्यनाच्चं पि सकस्यां हि क्वात ।

'आ: छु यायेगु ?' धका: पासापिनि सहलह यायां खँ क्व:छित ।  
सन्ध्यायात ह:पा: बिया: पासापिसं धाल- 'ग्याये म्वा: सन्ध्या ! छंगु ल्यू  
ल्यू जिपि सकलें दु । व नरपशुं थौं छन्त गिद्धमिखां स्वल । कन्हय्  
व हे मिखां जिमित नं मस्वइ मखु । आ: थत्थें वया प्रतिकार याये  
धा:सा झीके छुं हे दसि मदुनि । पुलिसयाथाय् वना: खँ न्ह्यथने धा:सा  
दसि मदयेक छुं ज्या जुइ मखु । व खना: ग्याना: झीसं छुं मया:सा व

ला झन झन धुँ जुयाः झीगु न्ह्यःने दंवइ । थन्याःपि पिशाचत छम्ह निम्ह दयाः हे खः थः केहँ, म्हयाय्, छय् धयागु नीलः थें चोखोगु नाता धयागु हे म्हमस्यूगु बुखँ न्हियान्हिथं न्यनेमाःगु । आः ला स्व- काय्या मां, कर्पिनि कलाः धयागु वया हि मदुगु नुगलय् द्वाहां मवं का । मिसापि धकाः वं झीत तुतिं न्हुइत स्वत, व हे तुति ज्वनाः झीसं वयात बस्वाये फयेके माः । उकिं सन्ध्या, दसिया लागि थौं नं छ हाकनं व साहुजीया छँय् हुँ । छंगु ल्यू ल्यू जिपि फुक्क मिजंत व पुलिस नं ज्वनाः वये । जिपि छँया क्वय् हे च्वनाच्चने । थौं नं छन्त उकुन्हु थें बेक्वः-मिखां स्वयाः म्हय् थीगु कुतः यात धाःसा न्ह्याथे यानाःसां तिरिक्क सः जक ब्यु, जिपि खापा तछ्यानाः वयेमाल ला, झ्यालं वयेमाल ला, न्ह्याग्गु यानाः नं थाहां वये । फुक्कसिगु न्ह्यःने दसि क्यनेफत धाःसा गामय् फुक्कसिगु न्ह्यःने वयागु न्हाय् ध्यनेफइ का ।”

पासापि फुक्कसियां ह्ययेकाः क्वातुगु भलसा बियाः सन्ध्यायात साहुजीया छँक्वय् तक तःवन । सन्ध्याया म्ह ज्वर वःम्हेसिया थें दिगिदिगि क्वाना वल । थरथर खाःगु तुति ज्वनाः, ग्याःचिकुया ज्वर वयेकाः सन्ध्या साहुजीया छँया लुखा चायेकाः थाहां वन । धात्थें थौं सन्ध्यायात थःथम्हं आत्मघाती बम हे ज्वना वना थें ताल ।

ला-क्वँय् खनेवं खिचाया म्हुतुइ लाः वइ थें सन्ध्या वःगु खनेवं साहुजीया म्हुतुइ नं लाः वल । साहुजी वयात खनेवं नुगः भ्वय् भ्वय् कँकं लय् लय्तातां “हँ सन्ध्या । थथे धयाखँ न्यनेमाः का ! छ नं लय्ताः, जि नं लय्ताः !”— धाधां सन्ध्यायात ज्वनेगु कुतः यात ।

सन्ध्यां भचा तस्सलं “साहुजी ! जि ला ज्या दु धाःगुलिं थन वयागु । जिमि काय्यात बंकेत ध्यबा ग्वहालि बियादीगुलिं जि थौं मंमदुसां वयेमाःगु, मखुसा जि थन छिथाय् छँय् ज्या यायेत वया च्वनेमाःगु छुं हे कर मदु । जि ला ज्या दु धाःगुलिं छितः ग्वहालि यायेत वयागु, मखुसा जि वने त्यल ।”— धाधां सन्ध्या पासापिन्त खापा चायेका बीत वने त्यन ।

“उकुन्हु ला छिमि साहुनी थ्यंकःवःगुलिं छ वनेदत का ! थौं जितः पनेत सु वइ, स्वये का !”— धयाः साहुजी सन्ध्याया लप्पा ज्वनाः लुत्तुलुयाः खाताय् बस्वात । साहुजी वसः त्वःतेत कुतः यानाच्चंगु खनाः

सन्ध्याया 'थौं ला जि सा:गालय् कुतुं हे वनीगु जुल' धया थें ताल । आ: छु यायेगु ? गथे याना: कुने च्वनाच्चंपि पासापिन्त स: बीगु धया थें इपांथिपां हे मसिल । सास दत्तले आस दइ धया थें सन्ध्यां क्वथाया प्यखें मिखा छक: बल, ग:कीत क्व:थले धुकूम्ह मेय्न् भव्य भव्य कँकं मिखां स्वये थें । आकाझाकाय् सन्ध्यां खाता-च्चय्च्चंगु ल: त्वनेत तयात:गु तग्व:गु स्टिलया गिलास छग: खन । मिखा फुति याये मलावं थ:म्हं हे मचायेक सन्ध्यां व गिलास कया: यांकया: मुइक झ्यालय् कयेका छवत । झ्या:या न्हाय्कं नचुक्क तज्यात ।

"का, पासापि ! तलय् मखुथे जुल थें च्वं ! खापा तछ्याना: द्वाहां वनेमाल । मखुसा व न्हाय्कं तज्या:गु झ्यालं सां द्वाहां वनेमाल, सन्ध्यायात आपद्-विपत् वयेका च्वने मजिल ।"— पासापि लाय् लाय् बुबुं हालाह:गु सलं सन्ध्याया बल्ल थ:थम्हं सास: दनि थें ताल । अर्ध-जलय् तया: ल: त्वंकेधुकूम्ह मनू हानं म्वानावये थें सन्ध्यायात जुल । कुने कालाकुलु हा:स: दयेवं साहुजी इत:मत: कना: छखे लित । स्वाहाने छपुं छपला: याना: सन्ध्यां कुने वना: खापा चायेका बिल । पुलिस नापनापं मिजंत व पासापि फुक्कं घ्वारा थहां वल । इमिसं थ:थ:गु मोबाइलं वस: उखे ला: थुखे ला: मदुम्ह साहुजीया किपा काल । साहुजीयात लुतुमतु लुया: छैनं पित हल । पिने ला जात्राबलय् थें मनूत मुनेधुकल खनि । मिस्त फुक्कस्यां वयात थुकलं बिल । मिजंतय्सं धा:सा तमं हि ग्वाराग्वारा दासि वयेका: दायेत ल्हा: लम्हुल । तर पुलिसं साहुजीयात दायेकें मबू ।

"छिकपि फुक्कस्यां तया सुरय् दाया: थ्व साहुजी सित धा:सा छिकपि नं ज्यानमारा मुदाय् प्यपुं वनी । थ्वयात कानूनकथं यायेमा:गु ज्या जुइ ।"— धाधां पुलिसं साहुजीयात नैयागु चुरा न्ह्याका: भ्यानय् तया: यंकल । गांया फुक्क मनूतय्सं सन्ध्या व पासापिन्त धाल— "धन्य छिमिगु साहस व छिमिगु क्वातुगु प्रतिकार ! क्वातुगु साहस दुपिन्त झिनिक् ता:हाक:म्ह धुं नं छुं याये फइ मखु धका: न्हापायापि मनूतय्सं धयात:गु धाथें हे ख: ।"

थुलि धया: मुनाच्चंपि मनूत बुलुहुं खने मदया वन ।

\*

ने.सं. १९३७ तछलागा: ११

(लँय खनागु पला: पाखें)

## हलिमलि

चथा:-नखः निन्हु न्ह्यवनिसें हरिमायाया तसकं लिमलाः । चथाःकुन्हु  
न्हापालिपा स्वयाः अप्वः हे हलिमलि मियाः दां कमाय् यानाः मस्तय्गु  
ब्वनेकुथिइ ध्यबा पुलेगु ग्वसाः ग्वयाच्चन । चथाःद्यः पुज्यायेत माःगु  
कःनि, मुस्या, छुस्या, तःग्वःगु कय्गू, चीग्वःगु कय्गू, चना, बकुलाः,  
सिम्पु, बन्हां फुक्क कचिगु न्यानाहल । कचिगु हलिमलि न्यानाः सियाः  
मिल धाःसा प्यब्वं मयाक हे लबः दइगुलिं हरिमायां थ्व लजगाः ज्वंगु  
। इमूचिया पासा इमूचा हे जुइ थें वया नं थथे हे गाडाय् हलिमलि  
मीपि पासापि बहनिइ मुनाः 'छं छु छु तया ? ग्वःता तया ? थौं गुलि  
दां मुंके फत ?' धकाः खँल्हाबल्हा याइगु । इपि फुक्क थी थी गांयापि  
जूसां इमि दथुइ थःगु ज्याय् छुं मछाःपहः मदु— संकोच मदु—हेपाः  
मदु, बरू इमि दथुइ धेधें बल्लाः कासा दु । सुनां यक्व ता तयेफत ?  
सुनां यक्व मीफत ? सुनां न्हापां गाडा पित यंकेफत आदि । हरिमायां  
पासापि फुक्कसिगु मीत तयातःगु हलिमलिया ता ल्याःखात । फुक्कस्यां  
अथे हे खः, उलि हे खः । अय्सां पासापिके स्वयाः हरिमायायाके प्यता  
न्याता हे अप्वः दु । चथाः-नखःयात मदयेकं मगाःगु बस्पतिपु, चथाःस्वां,  
पलेस्वां, पलेहः व पालुमा नं लुमंक हे कयातःगु दु । न्याःवःपिं  
मनूतमध्ये सुनाप गथे खँ ल्हायेमाः धकाः नं हरिमायां बांलाक हे स्यू ।  
गुगु थासय् गाडा यंकाः हलिमलि म्यूसा अप्वः ध्यबा खाकेफइ धकाः  
पासापिनाप खँल्हाबल्हा नं जुल । छम्ह पासां धाल— "जि ला वीर  
अस्पतालया न्ह्यःने च्वनेगु का ।"



मेम्ह पासां धाल— “जि ला मखंगल्लिया न्ह्यःने अपायधंगु थाय् दु, अन हे च्वनेगु ।”

मेम्हस्यां धाल— “जि ला मरुगणेद्यःया न्ह्यःने च्वनेगु ।”

फुकस्यां थःम्हं मनं खंगु थाय् क्यन । हरिमाया छुं मधासे सुम्क च्वनाच्चंगुलिं पासापिसं न्यन— “छं गन हलिमलि म्यूवनेगु ले ?”

हरिमायां लिसः बिल— “जि ला असं-गणेद्यःया न्ह्यःने वने ला ! छिमिसं धा सा अन च्वनां पाय्छि जुइ कि मजुइ !”

वयागु न्ह्यसः न्यनाः पासापिसं धाल— “न्हापानिसें तरकारी, सिसाबुसाया पसः तयाच्चपिसं छन्त अन गाडा तयेके बी ला ? ल्वापु-लिपु जुयाच्चनी ।”

हरिमायां निर्धक्कगु सलं धाल— “थाय् धैगु नं वयागु थ्वयागु धैगु दइ ला ? सु न्हापा थ्यन व हे च्वनेगु का !”

निक्वः प्यक्वः ल्वापुया माखापिखाय् दुथ्यायेधुंकूपि पासापिसं धाल— “अयसां बिचाः यानाः थाय् का न्है ! छुं जूसा जिमित फोन या । झी फुककस्यां मोबाइल नम्बर द हे दु, मखु ला ?”

पुचलय् दक्कय् बुन्हिम्हेस्यां धाल— “छपु पतिं जक जूसा फुककस्यां हेपय् यायेत स्वइ । न्यापतिं नं छथाय् म्हु चिन धाःसा सुनानं हेपय् याये थाकुइ ।”

‘का का ! ज्यू ज्यू !’ धाधां फुकक पासापि थःथःगु बालं-क्वथाय् वन ।

हरिमायां मस्तय्त व भाःतयात नकेधुंकाः थःम्हं नं जा नयाः भुतू सुचुकुचु यात । द्यःयात माःगु धकाः फक्वभनं भुतू नीसी यात । मस्तय्त ‘ब्बनेज्या सिधयेकि’ धकाः मेगु क्वथाय् छ्वल । स्टोभ च्याकल । छसीकथं छता छता ताया हलिमलि सिल । सी गाःगु हलिमलि हासाय् पंकाबीवं भाःतम्हेस्यां हायाः ल्ययाः टिनया थलय् ततं वन । भाःतम्ह न्ह्यागु ज्याय् नं भलसा दुगु जुयाच्चन ।

सुथ-बःछि छुस्या, मुस्या, कःनि सियाः न्ह्याक्क तांन्वःसां, चिकुसां, वाफय् वःसां गन मनूत यक्व दत अन गाडा घ्वानायकाः मीगु हरिमायाया लजगाः जुल । भाःतम्ह भरिया ज्याया हुनि वंघः-आजुद्यःया देगःक्वय् प्यूवनीगु । भरिया-ज्या मलुइबलय् हरिमायायात हे ग्वहालि

यायेत वइगु । कलाःभाःत ला व लुसि थे तसकं हे मिलय् जूगुलिं  
 न्ह्याक्व चःति बाः वयेक ज्या यायेमाःसां इमिसं छुं हे थाकु मचाः ।  
 थ्व हे लजगालं काय् व न्ह्याय् निम्हेसितं बांलाःगु ब्वनेकुथिइ तयेफत ।  
 यैया गल्लिदुने जूसां छेलिया निकू क्वथा बालं कयाः च्वनेफत ।

हरिमायां फुक्क हलिमलि सी सिधयेकाः टिनया बट्टाचाय् मिलय्  
 यानाः तल । बस्पतिपु, चथाःस्वां, पलेस्वां, पलेहः व पालुमा व चथाःद्यः  
 पुज्यायेत माःगु फुक्कं ता कथंहंक तल । 'लः-भ्याः कायेत लः मदु ला ?'  
 धाइपिन्त मदु धाये म्वायेक लः-सिसि छगः नं गाडाय् स्वचाकल ।

कन्हय्कुन्हु फुक्कसिया सिबय् न्हापा गाडा पित यंकाः, यक्व  
 ध्यबा मुंकाः, मस्तयगु ब्वनेकुथिया जाँच न्हयःने वयेधुंकूगुलिं ब्वनेकुथिया  
 स्वलाया ध्यबा न्ह्याथे यानाःसां पुलेगु ग्वसाः ग्वयाः, लय्ताःप्वः नुगलय्  
 स्वथनाः कलाःभाःत निम्हं द्यंवन ।

थौं चथाः-नखः । हरिमाया व भाःतम्ह न्हापां दन । सुथसिया  
 माःमाःगु ज्या सिधयेकल । "का परमेश्वर, थ्व फुक्क हलिमलि मी  
 फयेमा !" धकाः फुक्क हलिमलि निगः निगः कयाः द्यःयागु किपाय्  
 छाल । दुनुगलनिसें द्यःयात श्रद्धा तयाः भागि यात । थः नं यच्चुक  
 पिच्चुक सँ छयन । न्हूगु वसः पुन । हरिमायां स्यू- गन यच्चुसे  
 पिच्चुसे च्वनी, अन अप्वः मनूतसें न्याःवइ । निगः प्यंगः ध्यबा थिके-दंया  
 च्यूताः तइ मखु । निम्हेस्यां हलिमलिया गाडा असंपाखे न्ह्याकल । असं-  
 दबूया न्हयःने कुनय् थाय् दनिगु हे जुल । भाःतम्ह थःगु भरिया-ज्याय्  
 वन । मनं तुना थें द्यवं आशीर्वाद ब्यूगु थें हे च्वंक हरिमायां गाडा  
 दिकाः हलिमलि-बट्टाया पुसा उलेवं सुथय् चाःह्यू वःपिं, तरकारी  
 न्याःवःपिं, मस्तयत् ब्वनेकुथिया बसय् तःवःपिं फुक्क मनूतसें हरिमायाया  
 गाडा हे त्वपुक्क न्याःवल ।

'ओहो, थन ला सकतां दु का !' धकाः मेगु गाडाय् न्यायेत्यपि  
 नं अन हे न्याःवल । हरिमायां इपांथिपां हे मदयेक छपा ल्हाति चर्कछि,  
 बाचकं, बामना मानाचां दादां हलिमलि मियाच्वन, मेगु ल्हाति ध्यबा  
 काकां ह्मिचाय् स्वथना च्वन । बाघौ ति हे मी मखनि न्यानाच्वपिं  
 मनूतयत् खित्खिनाः छम्ह पुलिस वयाः "अय् थन लँय् च्वनाः मी दइ

ला ? लैजुवाःतयत् पंगलः जूगु मिखां मखं ला ? थ्व थाय् छु छिमि अबुयागु धकाः च्वना ला ?” धकाः हाल । पुलिसया मिजासं धाये ज्यूगुं मज्यूगुं म्हुतु ल्हानाः गाडाय् थःगु बलं प्यंकल । गाडा धेचू वन । हलिमलि बच्छि धया थें बैय् वात ।

“जिं जक लैय् च्वनाः मियागु खः ला ? उलिमछि तरकारी-पसः, वसः-पसः, लाकां-पसः, सिसाबुसा-पसः लैय् हे तयाः मियाच्वंगु छं मिखां मखं ला ?”— तं त्वाकज्याःगु सलं हरिमायां लिसः बिल— “थन च्वने मते धाःसा ला चिला हे वने नि !”

मिसाम्हेसिया तस्सःगु सः न्यनाः पुलिसयात छु मानि ? तुरुन्त हे पुलिसं थःगु पौरख न्ह्यब्वल— “अझ लिसः बिया च्वनागु का मखु ला ?” हानं गाडाय् प्यंकल । हलिमलिया टिनया बट्टाचा नं भकाभक वांछवया बिल । हरिमायां छुं भतिचा ला न्ववाये मफत । छ्यालब्याल जुइक वानाच्वंगु छगः छगः हलिमलि-ग्वलय् थः मस्तयगु ख्वाः खं थें च्वन । गुलि न्ह्यवंनिसेंया मस्तयगु ब्वनेकुथिया धेबा पुलेगु ग्वसाः फुक्क खाः थें चुं चुं जुइक तज्याःगु खन । म्ह छम्हं ज्वर वःगु थें क्वाना वल । म्ह दः खाः थें खानावल । थःम्हं हे मचायेक हरिमायां पुलिसया गःतां ज्वनाः थाथा यायां धाल— “जिं लैया नियम द्वंकल धायेवं छं जिगु उलिमछि हलिमलि वांछ्वये दइ ला ? जिं द्वंकलसा जितः गुलि बं पुइके माल ? ज्वना यंकेमाःसा यंकि ले ! कुनेमाःसा कुने यंकि तर जिपि थें न्याःपि चीमित, न्हिं खानाः न्हिं नयेमाःपि गन च्वंवेनेगु, थाय् क्यनाब्यु ! पुलिस जुयाः बल्लात धायेवं न्ह्यन्लाःथे धाये दइ ला ? जिगु हलिमलिया मू मपूतले छन्त त्वःताछ्वये मखु !”

हरिमायाया म्हुतु जक न्याः । तर पुलिसं वयात भकाभक कथिं दायाच्वन । हरिमायायात पुलिसं अन थन हे मदयेक कथिं दायाच्वंगु छतिं हे स्याः मचाः । मिखां ख्वबिधाः नापनापं मस्तयगु भविष्य नं बाः वनाच्वंगु खन । अपायधंगु असं-बजारय् पलाः हे तयेथाय् मदयेक लैजुवाःत मुनाः संकिपा स्वये थें स्वयाच्वन । शान्ति-सुरक्षा व सुव्यवस्थाया जिम्मा कायेफु धकाः जागीर नयाः न्हाय् म्वाकाच्वंम्ह पुलिसं छम्ह गाडा घ्वानाः निगः प्यंगः ध्यबा कमाय् यानाच्वंम्ह चीमिम्ह मिसायात कथिं

म्हय न्हयःनेलाःथाय् दायाच्चंगु खनाः असं त्वाःया फबन्जाः, हासा-पसल्यातय्सं सह याये मफत । फुक्क छप्पं जुयाः छप्पाः म्हुतु हे जुयाः धाल- “थ्व ला अत्याचार हे जुल । पुलिस जुयां ज्यू ला ! का, थ्वयात नं मुझकि !” फबन्जाःत फुक्क इमूचिया त्याः थें वनाः हरिमायायात सालाः छखे चीकल । पुलिसयात नं वं दाः थ्वं दाः मदयेक फुक्कस्यां दायेत्यंबलय् इपांथिपां मदयेक पुलिस बिस्सुं वन । हरिमाया ग्वारा तुलाच्चंगु गाढाय् लिधनाः ख्वयाच्चंगु स्वये मफयाः अन मुनाच्चंप्पिं मनूत फुक्कस्यां न्यातका, झितका, न्येतका, फुम्हेस्यां फु थें ध्यबा हलिमलि तयेगु छगः टिनया बट्टाय् तयाः वन । फुक्क हूल चिलावन । हरिमाया ग्वारातूगु गाढा थनाः, पकुचिंगु टिनया बट्टाचा गाढाय् तयाः, छपा ल्हातं गाढा घ्वाघ्वां मेपा ल्हातं ध्यबा फुक्क म्हूचिनाः थःगु बालं-क्वथाय् वन । वं मस्यू- वया ल्हाःम्हूया दुने वया मस्तयगु भविष्य दु ला मदु ला (?), ब्वनेकुथिइ पुलेत ध्यबा गाः ला मगाः ला ?!

\*

(‘लँय् खनागु पलाः’ पाखें)

ने.सं. ११३७ बछलाथ्वः २

## गिजिमिजिगु लिच्चः माइनस-प्लसया स्वापुतिं

“स्व मिना ! थ्व खँय् छं अप्वः बिचाः याना हे च्वनेमाःगु मदु । जिं व हे मनु नापलानाः खँ बांलाक ल्हाना स्वयेधुन । मनु तसकं हे तप्यं खनेदु । ज्याखँ तप्यंकाछ्वये । थुकी छ लिचिलेगु थःगु तुतिइ थःम्हं हे पा वायेगु थें जुइ ।”- अफिस वनेत हथाय्पथासं ग्वाय्-दान्हि खानाच्च्वंम्ह बौया म्हुतुं हितिप्वः मदुगु हितिं लः हाइ थें छत्थुं खँ नं ह्वार हाःगुलिं मिना गबाय्त् इइपनाः छुं लिसः बी मफु । मिनाया न्हयपुइ कुति कुति न्यात- ‘व मनु- फसं जक जायाच्च्वंम्ह मनु । पिनें जक किचुकियाः बुद्धा थकयाः मूर्तिकला व चित्रकलां जक छायापियातःम्ह मनु । धात्थें मखु अत्तरं जकं नस्वाकातःम्ह मनु ।’ तर थथे धकाः मिनां बौया न्हयःने म्हुतु विस्फोट याये मफु । हानं थःत थःम्हं हे लपुं ज्वनेधुकूगु, थःत थःम्हं हे दथुअंगः ल्यया तयेधुकूगु, थःगु जौवनयात थःम्हं ब्यालेन्स मिलय् यायेधुकूगु खँ नं मिनाया कथुइ तङ्गसिल वल । अथेसां ज्वःगु धंपं लः बिस्तारं ज्वइ थें मिनाया म्हुतुं सः ज्वल- “बाः ! व मनु न्हयाक्व हे बयान यायेबहःम्ह जूसां जितः .....”

“मिना ! छं आम्थे जिदी ....”

“यः बाः ! थ्व अलजेब्रा हिसाब गथे मिलय् मजुल, छकः स्वयाब्यु रे !”- न्हयगू क्लासय् ब्वनाच्च्वंम्ह बःचाधिकःम्ह काय् लागिचाः-स्वाः ज्यानाः हालावःगुलिं बौया सः चब्बुत ।

“आःई जुइधुकल, छन्त हिसाब स्यनाच्च्वने लाइ ला ? मिना ततां स्यनाबी का ।”- बौम्हस्यां हथासं ग्वाय्-दान्हि खाये सिधयेकल ।

मिनां किजाया कापि कयाः यानातःगु हिसाब स्वल । मिनां बौया  
ख्याः छकः पुलुकक स्वल । अले हिसाबय् द्वंगु क्यनाबिल— “का स्व  
लाता ! थन स्यन का ! माइनस व प्लस जोडय् यानां नं हिसाब  
मिलय् जुइ ला ? माइनस माइनस, प्लस प्लस मिलय् याःसा धकाः  
हिसाब मिलय् जुइ । का, थ्व माइनस माइनस व प्लस प्लस जोडय्  
या सा ..... अले हिसाब मिलय् मजूसा खः का ! आःकुन्हु लुमका ति  
न्ह्याबलें ! गब्लें त्वःममकुसे जोडय् जुइगु धयागु कि माइनस माइनस,  
कि त प्लस प्लस हे जक । माइनस प्लस गुबलें हे जोडय् जुइ मखु ।”

मचां मचान्हयपुं हिसाब थुइकल । बौम्हं मुसुहुं न्हिलाः थुइकल—  
म्हयाय्या धात्थैया हिसाब ।

‘लबु’, दँ २, त्याः ५, ने.सं. १०१६ पाखें





## मनदेवी तण्डुकार (ताम्राकार)

- बुद्धि : ने.सं. १०६९ दिल्लीगा: अष्टमी  
 शिक्षा : स्नातक (अर्थशास्त्र)  
 बूगु थाय : ज्या:बहा:, येँ  
 थौकन्हय : कुपण्डोल १ - गुसिंगा:, यल  
 मां : नानीमाया तण्डुकार  
 बा: : पूर्णवीर तण्डुकार  
 जहान : लक्ष्मणकृष्ण ताम्राकार  
 पदक : दीर्घसेवा पदक (नेपाल बैंक लि.)  
 मेगु कृति : इलं क्यंगु लै (न्हूबाखं-मुना)  
 लैय् खनागु पला: (न्हूबाखं-मुना)  
 ईमेल : mtamrakar@icloud.com  
 क्षमण : भारत, सिंगापुर, थाइल्यान्ड, दक्षिण कोरिया, जापान,  
 संयुक्त राज्य अमेरिका, नेडरल्यान्ड, बेल्जियम,  
 जर्मनी, फ्रान्स, स्विट्जरल्यान्ड, अस्ट्रिया

ISBN 978-9937-9260-4-1



9 789937 926041